

DXUS YUWE SAN MATEO FXI'JNI

*Jesukristo ji'j nyafxiiteywe'sxtxi pta'sxni
(Lk 3.23-38)*

¹ Jesukristo ji'j nyafxiiteywe'sx kimtewap txãatxku pta'sxi' ayte'. Jesukristo' Abrahan Davxid ji'kh yu'.

² Abrahana' Isaak neyku yu', naapkaçxha' Isaakha', Jakob neyku yu'. Aça' Jakoba', Judáwe'sx neyku yu'.

³ Juda' Fxares vxite' Zara neyku yu', aça' njĩ'ja' Tamarku yaase yu'. Fxaresa' Esrom neyku yu', naapkaçxha' Esroma', Aram neyku yu'.

⁴ Arama', Aminadab neyku yu', naapkaçxha' Aminadaba' Naason neyku yu'. Aça' Naasona', Salmón neyku yu'.

⁵ Salmona' Booz neyku yu', naapkaçxha' njĩ'ja' Rahabku yaase yu'. Booza' Obed neyku yu', aça' njĩ'ja' Rutku yu'. Obeda' Isaí neyku yu',

⁶ naapkaçxha' Isaía', jxkaahsa Davxid neyku yu'. Aça' jxkaahsa Davxida', Salomón neyku yu', aça' Salomón njĩ'ja' Urias nyu yu'k nyafxíi txãak yu'.

⁷ Salomona' Roboam neyku yu', naapkaçxha' Roboama', Abias neyku yu'. Aça' Abiasa', Asa neyku yu'.

⁸ Aça' Asa', Josafxat neyku yu', naapkaçxha' Josafxatha', Joram neyku yu'. Jorama', Uzias neyku yu'.

⁹ Uziasa' Jotam neyku yu', naapkaçxha' Jotama', Akaz neyku yu'. Aça' Akaza' Ezekías neyku yu'.

¹⁰ Ezekiasa' Manasés neyku yu', aça' Manasesa' Amón neyku yu', naapkaçxha' Amona' Josías neyku yu'.

¹¹ Josiasa' Jekoniaswe'sx neyku yu'. Txãa ensutx Israelwe'sxa' Babilonia kiwen jxūna u'jni yuu.

¹² Aça' Jekoniasa' Salatiel neyku yu', naapkaçxha' Salatiela', Zorobabel neyku yu'.

¹³ Zorobabela' Abiud neyku yu', aça' Abiuda' Eliakim neyku yu'. Eliakima', Azor neyku yu'.

¹⁴ Azora' Sadok neyku yu', aça' Sadokha', Akim neyku yu', naapkaçxha' Akima' Eliud neyku yu'.

¹⁵ Eliuda' Eleazar neyku yu', aça' Eleazara' Matán neyku yu', naapkaçxha' Matana', Jakob neyku yu'.

¹⁶ Jakoba' Jose neyku yu', naapkaçxha' Jose' Maria nmi'k yu', Kristo Jesus yaasesa njĩ'j.

¹⁷ Abrahaman ji'jtx isate', katorce ney u'jweçtek Davxida' upxhna ũsu'. Aça' Davxid ji'jtx isate', ki' vxite katorce ney u'jweçtetx Israelwe'sxa' Babilonia kiwen jxūna u'jni yuu. Txãajũ ki' isani ki' vxite katorce ney u'jweçtek Kristo' upxhna ũsu'.

Jesukristo upxni

(Lk 2.1-7)

¹⁸ Jesukristo upxni' na'wēk yuu: Jesus njĩ'j Maria' José yakh imi'ya' puutx we'wenik ji'phu'. Nawa ih fxi'zemey, nasa ji'phuk Dxus Espiritu kaavxya'ja'jni.

19 Txajx nmi' Josea' txãawe'sx leytxi kxtey nwẽese'jna fxi'zesak yu'. Nawa Maria nasa ji'phuni yu's khuẽswe'sxtxi pãatxhĩ'kxmée, paaçte txuteeya'wak yu' nasa jiyunimeete.

20 Sa' txã'wẽ yajkxna ũsiyna, ksxa'wte Dxus angel vxyaaçxa na'jĩk:

—José, Davxid ji'j, iidx nyu yuuwa'jsa Maria's jxpa'gaya' wa'lnu, na'wẽ nasa ji'pha' nawa txã' Dxus Espiritu kaavxya'ja'jni'.

21 Maria nçxi'k āaga vxyaate', txã'sa' Jesus yasene'ga. Txã'wẽ kxsusni yuuna, txãa pa'gatey txajx nasa pkaltewe'sxtxi nwe'wewa'jsa' jĩnak we'we.

22 Txã'wẽ yuuk, nawa txãniitey Dxus yuwe pta'sxsa's Dxusíi kaaũusuthe'the' na'wẽk we'we txãa kxtey yuukahñçxáak txã'wẽ yuu.

23 Txã' na'wẽk we'we:
Teeçx kna'sa' teeçx nçxi'k ji'phuna.

Txã' Emanwel kxsusni yuuna jĩk.

Txãa Emanwel jĩnisa': Dxusa' kwe'sx yakh ũsa' jĩni'.

24 Txajũ' Josea' deenijũ yajkxçxa', Dxus angel we'weni's nwẽese'jçxa Maria txajx nyu yu- uwa'jsa's nvxihtme'.

25 Nawa ptam na'wẽ ih yu' fxi'zemeeta', María nçxi'k āaga yuupkaçx. Sa' Maria nçxi'k āaga yuute', txã'sa' Jesus yasek ki'p.

2

Sek kãanijuwe'sx Jesusa's weçxaya' pa'jni

1 Jesusa' Belen çxhabtek upx, Judea kiwete. Txãn ensu txãa kiwesu jxkaahsa' Herodesku

yu'. Naapkaçxha' Jerusalen çxhabte maz piçthê'j pa'jtx sek kãani kiwejuwe'sx estrelxatx jiisa.

² Sa' na'jĩnatx pějx:

—¿Mtee ũsna judiwe'sxtxi jxkaahwa'jsa ãçxh u'se upxsa? Kwe'sxa' txajx upxni's pta'sxsa estrelxa's uytha'w sek kãani kiweju, txãasatha'w weçxaya' yuwé'.

³ Txã'jĩte', Herodesa' wala kuh yajkxku, txã'wěy Jerusalen çxhabte nasawa jxukaysa.

⁴ Txajũ' jxkaahsa' sacerdote npiiçthê'jwe'sx vxite' ley kaapiya'jsawe'sx jxukaysatx pa'yaçxa' paapějxku:

—Kristo' ¿mteega upxwa'jsa yu'? jĩte', pta'sxtxi:

⁵ —Judea kiwete Belen çxhabtek upxwa'jsa yu'. Txajĩk Dxus yuwe pta'sxsa' na'jĩna fxi'j:

⁶ Judá kiwete Belen çxhab txã'wě maa çxhabtewa jxthaakwe ãhmeekwesame'.

Txãa pa'gately Belen çxhabuh teeçx npiiçthê'jsa kaseçxa Adx nasa Israelwe'sxtxi jxpe'jwa'jsa jĩ'k.

⁷ Txã'jĩte', Herodesa' estrelxa's uysaatx paaçte pa'yaçxa pějxku:

—¿Makwe txaçx yuuçna estrelxa vxyaani? jĩna wala ew paapějxçxak

⁸ Belenna kaah na'jĩna neewe'weçxa:

—Kxte me'jwe, sa' wala ew paapěyine'kwe txãa luuçx ma'wěsatewa. Sa' ew jiyuçxa', adxa's pta'sxine'kwe, aça' adxwa weçxaya' u'jwe'nja jĩte',

⁹ estrelxa's uysaawe'sxa' u'jtx. Naapkaçxha' sek kãani kiweju estrelxa uyne'ta txãa estrelxa'

txãawe'sx yaçte vxyaana u'jçxa mteene' luuçx
 ũsu' txãa kajkwete pa'jçxak kxtee yuju.

¹⁰ Txã'wẽ estrelxa ki' vxyaate', wala weçxatx,

¹¹ sa' yatte u'kaçxa luuçxa's uytxi njĩ'j yakh.
 Sa' peejxũkweçxa' luuçxa's weçxatx. Txã'wẽ
 yũuçxatx txãawe'sx peeswa'j jxũçxa u'jni's
 phaadeçxa pees: vxyuu beh, incienso vxite'
 miçxa.

¹² Txã'wẽ yũuniijũ' kus ksxa'wte pta'sxnitx yuu
 Herodes tasxna ki' sxawedkahnén. Aça' vxite
 dxi'jsutx sxawedna u'j.

Egipto kiwen ũphna u'jni

¹³ Estrelxa's uysaawe'sx u'jni'jũ', José ksxa'wte',
 Dxus angel vxyaaçxa na'jĩk:

—Kiiteçxa me'j ũphna Egipto kiwen
 luuçxkuẽ's pe'jçxa petx njĩ'j yã'jçxa. Sa' kxtee
 ũsune'ga adx ki' pta'sxpkaçx. Txã'wẽme',
 Herodesa' luuçxkuẽ's ikhya' pakweya'wa' jĩte',

¹⁴ Jose' kusçxáa pe'jna Egipto kiwen u'kh.

¹⁵ Sa' kxteetx ũsu' Herodes uupkaçx. Dxus
 yuwe pta'sxsa we'weçxa': Egiptoju pa'yath Adx
 Nçxi'ka's jĩk txãa kxtey yuukahnçxáak txã'wẽ
 yũu.

¹⁶ Estrelxa's uysaawe'sx txã'wẽ Herodesa's
 weeçxsa na'wẽ vxite dxi'jsu u'jni's jiyuçxa',
 seena' wala ũusaçxak. Sa' luuçxtxi kiikhe'kh Be-
 len çxhabetwe'sx vxite' peeku'jsuwe'sx yã'jçxa
 jxuka, luuçx e'z anxu ji'phsate kãhpkaçx. Es-
 trelxa's uysaawe'sxa' makwe txaçx yã'j yuuçtewa
 pta'sxne'ta txã'sna jiyuçxak txã'wẽ e'z anxu
 ji'phsate kãhpkaçx kiikhe'jna ũsu' Herodesa'.

17 Dxus yuwe pta'sxsa Jeremias na'jĩna fxi'jni kxtey yuuk:

18 Teeçx ahte Ramá yaasesate pthũusek Seena' pebeena nxus we'weni.

Txã' Rakelku txã'wẽ ù'ne' txajx luuçx pa'gate, Sa' kisxi'çme', txã'wẽtx ikhni yuu naa pa'ga jĩ'k.

19 Egipto kiwete ùşçxa José ksxa'wte', Dxus angel vxyaaçxa na'jik Herodes uuniijũ':

20 —Ãçxha' luuçxa's ikh wẽesawa uuyã'jtx, aç'a pe'jçxa sxawedna me'j Israel kiweníi jĩte',

21 Jose' sxawedna u'kh Israel kiwen luuçx petx njĩ'j yã'jçxa.

22 Nawa Herodes pa'gate nçxi'k Arkelao Judeate jxkaahna ùste jiyuçxa', ùukhku kxtee pa'jya' yu'. Sa' ksxa'wte' pta'sxnik yuu, txãasak Galilea kiwen u'j.

23 Kxtee pa'jçxa', teeçx çxhab Nasaret yaasesatek u'p-ya' u'j. Nyafxiitey Dxus yuwe pta'sxsawe'sx we'weçxa', Jesusa' Nasareno ya'kxsusuna jĩ'tx txã'jĩni kxtey yuukahnçxáak txã'wẽ yũu.

3

Juan Bautista nasa u'pnimée kiwesu Dxus yuwe's pta'sxni

(Mr 1.1-8; Lk 3.1-9, 15-17; Jn 1.19-28)

1 Txãa ensu' Juan Bautista' Dxus yuwe's pta'sxna pa'kh Judea kiwesu nasa u'pnimeesu.

2 Sa' na'jĩ'k:

—Pkaltxi nvxihtçxa Dxus tasxte misxawedwe. Txã'wẽme', Dxus jxkaahwa'j ena' ãjxã'kh jĩ'k.

³ Naa Juana'sku we'wena fxi'j Dxus yuwe pta'sxsa Isaiasa' na'jīna:

Nasa u'pnmíeé kiwesu sus we'weni pthūusek:

Dxus pa'jwa'ja's mpheu'jwe,

Dxi'ja's ku'le phaadena jī'k.

⁴ Juana' kamelxo khas atxh athçxa kha'txku jxtudu'. Sa' txajx ū'nisa yu', khā'sx wala çxhi'dx miltxi yu'.

⁵ Kxtee wēse'jya' pa'jtx Jerusalenuwe'sx vxite' Judea kiwesuwe'sx jxuka vxite' Jordan yu'wala utxasuwe'sxwa.

⁶ Sa' txā'wē pkalsatha'w jīna Dxusa's perdon pējxna pa'jsatxi' Juana' Jordan yu'walate bauti-sai'k.

⁷ Nawa fxariseowe'sx vxite' saduceowe'sx txā'wē thegya' yuhte uyçxa', Juana' na'jī'k:

—I'kwe'sxa' ul weesweesa ji'ji'kwe txāa pa'ga kastigo seena'sa yuja', aç'a' txajū iyuwa'ja's çkinga pta'sx?

⁸ Txā'wē kastigo seena'saju iyuwa'ja's jiyuyā'jçxa', ewçxáa yūuna mfxi'zewe, kxah maawa ew fxi'zeni's uysa': Naawe'sxa' pkaltxi nvxihtçxa Dxus luuçx yuh yuuta sūjutzna.

⁹ Txā'jīte', i'kwe'sxa' na'wē iiwejçx yaakxnuwe: Kwe'sxa' Abraham ji'tha'w na' pkalsameetha'w sūhna yaakxwa'j ji'phméé i'kwe. Na'jī'th na': Naa kwet yuhtxwa Abraham ji'j vxit-ya' ājana Dxusa'.

¹⁰ Txā'wē ew fxi'zemeete', ama' ih yā'j ūsa' fxtūutasxtxi spē'thya'. Maa fxtūutasxwa ew yūnsameetxi' spē'thçxa ipxte kabwa'jçxáa yu-una.

11 Adxa' i'kwe'sxtxi' yu'teçxáath bautisaĩ' pkaltxi nvxihtçxa Dexus tasxte sxawedsatxi'. Nawa adx e'suh vxite yuja' txã' Dexus Espiritu ipx na'wēsate bautisaĩna. Txã' adxte jxthaakwe ājawa'jsa', aça' adxa' txajx pelgatxiçxáa yuhtxwa ũsya' seelpimeesath.

12 Txã' skuutxh kweejxa'jni plaatu's kusete at yã'jçxa ũsa' na' skuutxha's tamaju txudena sūupi'jna. Txã'wē yūuçxa skuutxha's jxaawu-una. Nawa tama yu'sa' kabuna ipx bagaçxte yuhwa ũçxhawa'jmeesate jĩ'k.

Jesus ya'bautisāyni

(Mr 1.9-11; Lk 3.21-22)

13 Naapkaçxha' Jesusa' Galilea kiweju yuhçxa Jordan yu'wala pukate Juan ũsnite pa'kh, Juan yu'te bautisāykahn.

14 Nawa Juana' Jesusa's bautisāy wēemeeçxa na'jĩk:

—Wejx yuuwa idx adxa's bautisāywa'jsag, sa' ¿ma'wēga adxa's pi'ki' idxa's bautisāykahn? jĩte',

15 Jesusa' na'wēk pas:

—Dxus jxthāasni's kxtey yuuní wejx ewna jĩte', Juana' kxtey nwēese'kh.

16 Aça' Jesusa' yu'te ya'bautisāyçxa kase-jeçpkaçxha', cielu' phaatek, aça' Jesusa' uyku Dexus Espiritu tub çxihme na'wēsa txajx kajkwete kĩaçte.

17 Aça' we'weniwa pthūusek cieluju na'jĩna:

—Naaii Adx Nçxi'k wala wedxnisa'. Txãa pa'ga wala weçxana ũsthu jĩk.

4

Eçxthē'j Jesusa's ĩsxii wēeni
(Mr 1.12-13; Lk 4.1-13)

¹ Txajū' Dxus Espiritu' Jesusa's pe'jna u'kh nasa u'pnimée kiwesu, kxteea' eçxthē'j ĩsxii wēeni fxi'zeya'.

² Sa' kuarenta en kuarenta kus kīhwa ũ'mée u'pçxa', Jesusa' wēek.

³ Aça' eçxthē'ja' Jesus tasxte utxaaçxa na'jīnak we'we ewmée vxit wēeçxa:

—Dxus Nçxi'k dxihçxa', naa kwettxi pan myuukaah jīte', Jesusa' na'wēk pas:

⁴ —Dxus librute na'jī'k: Nasa' pan yakhçxáa yu' ĩtxi fxi'zemeetxna, naasáa jxuka Dxus we'weni yakh yuuçxáa ĩtxi fxi'zetxna jīk.

⁵ Txajū' eçxthē'ja' Jesusa's pe'jna u'kh Jerusalen çxhabna, sa' kxteea' dxuus yatte ēete kaateka'jçxa,

⁶ na'wēk jxkaah:

—Dxus Nçxi'k dxihçxa', ay ēejū mūph. Txāa pa'gatey Dxus librute na'wēk we'we':

Dxusa' txajx angeleswe'sxtxi jxkaajana idxa's nwe'wekahn.

Aça' txāawe'sxa' kusete jxpa'gatxna,

lidx çxida kwette kpā'yuukahmen jīna fxi'jni' jīte',

⁷ Jesusa' na'wēk pas:

—Vxite ahte Dxus librute' na'wēk we'we':

Idxna jxpe'jsa Dxusa's jxkaahwa'j jī'phmeeg jīna fxi'jni' jīk.

⁸ Txajū' eçxthē'ja' ki' pe'jna u'kh vxix walate, sa' txāajū maa kiwesu çxhabtxiwa seena' zhiçkwesa's kaavxya'jak.

⁹ Sa' na'jĩk:

—Adxa's peejxũkweçxa neewe'wene'ga açá' adxa' na'sa' jxuka idxa's ũsu'nja jĩte',

¹⁰ Jesus paççxa':

—Eçxthē'j, adx tasxu mtxutéé, txāa pa'gatey Dxus librute na'jĩ'k:

Idxna jxpe'jsa Dxusçxá's neewe'wewa'ja', sa' txāaçxá's selpiwa'ja' jĩna fxi'jni' jĩte',

¹¹ eçxthē'ja' Jesus tasxu txuteek, açá' Dxus angeleswe'sxa' pu'çxya' pa'jtx.

Galilea kiwesu Jesus mjĩiya' takhni

(Mr 1.14-15; Lk 4.14-15)

¹² Juan Bautista' kxuuphni ũsa' jĩni's Jesusa' jiyuçxa', Galilea kiwen u'kh.

¹³ Nawa Nasaret çxhabte yu' yujumée, Kapernaum çxhabtek u'p-ya' u'j. Txāa çxhaba' Zabulón vxite' Nefxtalí kiwe txāa ja'dasuk ũsu' ĩkh pukaga.

¹⁴ Txā'wē yũuk nawa Dxus yuwe pta'sxsa Isaias fxi'jni kxtey yuukahnçxáak txā'wē yũu. Txā' na'jĩnak fxi'j:

¹⁵ Zabulón Nefxtalí txāawe'sx kiwesu u'psa, Vxite' ĩkh pukasu dxi'j u'jna ũsa' txāa ja'dasu u'psa,

Vxite' Jordan yu'kuteju, sek kãani ju'guwe'sx,

Vxite' Galilea kiwesu judiu ji'jmeesawe'sx

¹⁶ Txāa nasa' çxhi'dxte ũssa na'wē ũsçxawa, Eena'sa's uytxi.

Sa' uuní na'wēçxáa yã'j ũstewa,

Eena'sa' kweethku jĩ'k.

¹⁷ Txajũ' Jesusa' Dxus yuwe's pta'sxya' takhku:

—I'kwe'sxa' pkaltxi nvxihtçxa Dxus tasxte misxawedwe. Txã'wēme', Dxus jxkaahwa'j ena' ājxã'kh jī'k.

Wedx uwesáa pahzsatx Jesus pa'yani
(Mr 1.16-20; Lk 5.1-11)

¹⁸ Jesusa' Galilea íkh pukasu u'jweççxa', e'z pxakhtxi uyku, Adres vxíte nyakha's Simon Pedro jī'tx txãawe'sxtxi. Txãawe'sxa' wedx uwesaatx yu', txãasatx wedx ukhe's íkhte akhna ūsu'.

¹⁹ Aça' Jesusa' na'jīk:

—Adx yakh myuhwe, aça' Dxus jīi nasaa pkhakhwa'jsa vxítu'nja i'kwe'sxtxi'.

²⁰ Txã'jīçpkaçxha', wedx ukhetx nvxihtçxa txãa yakh u'jtx.

²¹ Aça' Jesusa' txãajū wejkuē u'jnaçxáa, vxíte e'z pxakhtxi uyku, Zebedeo nçxi'kwe'sx Jakobo vxíte' Juan txãawe'sxtxi. Txãawe'sxa' barkote ney yakhtxi u'p yu', wedx ukhe's pã'khna. Aça' Jesusa' pa'yak.

²² Naapkaçxha' barko vxíte' txãawe'sx neyna nvxihtna'wa Jesus yakh u'jtx.

Nasa seena' wala kuhsatx Jesus kaapiya'jni
(Lk 6.17-19)

²³ Jesusa' Galilea kiwe jxukak pekūh, judi-uwe'sx pkhaakheni yat-su Dxus jxkaahwa'j yuwe ewsa's pta'sxna, txã'wēy nasa kīh weete āça'satxwa jxuka nuykatxhik.

²⁴ Txajū' Siria kiwesuwe'sx jxuka jiyutx Jesus txã'wē yūuni's. Txãa pa'gatx fxiyfxiy āça'satxwa jxuka jxūna pa'j, aka jī'phsa vxíte' eçx iiyamunisa vxíte' wēeçpa'jsa vxíte' ēseya' ājasameetxwa jxuka. Txã'wēsaxku Jesusa' nuykatxhi.

²⁵ Txajjũ' Jesus yakh pi'kxna u'juya' nasa wala utxaatx, Galileajuwe'sx vxite' Dekapolis kiwe-suwe'sx vxite' Jerusalenuwe'sx vxite' Judea kiwe-suwe'sx vxite' Jordan yu'kutejuwe'sx.

5

Thã'j vxiçte Jesus kaapiya'jni

¹ Nasa wala kuh kasehte uyçxa', Jesusa' txajx txhitxhnisawe'stxxi thã'thek pe'jna u'j. Aça' txãawe'sxa' txajx tasxte utxaate',

² na'wêk kaapiya'jya' takh:

Kim weçxana fxi'zewa'jsatxki

(Lk 6.20-23)

³ Wala yuh weçxa yuja' Dxusa's peejçxa pak-wesáa yakha', txãa pa'gatey txã'wê yũusa' Dxus jxkaahna ũsnite u'kaya' âjawa'jsata' naa pa'ga.

⁴ Wala yuh weçxa yuja' ewmeete fxi'zeni's jiyuçxa ũ'nena Dxusa's yaakksa yakha', txãa pa'gatey txã'wê yũusa' Dxus kvxiisxa'jni yu-uwa'jsata' naa pa'ga.

⁵ Wala yuh weçxa yuja' wa'lmée Dxus tasxte utxasáa yakha', txãa pa'gatey txã'wê yũusá' naa kiwe jxuka txãawe'sx jiiçxaçxáa yuuna pa'jwa'jsa' naa pa'ga.

⁶ Wala yuh weçxa yuja' Dxus dxi'pte ew fxi'zewa'ja's yuuçxáa ũsuh jxuka yajkçxa pak-wesáa yakha', txãa pa'gatey txã'wê yũusaatxi' Dxusa' pu'çxhina.

⁷ Wala yuh weçxa yuja' vxitetx peeygãhna fxi'zesa yakha', txãa pa'gatey txã'wê yũusa' Dxus peeygãanitx fxi'ze' naa pa'ga.

8 Wala yuh weçxa yuja' ũuste kīh pkala's yuhwa ka'ga'jmée fxi'zesa yakha', txāa pa'gatey txā'wē yūusa' Dxusa's uyya' ājawa'jsata' naa pa'ga.

9 Wala yuh weçxa yuja' puiimée fxi'zewa'ja's pakwesáa yakha', txāa pa'gatey txā'wē yūusa' Dxus luuçxta' naa pa'ga.

10 Wala yuh weçxa yuja' Dxus yakh fxi'zepa'ga yahçena fxi'zesa yakha', txāa pa'gatey txā'wē yūuni fxi'zeçxawa Dxus jxkaahna ũsnite u'kawa'jsata' naa pa'ga.

11 I'kwe'sxa' wala yuh weçxana mfxi'zewe, adxna nwēese'pha'gaçxáa nasa' wēesxuna pkx-uuna kījkihwa ewmée nuywe'weçtewa.

12 Txāa pa'gatey cielute' wala yuh jxpa'gawa'j ji'phi'kwe naa pa'ga. Dxus yuwe pta'sxsa txāniiteywe'stxxi txā'wētx pkxuu na' āçxhwa txā'wēyçxáa yuutxna, nawa nxusmée weçxana mfxi'zewe.

Naa kiwete nega na'wē pēethehna eena' kweethwa'jsa

(Mr 9.50; Lk 14.34-35)

13 I'kwe'sxa' nega na'wē naa kiwete pēethewa'jsa i'kwe. Nawa nega' sxūukāhçxa', çma'wē pēethejekx? Kīh yūuwa'j yuhwa selpimeena, naasáa puhbçxa nasaa wakhi'khi'jwa'jçxáa yuuna.

14 I'kwe'sxa' naa kiwete eena' kweethsa i'kwe. Teeçx çxhab thā'j vxiçga ũssa' çnasa uynimée ũsma'k?

15 Lampara's aphçxa txajxa' txā'wē ya'pki'ta'çme', wejxwa āatek ya'txaja', yatte jxuka kweethkahn.

16 Txã'wëy i'kwe'sxwa eena' mkweethwe nasaa dxi'pte, kxah i'kwe'sx ew fxi'zeni's uyçxa', Dxus ewsa üsyuju'ga jïna we'wetsna i'kwe'sx Tata cielute üssa's.

Moises leya's Jesus äate kaapiya'jni

17 Moises ley vxite' Dxus yuwe pta'sxsawe'sx kaapiya'jni txãatx nwëese'jya'méene' yuwé' sũhna yaakxnuwe adxa's. Txã'wë yũuya' yuwe'çmeeth, wejxwa txãa leya's jxthaakwe ew äate kaajiyu'jya'th yuwé'.

18 Isath pta'sxi', cielu petx kiwe yã'jçxa skhëwpkaçx txãa leytxi' le'çxkuëçxáa yuhwa e'skhë nvxihtmée jxuka nwëese'jwa'tha'.

19 Txãa pa'ga maawa txãa ley jxkaahnitx wala le'çxkuëesa kĩhtewa selpiwa'jmeesa na'wë thegte txãatxi' nvxihtçxa, nasatxwa txã'wë yũuya' iïçxáa kaapiya'jana na', txã'wë yũusa' Dxus jxkaahna üsnite le'çxkuëçxáa seelpisa' jïni yuuna. Nawa txãa leytxi le'çxkuëçxáa yuhwa nvxihtmée jxuka nwëese'jçxa vxitetxwa txã'wëy nwëese'jya' kaapiya'jsa', Dxus jxkaahna üsnite wala seelpisa' jïni yuuna.

20 Na'jï'th na': i'kwe'sxa' kaapiya'jsawe'sx vxite' fxariseowe'sx fxi'zenite jxthaakwe ew fxi'zemeçxa', bagaçxte yuhwa Dxus jxkaahna üsnite u'kaya' äjameene'kwe.

Üsçxawa'jme'

(Lk 12.57-59)

21 I'kwe'sx yaçgawe'sxtxi na'jïna kaapiya'jni's iiwëse'jne'kwe: Nasa ikhwa'jme'. Txã'wëme', nasa ikhsatxi's maatxwa kastigãywa'j yuuna jï'tx.

22 Nawa adxa' na'wēth jxkaaja': Nasa yu's ikhmeeçxawa, peekx yakthē'ja's ũusçxa yaakxpagaçxáa txāawa yuuwesa kastigāywa'j yuuna. Meeçxawa peekx yakthē'ja's wáa açewe'wena açá' txā'sa' khuēswe'sx tasxte jxūna u'jni yuuna. Sa' peekx yakthē'ja's wēesxute', txā'sa' kastigo infxiernote akhwa'j yuuna.

23 Txā'wē Dxusna peeswa'j ofxreda's jxūna pa'jçxa altalte akhmey yaakiwá'ga iidx yakthē'j idxa's açeni's,

24 sa' txāa ofxreda's altal pukate nvxihtna'wa u'jwene'ga iidx yakthē'ja's perdon pějxya'. Txā'wē yūuçxa txāa ofxreda's altalte akhene'ga.

25 Maawa idxa's açesa pāatxhĩ'khçxa khuēs tasxna jxūna u'jweçte', khuēs tasxte pa'jmey dxi'kha mpuutxwe'we khuēs tasxte jxūna u'khamen. Txā'wēme' khuēsa' policiawe'sxtxi dukhte', txāawe'sxa' karcelte txajatxna.

26 Adxa' isath we'we', txajūyā'ja' kasejxa' ājameene'ga vxyu nmeh ji'phuni's dukhmeeçxa yu'.

Ptamsa vxite yakh pkal yuuwa'jme'

27 I'kwe'sxa' iiwēse'jne'kwe na'jīna nyafxiitey kaapiya'jni's: Ptamsayā'ja' vxite yakh pkal yu-uwa'jme' jīni's.

28 Nawa adxa' na'wēth jxkaaja': Vxite yakh yu' pkal yuumeeçxawa, teeçx u'ya's ewmēe yajkçxa thegni yakhçxáa, pkal yā'kh yu' txajx ũuste.

29 Yafxá' idxa's pkalte kweete'phçxāh yuuçte', kutxi'jçxa mwāatah. Wejxwa teeçx yafxçá's

ivxiituçxa', kakwe jxuka yu' infxiernote akhni yuunimée wejx ewa'.

³⁰ Meeçxa' paçu kuse txã'wě pkalte kweete'phçxãh yuuçte', spë'thçxa mwãatah. Wejxwa teeçx kuseçxá's ivxiituçxa', kakwe jxuka yu' infxiernote akhni yuunimée wejx ewa'.

Ptamusa' txuteewa'jme'

(Mt 19.9; Mr 10.11-12; Lk 16.18)

³¹ Txã'wěy nyafxiitey na'jina pta'sxni'swa iiwěse'jne'kwe: Maawa nyu yakh txuteeççxa', txãa txuteni's eçte fxi'jçxa nvxiitwa'ja' jĩnatx kaapiya'ja'.

³² Nawa adxa' na'wěth jxkaaja': Nyua' vxite yakh pkal yũuteçxáa nmi'a' txuteeya' ajana. Txã'wěme', pkal yũusameete peekçxáa nmi'a' txuteeçxa', vxite yakh pkalte weteewa'ja's dxi'j phaadesa yuuna. Txãa pa'ga maa piçthě'jwa txãa u'y nvxiitnisa yakh ptamuuçxa', txãawa pkaltek wetesá yuuna pa'ja'.

Jurãywa'jme'

³³ I'kwe'sx yaçgawe'sxtxi na'wě kaapiya'jni'swa iiwěse'jne'kwe: Dxus yase's kxsusçxa jurãyni's ĩsxiimée kxtey yuuwa'ja' jĩ'tx.

³⁴ Nawa adxa' na'wěth jxkaaja': Kxtey yu-une'jmeeçxa', ma'wěsaçxáa yuhtxwa kxsusna jurãywa'jme'. Cielu's kxsusna jurãynuwe, txã' Dxus jxkaahna ũsni' naa pa'ga.

³⁵ Sa' kiwe'swa kxsusna jurãynuwe, txãa kiwe' dxuus çxida txaahwa'j vxitnisa' naa pa'ga. Sa' Jerusalennawa kxsusna jurãynuwe, txãa çxhaba' jxkaahsa çxhaba' naa pa'ga.

³⁶ Sa' peekx dxikthe's kxsusnawa jurãynuwe, txãa pa'gatey idxa' kîhte yuhwa seelpimeesag Dxus dxi'pte naa pa'ga. Txãasa teeçx dxkhasçxáa yuhnawa çxihme vxit-ya' ãjawa'jsameeg, sa' khũçxwa vxit-ya' ãjameene'ga.

³⁷ Jurãywa'j peejxme', isasa's teeçx jwedçxáa mwe'wewe, jiiçxa' jii íith jîna, jiimeeçxa' ji-imeeth jîna. Txã'wême', ísxiina we'wenisa' eçxthê'j kwe'we'jni'.

Iideewewa'jme'
(Lk 6.29-30)

³⁸ I'kwe'sxa' iiwēse'jne'kwe na'jîna nyafxiitey kaapiya'jni's: Iidx yafxa's kpã'vxitte', ka'tuwa txã'wēy myūu. Sa' iidx ki'tha's çxkahdete', ka'tuwa txã'wēy myūu jî'tx.

³⁹ Nawa adxa' na'wēth jxkaaja': Iidxna ewmée yūusa's ka'tuja' iideewenu. Txã'wē yūumée, iidx dxi'pga pehtxate', ka'tu ju'guwe'sxnawa petx-akahn mes.

⁴⁰ Meeçxawa idxa's pãatxhĩ'khçxa iidx kmi-isa's kusa'jaçte', jxkaaçni atxhnawa mes jxūna u'khan.

⁴¹ Teeçx ta'gute pa'j tu'sçxa nvxiht-ya' u'jwa'ja's jxkaathe', e'z ta'gute pa'j nvxiht-ya' me'j.

⁴² Maawa kîhçxáawa idxa's thãaste', mes. Sa' pki'the', wa'lwa'jme' ji'phçxa'.

Açesatx peeygãawa'ja'
(Lk 6.27-28, 32-36)

⁴³ Nyafxiitey na'jîna kaapiya'jni'swa iiwēse'jne'kwe: Nasatxi' mpeeygãh, nawa açesa yuutxi' peeygãanu jî'tx.

44 Nawa adxa' na'wēth jxkaaja': I'kwe'sxtxi açesatxi' mpeeygāhwe, sa' kxsewna ewmée we'wesatxi' ka'tu' ewçxáa mwe'wewe. Açesatxi' ew yūuna mfxi'zewe. Wēesxuna pkxuusatxi' txāawe'sx pa'gate Dxusa's mneewe'wewe nwe'wekahn.

45 Txā'wē yūuçxaçxáa i'kwe'sx Tata cielute ũssa luuçxçxa txā'wē yuune'kwe. Txā' maa nasatxwa seka's kaakweethe'je'k, ewsa ma'k yuu meeçxa' ewmeesa ma'k yuu nawa jxukaysatx. Sa' txā'wēy nusnawa kaja'k, ew yūusa ma'k yuu meeçxa' ewmée yūusa ma'k yuu nawa jxukaysatx.

46 Txā'wē i'kwe'sxtxi peeygāasaçxáatx ka'tuwa peeygāhçxa', ew yūusatha'w çjīya' ājama'kwe? Makwe nasa ewmeesa gobierno jīi vxyu pkhakh-sawe'sxwa txā'wē yūuwa'jçxáa yu'sa' āja'tx aça'.

47 I'kwe'sx yakhthē'jwe'sxçxáatx weçxate', çkīh ew yūuni yaasena? Txā'wē yūuwa'j yu'sa' Dxusna jiimeesawa kxteytxi yū'.

48 I'kwe'sx Tata cielute ũssa' maa yakhwa jxuka ewsa' naa pa'ga i'kwe'sxwa txā'wēy mfxi'zewe.

6

Jxpa'yakx ew yūuwa'ja'

1 I'kwe'sx ew yūuni's nasa uyçxa ew we'we jxthāasçxa mjīini's wala mpa'yajkxwe. Txā'wē ew we'we jxthāasçxaçxáa ew yūuna fxi'zete', iidx Tata cielute ũssa' kīh yuhwa dewemeena.

2 Txāa pa'ga peejxsatx kīhçxáawa peesu'ççxa', nasa uykahn sūhçxa nasa ksxavxyte txā'wē

yūunu. Āateçxáa ew we'wesawe'sxçxáatx txã'wē yū' judiuwe'sx pkhaakheni yat-su vxite' klxiikhunsu, nasa' uyçxa' ew yuh yū'k jīna tuuthe'j jxthāasçxatx txāawe'sxa' txã'wē yū'. Nawa adxa' isath we'we': Txã'wē yūuçxa', nasaa pwe'sx tuuthe'jniçxáatx fxi'ze'.

³ Nawa peejsatx kīhçxáawa peesu'ççxa', kim yuhwa jiyunimeete paaçte txã'wē myūu.

⁴ Aça' paaçte txã'wē yūuçte iidx Tata uyçxa', idxa's deweena.

Dxus yakh na'wē puutx we'wewa'ja'
(Lk 11.2-4)

⁵ I'kwe'sxa' Dxus yakh puutx we'weççxa', āateçxáa ew we'wesawe'sx na'wē yūunuwe. Txāawe'sxa' judiuwe'sx pkhaakheni yat-su vxite' klxiikhunsu yujuçxatx Dxus yakh puutx we'wena pekūju' nasa uykahn sūhçxa. Isath we'we', txã'wē yūuçxa' nasaa tuuthe'jniçxáatx fxi'ze'.

⁶ Nawa idxa' Dxus yakh puutx we'weççxa', yat dxiite u'kaçxa vxitxa's aphçxa kim yuhwa uynimeete mpuutxwe'we. Aça' txã'wē paaçte puutx we'wete', iidx Tata cielute ūssa' deweena.

⁷ Dxus yakh puutx we'weççxa', lxisasáa na'wē txã'snañçxáa kuh us peenana ūswa'jme'. Dxusa's jiimeesaçxáatx txã'wē yū', wala we'wete', Dxusa' wēse'jena sūhçxa.

⁸ Txāawe'sx na'wēy yūunuwe. Txã'wē yūumeetewa, i'kwe'sx Tata' jiiyā'ja' i'kwe'sx pee-jini's pējxumeyna.

⁹ Txāa pa'ga i'kwe'sxa' na'wēçxáa Dxus yakh puutx we'wena na'jīne'kwe:

Kwe'sx Tata cielute ũssa
Idxa' bagaçxtewa jxtuhthe nes yuune'ga.

¹⁰ Iidx jxkaahwa'j ena'sçxáatha'w ũythasu',
Naa kiwete idx ma'wēne'ga jxthãasu'
txã'snaçxáa kxtey tee yuu cielute na'wēy.

¹¹ Kwe'sx ũ'wa'j een isa peejini's meen pees.

¹² Kwe'sx ewmée yũuni's meen peltunaĩ,
kwe'sxwa ma'wētk'a'w peltunãy kwe'sxtxi
ewmée yũusatx txã'wēy.

¹³ Ewmeete wetekahmén, meen nwe'we.
Txãa pa'gatey idx yuuçxáa kĩhtewa jxuka
ãjawa'jsag, sa' bagaçxtewa idx yuuçxáa
jxkaahna nes yuuwa'jsag.

¹⁴ Txã'wē i'kwe'sxwa ewmée yũusatx pel-
tunãyte', i'kwe'sx Tata cielute ũssawa pel-
tunaĩna i'kwe'sxtxi.

¹⁵ Nawa ewmée yũusatx peltunaĩmeete',
i'kwe'sx Tatawa peltunaĩmeena i'kwe'sxtxi.

*Dxus yakh puutx we'weya' yũunani's
kaapiya'jni*

¹⁶ I'kwe'sxa' yũunaççxa', maa nasawa
uykahn sũhçxa ãate kaavxya'ja'jwa'jme'.
Ãateçxáa ewtha'w jĩsaçxáatx txã'wē yũ' nasa
jiyukahn. Isath we'we': Txã'wē yũuçxa' nasaa
tuuthe'jniçxáatx fxi'ze'.

¹⁷ Nawa idx txã'wē yũunaççxa', dxi'pna
pçxhĩ'çxçxa dxkhasnawa ew mkid,

¹⁸ kxah idx yũunani's ãate kaavxya'ja'jmeete',
nasa jiyumeetxna, naasáa iidx Tata yuuçxáa
jiyuçxa idxa's deweena.

*Cielute ji'phuwa'jçxá's mpa'pçxuwē
(Lk 12.33-34)*

19 Naa kiwete kījkiḥwa ji'phuwa'ja's pa'pçxunuwe. Txã'wẽme', wes ũ'we'tx, aça' izwa suwu'tx. Naapkaçxha' peswé' pa'jçxa ji'phuni's kutxi'ji'tx.

20 Wejxwa cielute ji'phuwa'jçxá's wala mpa'pçxuwe. Kxteea' weswa ũ'meena, aça' izwa suwmeena, pesweewa kutxi'jmeena.

21 Txãa pa'gatey mtee jxaawni ji'phçxa', kxte yuuçxáak wejx jxthaakwe yajkxna ya'fxi'ze'.

*Yafxa' kakwe's ewte kaafxi'ze'jsata'
(Lk 11.34-36)*

22 Yafxa' kakwe's ewte kaafxi'ze'jsata'. Txã'wẽ iidx yafxa' ewsaçxá's thegsate', iidx kakwe' ewte sxiigmée fxi'zena.

23 Nawa iidx yafxa' ewmeesaçxá's thegsate', iidx kakwe' jxuka ewmeete çxhi'dxteçxáa fxi'zena. Txã'wẽ eena'te ew kaafxi'ze'jwa'jsa yuu ewmeete çxhi'dxtewe'sxa'sçxáa thegsate', bagaçxte yuhwa eena'te fxi'zewa'ja's ya'ji'phumeena.

*Dxusna yajkxna vxite' naa kiwete ji'phuni'swa
yajkxna fxi'zeni
(Lk 16.13)*

24 Kim yuhwa e'z patrontxi selpiiya' ãjameena. Txã'wẽ vxiteçxá's wedxna fxi'zeçxa', vxite patron yu'sa' açena. Sa' teeçxsa jxkaahniçxá's kxtey yuuçxa', vxite patron jxkaahni yu'sa' kxtey yuuya' ãjameena. Txã'wẽy naa kiwete ji'phuni's pa'pçxuna Dxusnawa selpiina yuuya' ya'ãja'çme'.

*Kwe'sx peejini's Dxusa' jxuka pu'çxhina
(Lk 12.22-31)*

25 Na'wēth yu'kxpeje': I'kwe'sxa' kīh yuhwa kuh yajkxmée mfxi'zewe, ¿kīh ũ'wekxtha'w? sa' ¿kīh athehxtha'w? sūhna. Txāa pa'gatey ũ'nisate jxthaakwe peejsa itxi fxi'zeni's ji'phyã'ji'kwe, sa' athnisate jxthaakwe peejsa kakwe'swa ji'phyã'ji'kwe naa pa'ga.

26 Mthegwe ēesu fxuusa vxiçxakwetx. Txāawe'sxa' uja'çmeeta', sa' ũ' pkhakhe'çwameeta', sa' tee jwedte jxaawu'çwameeta'. Txã'wētewa i'kwe'sx Tata cielute ũssa' txāa vxiçxakwetxi' peejxmeeek sã'jī'. I'kwe'sxa' txāa vxiçxakwete jxthaakwe pa'gasa i'kwe, aç'a' wejx txã'wē sã'jīna.

27 Txã'wē wala pa'pçxuçxa' ¿i'kwe'sx maaçxá' peena medio metro thaakwe walaaya' ãja'kwe'?

28 ¿Kījxa'çxáakwe txakwe pa'pçxu' i'kwe'sx athwa'j ropaçxá's? Mthegwe kite tasxti. Txāawe'sxa' mjī'çmeeta', sa' khaswa pudu'çmeeta', nawa ma'wēta zhiçxkwe walá'.

29 Na'jī'th na': Jxkaahsa Salomon yuhwa txāa kite tax na'wē yu' zhiçxkwe iijxūme' makwe wala ji'phsaçxawa.

30 Txã'wē kite tasxa' açxhíi yu' zhiçxkwe ũsçxawa, kuskusa' ipxte kabwa'jçxáak yu', nawa txã'wēsa'swa Dxusa' wala zhiçxkwe pheu'ju'k na' i'kwe'sxtxi' wejx thaakwe ew pheu'juna. Txāa sūjxa' ãja'çmeene'kwe.

31 Txāa pa'ga i'kwe'sxa' kīh yuhwa kuh ya-jkxmée mfxi'zewe, ¿kīh ũ'wekxtha'w? sa' ¿kīh athehxtha'w? sūhna.

³² Dxusna jiimeesaçxáatx txã'wẽ kuh yajkxna fxi'ze'. Nawa i'kwe'sxa' cielute Tata ji'phi'kwe txã' jxuka jiia' i'kwe'sx peejini's.

³³ Txãa pa'ga i'kwe'sxa' Dxus yakh fxi'zewa'ja's khuẽ'y wejx thaakwe mpa'pçxuwe, txajũyã'ja' kĩhwa thẽymée vxyaana.

³⁴ Açxha' jiyui'kwe na' kuskuskhẽwe'sxa's ũythasna pa'pçxunuwe. Txã'wẽme', kuskuskhẽ' pa'pçxuwa'j thaakwe thẽysa pa'jana een isa fxiyfxiysa.

7

Jiimeeçxa' nuywe'wewa'jme'

(Lk 6.37-38, 41-42)

¹ Ma'wẽsatewa jiimeeçxa', ewmeesata' jĩna nuywe'wewa'jme', Dxus dxi'pte i'kwe'sxwa ewmeesa yuuya'mée.

² Txã'wẽme', vxitesatx nuywe'wete', Dxusa' i'kwe'sxtxiwa ewmeesata' jĩçxa kastigaĩna nuywe'wepa'ga. I'kwe'sx ma'wẽ juuna' yũute', Dxuswa txã'wẽyçxáa juuna' kastigaĩna.

³ Iidx yakthẽ'j yafxte kxtã' le'çxkuẽesa khẽeçxa ũste ¿ma'wẽ uyuki'g iidx yafxte yu' fxtũ pe'la yuu walasa khẽeçxa ũste txã's khuẽ'y kutxi'jmeeçxa'?

⁴ Sa' ¿ma'wẽ iidx yakthẽ'ja's kxtã' le'çxkuẽesa iidx yafxte ji'phgu txã'sa' kutxi'jith jĩna we'weki'g, txã'wẽ iidx yafxte yu' fxtũ pe'la walasa's ji'phçxa'?

⁵ Āakheçxáa ew we'wena u'jusa, iidx yafxte fxtũ pe'la walasa's khuẽ'y mkuutxi'j. Txã'wẽ

yũuçxa iidx yakthē'j yafxte kxtā' le'çxkuēsa's ew uyçxa kutxi'jya' ājane'ga.

⁶ Dxus yuwe's alkutx ūswa'jme', sa' kuçxitxwa ūswa'jme'. Txā'wēme', jxuka wa'khi'khi'jçxa ūusaçxayā'jçxa', ūssa i'kwe'stxi íiçxáa wa'kxya' kũjutxna.

Dxusa's pēyni vxitxte tu'kakana

(Lk 11.9-13; 6.31)

⁷ Dxusa's mpējxwe, aça' ūsuna, sa' pak-weçxa', uyuune'kwe. Vxitxte mtu'kakawe, aça' phaadena.

⁸ Txā'wē maawa pēysa' jxpa'gana, aça' pak-wesá' uyuuna. Vxitxte tu'kakate', phaadeni yuuna.

⁹ I'kwe'sx pwe'sx maaçxa' i'kwe'sx luuçx pan thāaste', ¿kweta's ūsma'kwe?

¹⁰ Meeçxa' wedx thāaste', ¿ula's ūsma'kwe?

¹¹ I'kwe'sxa' Dxus dxi'pte ewmeesaçxawa, i'kwe'sx luuçxtxi' ewsaçxáa i'kwe peesu', aça' i'kwe'sx Tata cielute ūssa' wejx thaakwe ewsa's peesuna thāassatxi'.

¹² Bagaçxtewa i'kwe'stxi maa nasawa ewçxáa yũuna fxi'ze jxthāasçxa', i'kwe'sxwa txā'wēy maa nasatxwa ewçxáa yũuna mfxi'zewe. Txāa pa'gatey Moises ley vxite' Dxus yuwe pta'sxsawe'sx fxi'jniwa txā'wēçxaçxáatx jxkaaja'.

Vxitx pteezsa

(Lk 13.24)

¹³ Vxitx pteezte me'kawe. Txā'wēme', vxi-tuwa'the u'kawa'j vxitxa' wala tape', aça' dxi'jwa txā'wēy tape'. Kxteea' wala kuhsa u'kana ūsta'.

14 Naapkaçxha' vxitumée Dxus tasxte pa'jwa'j vxitxa' pteeza', aça' dxi'jwa txã'wëy pteeza'. Kxtee yu' kuhmeeçxáa u'kana ũsta'.

Nasa ma'wë yuuçtewa mpa'yajkxwe jiyuya'
(Lk 6.43-44)

15 Dxus jxkaahnisatha'w jïna ïsxiisatxi' mpa'yajkxwe. Txãawe'sxa' i'kwe'sx tasxte yu' piisxáa kakwe yakhtxi vxya', nawa ũuste yu' yu'kh eçx weeswée na'wësata'.

16 I'kwe'sxa' txãawe'sx fxi'zeni's jiyune'kwe. Miiyajkxwe: Uwa's çhũçh tasxte ya'ude'çme', sa' brewa's khãas tasxte ya'ude'çme'.

17 Txã'wë fxtüu tasx ewsa' ewsaçxáak yünu', aça' fxtüu tasx ewmeesa' ewmeesaiçxáak yünu'.

18 Fxtüu tasx ewsa' ũ' ewmeesa's yünya' äjameena. Txã'wëy fxtüu tasx ewmeesa' ũ' ewsa's yünya' äjameena.

19 Maa fxtüu tasxwa ewmée yünsa's spë'thçxa ipxte ya'kabu'k.

20 Txãa pa'ga txãawe'sx fxi'zeni's uyçxa jiyune'kwe ma'wësatewa.

Jxukaysa yu' cielute u'kameetxna
(Lk 13.25-27)

21 Yuwejuçxáa adxa's ew we'wesa jxuka yu' cielute Dxus jxkaahna ũsnite u'kawa'jsameeta', naasáa adx Tata jxthãasni's kxtey yuusaçxáa cielute u'kawa'jsata'.

22 Txãasa cielute u'kawa'j en ähte', wala yuh maawa adxa's na'jïtxna: Kwe'sxtxi jxpe'jsa mwëese'j: Kwe'sxa' iidx yuwe's pta'sxtha'w, sa' iidx yase's kxsusçxa eçxthë'jtxwa kutxi'tha'w,

sa' kim yuhwa ājanimeesa'swa kaavxya'ja'tha'w maz uswa jītxna.

²³ Nawa adxa' na'jīna pasu'nja: Bagaçxte yuhwa adx jxpe'jnisa yu'çmeee'kwe, naa pa'ga i'kwe'sxtxi' jiimeeth. Ewmée yūuna fxi'zesa' adx tasxtewe'sx meei'kwe.

Dxusa's nwēese'jsa vxite' Dxusa's nwēese'jsamée

(Lk 6.47-49; Mr 1.22)

²⁴ Maawa adx jxkaahni's wēse'jçxa kxtey yu-usa', yat txajxa' jiisa na'wēsa yuuna: Txāa yata's kwette kaaçxida'jçxa txahte',

²⁵ nus pa'jna, wejxa wala kiitena, yu' walaana yuuçxawa, yata's suwme', kwette kaaçxida'jçxa txaahnipa'ga.

²⁶ Nawa maawa adx jxkaahni's wēse'jçxawa kxtey yuusame', yat txajxa' jiimeesa na'wēsa yuuna: Txāa yata's kwetmuseteçxāa txahte',

²⁷ nus pa'jna, wejxa wala kiitena, yu' walaana yuute', txāa yata' weteçxa jxuka suweek jīk.

²⁸ Txajū' Jesus we'wena jxā'the', nasa' wala kuh yajkxna neeyūutx txajx kaapiya'jni's wēse'jçxa,

²⁹ txā'wē leya's kaapiya'jsawe'sx na'wēmée, nwēese'jwa'ja's ũukhnus we'wena kaapiya'pha'ga.

8

Teeçx piçthē'j wā'jy weete āça'sa's Jesus nuykatxhini

(Mr 1.40-45; Lk 5.12-16)

¹ Jesusa' thã'j vxiçu kĩhte', nasa iiméh wala kuh pkhaakhetx.

² Aça' teeçx piçthê'j wã'jy wee seena' kazxsate ãça'sa Jesus tasxte utxaaçxa peejxũkweçxa na'jĩnak pxthaa we'we:

—Adxa's peeygãhçxa' nuykatxhine'ga naa weeju jĩte',

³ Jesusa' na'jĩnak kuseju jxa'dx:

—Ahçemée peeygãanisag, naa pa'ga katxhiçxa mneeyũu jĩçpkaçxha', txãa wã'jy weeju katxhiçxak neeyũu.

⁴ Aça' Jesusa' na'wêk jxkaah:

—Maa yuhtxwa pta'sxmeene'ga, naasáa sacerdote yuuçxáana iidx kakwe's txwesya' me'j. Sa' Moises ma'wêga jxkaaja' txã'sçxáa kxtey yuune'ga, kxah nasa jxukaysa jiyutxna idx ew katxhiçxa neeyũutewa jĩk.

*Soldau kpiitan jxpe'jnisa's Jesus nuykatxhini
(Lk 7.1-10)*

⁵ Txajũ' Jesusa' Kapernaum çxhabte pa'the', soldau kpiitan romanowe'sx utxaaçxa' pxthaa we'wek na'jĩna:

⁶ —Adx yatte jxpe'jnisa uuya' yã'j ũsa' ěseyá' ãjameeçxa jĩte', Jesús pasçxa':

⁷ —Adxa' u'jçxa nuykatxhi'nja jĩk.

⁸ Aça' kpiitana' na'wêk pas:

—Adxa' iidx dxi'pte kĩhte yuhwa seelpimeesath. Txãasath adx yatte iidx pa'jni's thaame', naasáa çxhãçxhana jĩna mwe'we aççxáa adx jxpe'jnisa' katxhina.

⁹ Adxwa ma'wêtká walasa jxkaahnitxi' nwēese'je', sa' adxna nwēese'jsa soldauwe'sx

iijxpe'th txãawe'sxtxi teeçxsa's me'j jïte', adx jxkaahni's kxtey yu'k. Sa' vxite's pa'yate', txãawa kxtey nwëese'je'k. Sa' adxna selpisa's kïh jxkaathewa kxtey yu'k jïk.

¹⁰ Txã'wë we'weni's Jesusa' wëse'jçxa', wala kuh yajkxku, sa' na'jïnak we'we txãa yakh yu-usatxi':

—Isath we'we', Israelwe'sx jxukaysa mteewe'sx yuhwa txã'wë adx we'weteçxáa katxhina sũhsa yu' iuymeeth naa piçthë'j na'wësa yu'.

¹¹ Na'jï'th na', judiu jï'meeçxawa wala yuh pa'jatxna sek kãanijũwe'sx vxite' sek khëenijuwe'sx majũwe'sxwa jxuka, sa' Abraham, Isaak, Jakob txãawe'sx yakh ũ'ya' kaçxhiitxna cielute Dxus jxkaahna ũsnite.

¹² Naapkaçxha' kxtee ũswa'jsata' jïnisa yu', kutxi'jçxa çxhi'dx walate akhni yuutxna. Kx-teea' seena' yuh pebeena ki'thtxi ksuusu'jutxna ũukhna jïk.

¹³ Sa' Jesusa' ki' we'wek kpiitana's:

—Yatna me'j, aç'a' idx ma'wëne'ga jxthãasu' txã' kxtey yuuna jïçpkaçxha', txãa kpiitan jxpe'jnisa' katxhinik yuu.

*Pedro nyu njï'ja's Jesus nuykatxhini
(Mr 1.29-31; Lk 4.38-39)*

¹⁴ Txajũ' Jesusa' Pedro yatnak u'j, sa' kxteea' Pedro nyu njï'ja' kakwesekte uuya' ũstek uy.

¹⁵ Aç'a' kusete jxa'dxku, naapkaçxha' kakwe-seka' ũçxhak. Txajũ' txãa u'ya' kiiteçxa selpiia' kasejk.

16 Sa' txãa en jxuka çxhi'dxiçte', Jesus tasxte wala jxũna pa'jtx eçx iiyamunisatx. Aça' tee dxi'j we'weni yakhçxãa txãa eçtxi' ũusuh kutxi'kh, sa' âça'sa jxukaysatx nuykatxhik.

17 Nyafxii Dxus yuwe pta'sxsa Isaiasa' na'jĩnak we'we:

Txãaĩik kwe'sx çxhãçxhamée fxi'zeni vxite'
kwe'sx âça'na fxi'zeni's jxuka txuhde jĩ'k
txã'jĩni kxtey yuukahnçxãak txã'wẽ yũu.

Jesus yakh fxi'ze wẽesa

(Lk 9.57-62)

18 Txã'wẽ nasa wala pkhaakhete', Jesusa' ĩkh kuten u'jwe'nja'w jĩnak we'we.

19 Txã'jĩte', ley kaapiya'jsa teeçxsa Jesus tasxte utxaaçxa', na'jik:

—Idx yakh yuu wẽeth idx mtee u'jweçtewa jĩte',

20 Jesus pasçxa':

—Yu'kh niimal yuhwa deewa'j kafx ji'phta', txã'wẽy vxiçxakwewa yat ji'phta'. Nawa Dxus Nçxi'k Nasa Yuusa' mtee yuhwa txajx dxik-theçxãa yuja'swa khikhwa'j ji'phme'.

21 Naapkaçxha' Jesusna nwẽese'jsa teeçxsa' na'jĩnak we'we:

—Adxa's mkaah adx tata khuẽ'yna pedaawa'j ji'phthu jĩte',

22 Jesus pasçxa':

—Uusaawe'sxa' peekx uusãa pwe'sx ya'pedaatxna. Aça' idxa' adx yakh txutemée myuh jĩk.

Marte wejxa wala's Jesus kxuuju'jni

(Mr 4.35-41; Lk 8.22-25)

23 Txajũ' Jesusa' barkote khêek açá' txãa yakh u'jusawe'sxa' pi'kxna u'jtx.

24 Txã'wê ikhte u'jweçpkaçxha', wejxaa wala sêjk, açá' yu'tũçxhasa' barko's aphyá'wak yu'. Nawa Jesusa' deenik yu'.

25 Açá' txãa yakh u'jusawe'sxa' fxĩtxtxi na'jĩna:
—Kwe'sxtxi jxpe'jsa, meen nwe'we. Txã'wême', ìkh dxiikhê khêjeçtha'w jĩte',

26 na'wêk pas:

—¿Kĩjxa'kwe txakwe wala ùukhu'? ¿I'kwe'sxa' Dxusna yajkxya' yu' ew jiimeewá'kwe? jĩçxa', kiiteçxa wejxa vxite' ìkh txãatx we'wek, açá' jxuka yujuk.

27 Txã'wê yũute', barkote u'jsawe'sxa' wala kuh yajkççxa na'jĩnatx we'we:

—Naa piçthê'ja' ¿kimna açki'tx wejxa ìkh txã'wêsa yuhwa nwêese'je'? jĩ'tx.

Gadara kiwetewe'sx eçx iiyamunisa

(Mr 5.1-20; Lk 8.26-39)

28 Txajũ' Jesusa' ìkh kuteju Gadara kiwete pe-sathe', e'z piçthê'j uusáa pedani kafxju kasehçxa Jesus tasxte utxaatx. Txãa e'zsa' eçx iiyamunisatx yu', txãasatx iiméh seena' weeswée yu', txãa pa'ga txãa dxi'jsu kim yuhwa skhêwya' ája'çmeeta'.

29 Txãa eçx iiyamunisa' na'jĩnatx sus we'we:

—Dxus Nçxi'k Jesus, kwe'sx nxuste ùswa'j en áhmeyna, ¿nxuste akhya' yuwe'wá'ga? jĩ'tx.

30 Kxsũ thã'jsu kuçxi wala ùsu'tx aphna.

31 Açá' txãa eçxa' Jesusa's pxthaa we'wetx:

—Kwe'sxtxi neeuççxa', txãa kuçxi ùussu khêeya' u'khan mkaah.

³² Txã'jĩte', Jesusa' kxtey yuukaakh. Aça' txãa eçxa' nasa ũusuh kasehçxa txãa kuçxi ũustetx khêe. Txã'wê yũute', txãa kuçxi' penxakhê peluçxa îkhkhê khêeçxa jxuka uutx.

³³ Aça' kxsũ kuçxi thegsa' ũukhçxa wuwuuçxáa çxhabna u'jçxa pta'sxtxi kĩh yũuni'swa jxuka. Sa' txãa e'z piçthê'j eçx iiyamunisawe'sxtxi kĩh yũutewa jxukatx pta'sx.

³⁴ Txajũ' çxhabte nasa jxuka thegya' u'jtx Jesus ũsnite. Sa' uyçxa' Jesusa's txãawe'sx kiweju kasehna u'khahtx.

9

Ĕseyá' ājasame's Jesus nuykatxhini (Mr 2.1-12; Lk 5.17-26)

¹ Txajũ' Jesusa' barkote khêeçxa sxawedçxa txajx çxhabtey ki' pa'kh.

² Aça' kxteea' teeçx piçthê'j ĕseyá' ājasame'stxi yakhna pa'j. Txã'wê yakhna pa'jsawe'sxa' Jesusa' nuykatxhiyujuna sũhni's jiyuçxa', āça'sa's na'wêk we'we Jesusa':

—Çxhãçxha myajkx. Iidx pkala' peltunãyni yã'jtx neeyũu jĩte',

³ ley kaapiya'jsawe'sx maaí yu' na'wêtx ya-jkx: Naa piçthê'ja' Dxusa's iiveeçx we'wena ājawa'jmeea'sku we'we' sũju'tx.

⁴ Nawa txãawe'sx yaakxni's Jesus jiyuçxa', na'jĩnak we'we:

—¿Kĩh yuutekwe txã'wê ewmêe yaaki'?

⁵ ¿Maa thêymeesakx? Iidx pkala' peltunãyni yã'jtx neeyũu ¿jĩniá'? Meeçxa': Kiiteçxa me'j ¿jĩniá'?

⁶ Makwe thëysatewa Dxus Nçxi'k Nasa Yuusa' naa kiwete pkaltxi peltunãyya' ãjawa'jsa' naa pa'ga kaajiyu'j ya'wath ãçxha'.

Txajũ' êseyá' ãjasame's na'wëk we'we:

—Kiiteçxa, iidx deeni's tu'sçxa yatna me'j jïte',

⁷ txãa êseyá' ãjasameea' kiitena'wa u'kh txajx yatna.

⁸ Txã'wë yũuni's nasa uyçxa', ũukhtxi. Sa' Dxusna weçxana tuuthe'jtx txã'wë çxhãçxhawa'ja's Dxusa' peesne' sũhçxa.

Mateo's Jesus pa'yani

(Mr 2.13-17; Lk 5.27-32)

⁹ Jesusa' txajũ u'jçxa', teeçx piçthë'j Mateo yaasesa txã'wë gobierno jïi vxyu pkhakhna u'pte uyçxa', na'wëk we'we:

—Adx yakh myuh jïna.

Aça' Mateo' kiiteçxa Jesus yakh u'kh.

¹⁰ Txajũ' Jesusa' ũ'ya' yatte u'kak, aça' gobierno jïi vxyu pkhakhsawe'sx vxite' pkalsawe'sxwa wala kuh u'katx vxite' Jesus yakh u'jusawe'sx yã'jçxa.

¹¹ Aça' txã'wë yũuni's fxariseowe'sx uyçxa' pëjxtxi Jesus yakh u'jusawe'sxtxi na'jïna:

—¿Ma'wëçxaga i'kwe'sxtxi kaapiya'jsa' gobierno jïi vxyu pkhakhsawe'sx vxite' pkalsawe'sx yakh ũ'wé'?

¹² jïni's Jesus wëse'jçxa', na'wëk we'we:

—Yu'çe'jsa's jxpee'xmeeta' aka ji'phméé wët ũssa', naasáa aça'sa yuuçxáa yu'çe'jsa's jxpee'jxta'.

¹³ Mpiyawé Dxus librute na'wë fxi'jni ũsa' txã'sna: Tajkx ikhçxa Dxusa's weçxana

kabni yu'sa' jxpeejxmeeth. Adxa' vxitetx peeygãaniçxá'sthu jxthãasu' jĩ'k. Adxa' nasa ewsatx pakweya' kĩhmeeth, naasáa pkalsatx pakweya'çxáath kĩh, kxah ewmée yũuna fxi'zeni's nvxihtçxa Dxus tasxte sxaweduutxna.

*Yũunani's Jesusa's pēyni
(Mr 2.18-22; Lk 5.33-39)*

¹⁴ Txajũ' Juan Bautista yakh u'jusawe'sxa' Jesus tasxte utxaaçxa na'wētx pējx:

—¿Kĩh yuupa'gatka'w kwe'sx vxite' fxarise-owe'sx txakwe wala yũuna', naapkaçxha' idx yakh u'jusawe'sx yu' yũuna'çmeeta'? jĩte',

¹⁵ Jesusa' na'wēk pas:

—Miiyajkxwe: ¿bodate pi'kxnisa' ũ'mée nxusna ũswa'jsatxmanx novxio' txãawe'sx yakh nee ũsiite'? Naasáa novxio's txãawe'sx tasxuh txuhdete yuuçxáa yũunaatxna.

¹⁶ Ropa ñisxsate tela u'sesa yakh ya'pã'khe'çme'. Txã'wēme', tela u'sesa' jweeíçxáak sude' ñisxsa's, aça' sutenisa' jweeíçxáa wala suteena.

¹⁷ Txã'wēy beka u'se aahnisa's slun ñisxsate ya'awu'çme'. Txã'wēme', beka u'sesa slun ñisxsa's sude'k, aça' beka yakh slun yakh e'zĩ vxitu'tx. Txãa pa'ga beka u'sesa's slun u'sesate awwa'ja'. Txã'wē yu', maa yuhwa vxitumeetxna.

*Jairo niisa vxite' Jesus atxhte jxa'dxsa
(Mr 5.21-43; Lk 8.40-56)*

¹⁸ Jesus txã'wē we'wena ũspkaçxha', judiu pkhaakhenite npiiçthē'jsa' Jesus tasxte pee-jxūkweçxa na'wēk we'we:

—Adx niisa' uuyã'kh. Nawa idx yuhçxa kuseju jxa'dxwaça', ìtxi yuuna jìte',

¹⁹ Jesusa' kiitena'wa txãa yakh u'kh, txãa yakh u'jusawe'sx yã'jçxa.

²⁰ Txã'wě u'jweçpkaçxha', teeçx u'y doce anxu kakwe yu'te ãça'na u'jusa Jesus e'ste paaçte kũhçxa, atxh vxiçte kpaajxa'dxku.

²¹ Atxh vxiçteçxáawa jxa'dxwaça', katxhi'nja sũhçxak txã'wě yũ.

²² Nawa Jesusa' jiyuçxa txãa u'ya's thegçxa na'wěk we'we:

—Ûukhnuwe, wejxwa katxhini i'kwe neeyũ, txã'wě katxhi'nja sũhçxane'kwe txã'wě yũ naa pa'ga jìte', txãa dudtey katxhiçxak neeyũ.

²³ Txajũ' Jesusa' txãa npiçthě'jsa yatte pa'jçxa uyku pedaaçte nxusna tukawa'jsa músiku jxuka pheu'jçxa ùste. Aça' nasa' nxusna wala ù'nenã ùste',

²⁴ na'wěk jxkaah:

—Ayjxu mkaasehwe. Luuçxa' uunime', deeniçxáa ùsa' jìte', nasa' npeevxysxijkatx.

²⁵ Nawa Jesusa' nasatx kasejkaahçxa dxiite u'kana'wa, txãa luuçxa's pu'kisuçpkaçxha', ki-itek.

²⁶ Aça' txã'wě yũuni's txãa kiwesu jxuka tu-uthe'jnik yuu.

E'z piçthě'j uyya' ãjasameetx Jesus nuykatx-hini

²⁷ Txajũ' Jesus kasehna u'jweçte', uyya' ãjasamée e'ztxi sus we'wena yuwé':

—Davxid Nçxi'k, kwe'sxtxi mpeeygãh jĩna.

28 Txajũ' Jesusa' yatte u'kate', txãa uyya' ãjasameewe'sxa' utxaana kũhtx. Aça' Jesusa' na'wêk pêjx:

—¿Uywa'ja's ũsuna sũju'kwe' i'kwe'sxa'? jĩte', txãawe'sx paşçxa':

—Txãa sũju'íitha'w jĩtx.

29 Aça' Jesusa' txãawe'sx yafxte jxa'dxku na'jĩna:

—I'kwe'sx jxthãasni' kxtey yuuna jĩçpkaçxha',

30 txãawe'sx yafxa' ewuutx. Aça' Jesusa' wala neewe'wek na'jĩna:

—Kim yuhtxwa pta'sxmeene'kwe jĩtewa,

31 txajũ kasehna' txãa kiwesu jxuka pta'sxtxi Jesus txã'wê yũuni's.

We'weya' ãjasame's Jesus nuykatxhini

32 Txãawe'sx kasehna u'jweçpkaçxha', Jesus tasxte vxite piçthê'j nuypa'jtx, we'weya' ãjasamée eçx iyamunisa's.

33 Aça' Jesusa' txãa eçxa's ũusuh kutxi'the', txãa piçthê'ja' we'weya' ãjak. Txã'wê yũute', nasa' wala kuh yajkxtxi na'jĩna:

—Israel kiwete bagaçxte yuhwa na'wêsa yu' iuymeetha'w jĩ'tx.

34 Nawa fxariseowe'sx yu' na'wêtx we'we:

—Naa piçthê'ja' eçxtxi nasa ũusuh kutxi'ji'k, nawa eçxthê'j pu'çxteçxáak txã'wê yũ' jĩ'tx.

Mjĩsa yu' kuhmeeta'

35 Jesusa' çxhab walasu çxhab le'çxkwesu judi-uwe'sx pkhaakheni yat iisa kaapiya'jnak pekũju'. Sa' Dxus jxkaahwa'ja'swa pta'sxna vxite' wee ma'wêstate nasa ãça'satxwa nuykatxhina kĩh akatxwa jxuka kaykase'je'k.

³⁶ Sa' Jesusa' txãa nasatx thegçxa', txãawe'sxtxi peeygãjk txã'wẽ nxusna çxhãçxhameekuẽ piisxáa namu ji'phmeesa na'wẽ ũspa'ga.

³⁷ Sa' txãa yakh u'jusawe'sxtxi na'wẽk we'we:

—Isath we'we', mjïia' seena' wala', nawa mjïisa yu' kuh meeta'.

³⁸ Txãa pa'ga mjïi namu's mpëjxwe mjïiwa'jsa kaakhan jïk.

10

Doce nasa Jesus txhitxhni

(Mr 3.13-19; Lk 6.12-16)

¹ Txajũ' Jesusa' txãa yakh u'jusa docesatx pa'yaçxa na'wẽ yũuya' ãjawa'ja'sku ũs: eçxtxi nasa ũusuh kutxi'jna kïh weete ãça'satxwa nuykatxhina, kïh aka ji'phtewa jxuka yu'çe'jya' ãjawa'ja'sku ũs.

² Txãa docesawe'sxa' na'wẽtx yaase yu': Nyafx-tewe'sxa' Simonku yu', txã'sa' Pedro jï'tx. Vxite' txajx nyakh Adres. Vxite' Zebedeo nçxi'ktxi yu', Jakobo Juan pxakhsa.

³ Vxite' Fxeliipe, Bartolomé, Tomás, vxite' Mateo gobierno jïi vxyu pkhakhsa. Vxite' Alfxeo nçxi'k Jakobo, vxite' Lebeo txã'snaiçxáa Tadeo jï'tx.

⁴ Vxite' Simonku yu', kananista nasa. Vxite' Judas Iskariote, Jesusa's açesawe'sx kusete dukhwa'jsa.

Docesatx Dxus yuwe's pta'sxya' kaahni

(Mr 6.7-13; Lk 9.1-6)

5 Txãa yakh u'jusa docesatx Jesusa' na'wêk neewe'weçxa kaah:

—Judiu ji'jmée vxite nasa kiwesu' u'jnuwe, sa' Samaria kiwesu çxhab ũstxna kxsũwa u'jnuwe,

6 wejxwa Israel ji'j piisxakuẽ na'wê jxpubana ũsta' kxsũçxáa me'jwe.

7 Sa' pta'sxine'kwe Dxus jxkaahwa'j ena' ãjxã'kh jĩna.

8 ãça'satxwa nuykatxhine'kwe, uusaatxwa ki' ãtxi vxitune'kwe, wã'jy wee kazx ji'phsatxwa nuykatxhine'kwe. Eçxtxiwa nasaa ũusuh kutxi'jine'kwe. I'kwe'sx txã'wê ãjawa'ja's vxyupa'gamée i'kwe jxpa'ga na', nuykatxhipa'ga vxyu pêjxmeene'kwe.

9 Kĩh vxyu yuhwa jxũmée me'jwe.

10 Ya'ja, spaatu, khãabu txãaçxáa yuhtxwa jxũmée me'jwe, naasáa teeçx kmiisaçxáa jxũçxa me'jwe, txãa pa'gatey mjĩisa' puuçni fxi'zewa'jsa'.

11 I'kwe'sxa' çxhab wala meeçxa' çxhab le'çxkwesu mtee pa'jçxawa, kxtee paadejene'kwe nasa ewsa tasxsu, vxite ahte u'jwa'j en ãhpkaçx.

12 Yatte pa'jçxa, ewçxáa we'wena weçxana pa'jane'kwe.

13 Txãa yatte nasa ew jxpa'gate', Dxus yakh weçxana fxi'zewa'ja's pta'sxine'kwe. Nawa txã'wê yũumeete', pta'sxmeene'kwe.

14 Sa' i'kwe'sxtxi jxpa'gamée, pta'sxni'swa wẽse'jya' wa'lte', yatte ma'k yuu meeçxa' çxhabte ma'k yuu nawa txajũ kasejeççxa', i'kwe'sx çxidate kiwe tuhda's sakweekweçxa kasejene'kwe kxah yuuwesa yuutxna.

15 Isath we'we', Dxus kastigäywa'j en ähte', txã'wẽ yũusa nasa' seena' yuh ya'kastigaĩtxna, Sodoma Gomoçxa çxhabsu nasate jxthaakwe.

I'kwe'stxxi açewa'j en pa'jana

16 Mwẽese'jwe, adxa' i'kwe'stxxi piisxakuẽ na'wẽ kajaçthu yu'kh eçx ksxavxysu. Aça' i'kwe'sxa' ikhwe'sxte ul na'wẽ jxpa'yakx mfxi'zewe, nawa iideewewa'j yu'sa' ji'phmée tub çxihme na'wẽ myuuwe.

17 Mpa'yajkxwe, txã'wẽme' nasa' i'kwe'stxxi uweçxa khuẽswe'sx tasxte dukhetxna, sa' judi- uwe'sx pkhaakheni yat-suwa pâpatxna.

18 Kxsũçxáa kuutxa'jmée ne'jwe'sx tasxsu vxite' jxkaahsa tasxte yuhwa pe'jna u'jni yuune'kwe, adx yuwe's pta'sxpa'ga. Txã'wẽ yũutewa, kxsũwa txãawe'sx dxi'pte tuuthe'jeiĩçxáa ne'kwe adxa's vxite' judiu ji'jmeesa dxi'ptewa.

19 Txã'wẽ khuẽswe'sx tasxsu kuutxa'the', kuh yaakxnuwe, açxha' çma'wẽ pasukxtha'w? sũhna. Txãa pa'gatey txã'wẽ yũuçpkaçxha', Dxusa' i'kwe'stxxi kaaũusuthe'jena ma'wẽ paswa'ja'swa.

20 I'kwe'sx ũus yaakxniju we'wemeene'kwe; Dxus Espiritu i'kwe'stxxi kwe'we'jena.

21 Peekx nwe'sxiĩçxáa txãawe'sx nyakhtxi ahçeçxa kiikhe'jetxna. Aça' neywe'sxa' peekx nçxi'ktxi ahçeçxa kiikhe'jetxna, naapkaçxha' nçxi'kwe'sxa' neywe'stxxi ahçeçxa kiikhe'jetxna.

22 Adxna nwẽese'pha'ga naa kiwete nasa jxukay i'kwe'stxxi açetxna. Txã'wẽtewa,

ũukhmée çxhãçxha uu entepkaçx fxi'zesa' txãawe'sx ũusa' Dxus nwe'weni yuutxna.

²³ Txã'wē ahçeçxa ikhya' pakweeçpkaçxha', txãa çxhabuh kasehçxa vxite ahte me'jwe. Isath we'we', i'kwe'sx txã'wē Israelwe'sx çxhabsu jxuka pekũhmeyna, Dxus Nçxi'k Nasa Yuusa' kīijana.

²⁴ Piyasa' maa yuhwa kaapiya'jsate jxthaak-wemeeta'. Txã'wē selpisa' patronte jxthaakwe-same'.

²⁵ Kaapiya'jsa ma'wē pkxuuni yuute', piyasaawa txã'wēy nxuswa'ja's jxpa'gawa'jsata'. Aça' selpisaawa patron ma'wē pkxuuni yuute', txãawa txã'wēy nxuswa'ja's jxpa'gawa'jsa'. Yat namu's Eçxthē'j jīna kxsusçxa', txajx jxpe'jnisa yuutxi' wejx txã'jīna we'wetxna.

*Kimna wejx ũukhwa'jkx
(Lk 12.2-9)*

²⁶ Txã'wē yūutewa, nasatxi' ũukhnuwe. Adx we'weni' kīh yuhwa txã'wē paaçte yu' neeyūuwa'jsame', sa' kīh yuhwa txã'wē sūthçxa jiyunimée yu' neeyūumeena.

²⁷ Adxa' i'kwe'sxçxáatxthu we'we', nawa txãa we'weni's nasa ma'wēsatzwa jxuka áate mwe'wewe. Sa' naa ja'date ayteçxáa we'weni's msuuwa jxuka mwe'wewe.

²⁸ Kakweçxá's ikhsa's ũukhwa'jme'. Txãawe'sxa' ũus yu'sa' ikhya' ājameetxna. Wejxwa kakwe petx ũus yā'jçxa infxiernote kaajxa' ājawa'jsa's wejx ũukhwa'ja'.

²⁹ E'z vxixçakwetx teeçx centawote çtxweyu'çyuhmeetxna' wakx? Txã'wē

pa'gameekwesaçxawa, maa yuhwa kiwekhẽ wete'çmeeta', i'kwe'sx Tata' txã'wẽ jxthãasmeete yu'.

³⁰ I'kwe'sx dxikthete dxkhas yuhwa jxuka isani ũsta'.

³¹ Ũukhnuwe, i'kwe'sxa' txãa vxiçxakwete jxthaakwe pa'gasai'kwe.

³² Maawa ũukhmée adx ju'gu we'wesatxi', adxwa adx Tata cielute ũsa' txajx tasxte txãawe'sx ju'gu we'we'nja.

³³ Nawa maawa nasatx ũukhçxa adxa's jiimeeth jĩna ĩsxijana txã'sa' adxwa txã'wẽyçxãa jiimeeth jĩna we'we'nja adx Tata cielute ũsa' txajx tasxte.

*Jesusa' nasatx kaapui'jsa na'wẽ yuuni
(Lk 12.51-53; 14.26-27)*

³⁴ Naa kiwete yahçemée fxi'zewa'ja's nvxiht-ya' kĩhmeeth, nxuste yahçena fxi'zewa'ja's nvxiht-ya'th kĩh.

³⁵ Adxna nwēese'pha'gaçxãa neya' nçxi'ka's açena, naapkaçxha' njĩ'ja' niisa's açena, açã' swegra' nkuēmyu's açena.

³⁶ Txã'wẽ adxna nwēese'pha'ga peekx yat-tewe'sxiçxãa yaaçeni fxi'zetzna.

³⁷ Maawa adx yu's yajkxmée naasãa ney vxite' njĩ'j txãawe'sxçxãatx jxthaakwe yaakxsa', adxa's selpiiya' ajameetxna. Txã'wẽy maawa adx yu's yajkxmée naasãa nçxi'k vxite' niisa txãawe'sxçxãatx jxthaakwe yaakxsa' adxa's selpiiya' ajameetxna.

38 Makwe thēysa uuwa'jma'k pa'j nawa txāatxi' yajkxmée fxi'zesame' adx tasxte selpiiya' ājameena.

39 Naa kiwete peekx ĩtxi fxi'zewa'jçxá's ya'nwe'wesa', cielute fxi'zewa'j thaakwe ewsa yu'sa' ivxiituna. Naapkaçxha' adxna nwēese'pha'ga naa kiwete ĩtxi fxi'zeni's yajkxmée ivxiitusa' cielute ĩtxi fxi'zewa'j yu'sa' ivxiitumeena.

Dxus peesni's jxpa'gawa'jsa
(Mr 9.41)

40 Maawa i'kwe'sxtxi wa'lmée jxpa'gasa', adx-nawa jxpa'gasaçxa txā'wē yuuna. Sa' adxna jxpa'gaçxa', adxna jxkaahsanawa jxpa'gasa yu-una.

41 Dxus yuwe pta'sxsa txāawe'sxa' Dxus jxkaahnisata', aça' maawa txāawe'sxtxi wa'lmée ew jxpa'gasa', Dxus peesni's jxpa'gawa'jsata', Dxus yuwe pta'sxsatx peesni's ĩçxáa. Sa' nasa ewsatx jxpa'gasa' ewsaçxa txā'wē yuuna, sa' nasa ewsatx dewenisa's ĩçxáa jxpa'gana.

42 Isath we'we': Adxna nwēese'jsa makwe wala āhmeekwesatewa txā'sna yu'fxizeçxáawa yussa' dewenisa yuuna.

11

Juan Bautista yuwee kaahnisa
(Lk 7.18-35)

1 Jesusa' ma'wē yūuwa'ja'swa txāa yakh u'jusa docesatx pta'sxna jxā'jçxa', txajū kasehna u'kh txāa kiwesu çxhab le'çxkwesu kaapiya'jya'.

² Aça' Jesus txã'wẽ yũuni's Juan Bautista kx-uuphni ũsçxa jiyuçxa', txajx jxpe'jnisatx Jesus tasxna kaakh

³ na'jĩna pějxya':

—Kristo naa kiwete kũiwa'jsa ũsu'k idxa' ¿txãa dxihgá', meeçxa' vxite ũythasuwá'nja'w? jĩte',

⁴ Jesusa' na'wẽk pas:

—U'jçxa Juana's pta'sxine'kwe adx na'wẽ yũuna fxi'ze'th txã'sa' yafxju uyi'kwe sa' kaapiya'jni'swa wẽse'ji'kwe txã'sna:

⁵ uyya' ãjasameewa uyu'tx, legsawa katxhiçxa legmeetx neeyũ', wã'jy wee kazx ji'phsawa katx-hinitx neeyũ', wẽse'jya' ãjasameewa wẽse'jya' ãja'tx, uuniisawa ki' ĩtxi yu'tx, sa' naa kiwete pxthaakuẽesa yuutxi' Dxus tasxte pa'jwa'ja's pta'sxnik yuu jĩne'kwe.

⁶ Aça' adxa's kuh yajkxna jxpubasamée yakh yu' wala yuh weçxa yuja'.

⁷ Txajũ' txãa pẽysa Jesus tasxu u'the', Jesusa' Juan ma'wẽsatewa pta'sxku kxtee wẽse'jsa nasatxi' na'jĩna:

—Nasa u'pnimée kiwete', i'kwe'sxa' ¿kĩhnakwe thegya' u'j? ¿Khĩih tasx wejxate ěse'sesa's wá'kwe thegya' u'j?

⁸ Kxte' ¿kĩh ũski sũhçxakwe thegya' u'j? Meeçxa' ¿teeçx piçthě'j ropa zhiçxkwesa athçxa u'pna sũhçxa wá'kwe thegya' u'j? I'kwe'sxa' peekx jii i'kwe txã'wẽ ropa zhiçxkwesa athsa' jxkaahsawe'sx yat-suçxáatx u'pu'.

⁹ Kxte' ¿kinnakwe uy? Dxus yuwe pta'sxsa's wá'kwe uy. Isa txã'sna yuh uyne'kwe, nawa Dxus yuwe pta'sxsa maatewa jxthaakwesa's i'kwe uy.

10 Txã'sna we'weçxak Dzus librute na'jĩ':

Adxa' yuwee pta'sxsa kajaçthu iidx yaçte,

Iidx pa'jwa'ja's pheu'khan jĩna fxi'jni'.

11 Isath we'we', naa kiwete maa nasa yuhwa Juan Bautistate jxthaakwe walasa yu' kasehnimeeta' ãçxpkaçx. Makwe txã'wētewa, ãçxh naa en-suwe'sx maatewa jxthaakwe le'çxkuēesaçxawa Dzus jxkaahnite u'kasa' Juan Bautistate jxthaakwe walasata'.

12 Juan Bautista pa'jniñũjx Dzus jxkaahni ena' açeni ũsa' ãçxpkaçx, txãa pa'gatx kaak-nayu'jya'mée çxhãçxha puiina fxi'ze'.

13 Nawa Dzus jxkaahwa'j ena's Moises ley vx-ite' Dzus yuwe pta'sxsa txãawe'sxa' txagaçxhíitx pta'sx Juan Bautista pa'phkaçx.

14 I'kwe'sxa' jiyu wēeçxa', jxpa'yakx mwēese'jwe: na'wē Dzus yuwe pta'sxsawe'sx we'weçxa', Dzus jxkaahwa'j en ãjaçpkaçxha', Elias pa'jana jĩ'tx txãak yu' Juan Bautista'.

15 Na'wē pta'sxya'wath txã'sna wēese'jwa'jsa ũsçxa', mwēese'jwe.

16 Naa ensu nasatxi' ¿ma'wē kaaja'da'the wejx ewki? Nawa txãawe'sxa' luuçx le'çxkuē na'wēsata': luuçxçxáatx plaasasu pweesa'jya' kaçxçxa', txãawe'sx namikutx na'jĩna sus we'we':

17 Zhiçxkwetha'w kuvxí', nawa ku'ju'çmeei'kwe. Sa' nxus nxustha'w memu', nawa ũ'ne'çmeei'kwe jĩnatx we'we'.

18 Txã'wēsaçxa i'kwe Juan Bautista's na'wē we'we': Eçx ji'phçxak txã'wē ũ'we'çmée, sa' vxinowa tudxi'çme' jĩna i'kwe açewe'we'.

19 Txãa e'su Dxus Nçxi'k Nasa Yuusáa pa'jçxa txã'wẽ ù'na tudxna yuute', na'wẽi'kwe açewe'we': Wala pũ'we', sa' txã'wẽyku wala tudxi'. Pkalsawe'sx vxite' gobierno jĩi vxyu pkhakhsawe'sx yakh namiku' jĩna i'kwe açewe'we'. I'kwe'sxa' jiiimeeçxai'kwe txã'jĩ'. Nawa maawa jiyuwa'jsa yuutxi' Dxusa' kaajiyu'juna adx ma'wẽsatewa jĩk.

*Çxhab nwẽese'jsamée yakh ùukhũukhsa
(Lk 10.13-15)*

20 Txajũ' Jesusa' juuna'k we'we maa çxhabsuçxahne' wejx wala txã'wẽ kim yuhwa ãjanimeesa's kaavxya'ja'jna ùsu' kxsũuwe'sx nasatx. Txãa nasa' pkaltxi nvxihtçxa Dxus tasxte sxawedmeene'ta naa pa'ga na'jĩk:

21 —Korazín çxhabte nasa vxite' Beçaida çxhabte nasa txãawe'sx yakha' wala yuh seena' ùukhũukha'. Txã'wẽ Tiro çxhabte nasa vxite' Sidon çxhabte nasa txãawe'sx ksxavxysu txã'wẽ kim yuhwa ãjanimeesa's kaavxya'ja'jwaça', txãawe'sxa' pkaltxi nvxihtçxa Dxus tasxte sxawedni yã'j yuutxna.

22 Nawa na'jĩ'th na': Dxus kastigãywa'j en ähte', Tiro çxhabte nasa vxite' Sidon çxhabtewe'sxte jxthaakwe txãawe'sxa' ya'kastigaĩtxna.

23 Aça' Kapernaum çxhabte nasa i'kwe'sx yu' cielute u'kawa'jsa yuhne'tka'w ¿sũju'kwe'? Txã'wẽmée wejx infxiernoteçxáa u'jwa'jsa i'kwe. Txã'wẽ Sodoma çxhabte kim yuhwa ãjanimeesa's kaavxya'ja'jwaça', txãa çxhaba' açxpkaçx ùs yuuna.

24 Txãa pa'ga na'jĩ'th na': Dvus kastigãywa'j en ãhte', Sodoma kiwesu nasate jxthaakwe i'kwe'sxa' ya'kastigaĩne'kwe jĩk.

Jesus tasxte jxkaaseya' pa'yani
(Lk 10.21-22)

25 Txãa ensu' Jesusa' na'jĩnak Dvus yakh puutx we'we:

—Tata, cielute vxite' naa kiwete jxkaahsa idxa' txakwe wala kĩhtewa jxuka jiisawe'sx yuutxi' kaajiyu'jmeeçxawa, pxthaa ãhmeekwesa yu-utxi' kaajiyu'jg, txãa pa'gath txakwe wala weçxá' idxa's.

26 Idxa' txã'wẽg yũu, iidx jxthãasni' txã'wẽne' yu' naa pa'ga.

27 Adx Tata' kĩhnawa jxuka adxçxaçxáanak dukh. Nawa Dvus Nçxi'k ma'wẽsatewa kim yuhwa ew yu' jiimeeta', naasáa adx Tata yuuçxáa jiia'. Txã'wẽy kim yuhwa ew yu' jiimeeta' adx Tata's, naasáa Nçxi'k yuuçxáa ew jiia' Neya's. Txãasak maawa jiyu wẽesa yuutxi' Nçxi'ka' kaajiyu'ju' Ney kimtewa.

28 Maawa ũuste wẽtmée wahtxna fxi'zesa' adx tasxte myuhwe jxukaysa, aç'a' adxa' weçxana thẽymée fxi'zewa'ja's ũsu'nja.

29 Adx jxkaahni's wa'lmée jxpa'gaçxa, adx na'wẽy fxi'zeya' mpiyawew, txãa pa'gatey adxa' juuna'meekwe ũusuh jxuka peeygãhnath jxkaaja'. Txãa pa'ga weçxana thẽymée fxi'zewa'ja's ji'phune'kwe.

30 Adx jxkaahni' walame', sa' nwẽese'jwa'jwa thẽyeesata' jĩk.

12

Jxkaase entewa skuutxhtxi çxuktedeçxa ũ'ni
(Mr 2.23-28; Lk 6.1-5)

¹ Txãa ensu' Jesusa' skuutxh ehsuk skhẽuuç yu' sapatu jxkaase ente. Aça' txãa yakh u'jusawe'sxa' wẽeçxa skuutxhtxi çxuktedeçxa ũ'tx.

² Txã'wẽ yũute', fxariseowe'sx uyçxa' na'wẽtx we'we Jesusa's:

—¿Uyu'gá' idx yakh u'jusawe'sxa' na'wẽ yuuçta' mjii enmée jxkaase entewa? jĩte',

³ Jesusa' na'wẽk pta'sx:

—I'kwe'sxa' ¿iilẽeymeewá'kwe? Teeçx ente' Davxida' txãa yakh u'jusawe'sx yakh wẽeçxa' na'wẽk yũu:

⁴ Dxuus yatte u'kaçxa', kxtee pantxi ũ'k txãatxi' kim yuhwa ũ'wa'j ji'phmeeta' naasáa sacerdote yuuçxáatx ũ'wa'jsa yu'.

⁵ I'kwe'sxa' Moises leytewa ¿iilẽeymeewá'kwe? Kxte pta'sxçxa', dxuus yatte sacerdotewe'sxa' jxkaase'çmeeta' makwe jxkaase entewa jĩ'k. Txã'wẽ jxkaase ente jxkaasemeete', pkalna ¿sũju'çmeekwe'?

⁶ I'kwe'sxa' mjiiyuwe: Ayte' dxuus yatte jx-thaakwe jxtuhthesa ũsa'.

⁷ I'kwe'sxa' jiyu'çmeewá'kwe Dxus libroute na'jĩ'k: Vxitetx peeygãaniçxá'sthu adxa' jxthãasu', tajkx ikhçxa altalte kabni's peejxmeeth jĩ'k. Txã'jĩni's jiyuwaça', kwe'sxtxi' ũusaçxana açewe'wemeene'kwe, txã'wẽçxáa yũunisa' pkalme' naa pa'ga.

⁸ Txãa pa'gatey sapatu jxkaase entewa Dxus Nçxi'k Nasa Yuusáa jxkaahwa'j ji'pha' jĩk.

Teeçx piçthē'j txajx kuse udxnisa
(Mr 3.1-6; Lk 6.6-11)

⁹ Jesusa' txajū u'jçxa', judiuwe'sx pkhaakheni yattek u'ka.

¹⁰ Kxteea' teeçx piçthē'j teeçx kuse udxnisa kēese'jya' ājasameek u'p yu'. Aça' Jesusa's ewmēe vxit wēeçxa na'wēt̄x pējx:

—Jxkaase entewa nuykatxhite ¿ewmanx? jīte',

¹¹ Jesusa' na'wēk pas:

—I'kwe'sx teeçx piisxáa ji'phte' txāa piisxá' jxkaase ente ewmeekhē khēete', ¿u'jçxa kutxi'jmeema'kwe jxkaase entewa?

¹² Nasa' piisxaate jxthaakwe pa'gasa', aça' wejx txā'wē ew yūuwa'ja' makwe jxkaase entewa.

¹³ Txā'wē pasçxa txāa piçthē'ja's na'wēk we'we:

—Kuse's mku'le'j jīte', txā'wēy yuuk, naap-kaçxha' txajx kuse' ewuuk ka'tuwe'sx na'wēy.

¹⁴ Aça' fxariseowe'sxa' kasehçxa Jesusa's ikhya' puutx we'wetx.

Jesus ma'wēsatewa nyafxiitey pta'sxni

¹⁵ Txā'wē yūuçte Jesus jiyuçxa', txajū kasehna u'kh, aça' nasa wala u'jtx txāa yakh. Jesusa' āça'sa ma'wēsatewa jxukak nuykatxhi,

¹⁶ nawa kim yuhtxwa pta'sxkaahme' nuykatx-hisa kimtewa.

¹⁷ Dxus yuwe pta'sxsa Isaias we'weni kxtey yuukahñçxáak txā'wē neewe'we. Isaiasa' na'jīk:

¹⁸ Adxna selpiwa'jsa naa piçthē'ja'sthū txhitxh. Txāasa peeygāhna weçxana ūsthu, Sa' adx Espiritu's ūsu'nja,

Aça' adx ew yūuwa'ja's pta'sxina maa nasatxwa jxuka.

19 Txã' puiwameena, sa' āate susnawa fxi'zemeena.

Txãa pa'ga txajx we'weni' kīh yuhwa pthūusemeena klxiikhunsu.

20 Makwe pxthaa āhmeekwesatewa txã' ahçemeena,

Sa' çxhãçxha fxi'zewa'ja's ji'phmeeyã'thewa, txã' ivxiitumeena,

Naa kiwete zhiçxkwe txajx jxkaahwa'j en āhpkaçx.

21 Aça' nasa' ma'wēsawa jxuka txã'sçxáana ũythasutxna jī'k.

Dxus Espiritu's açewe'weni

(Mr 3.19-30; Lk 11.14-23; 12.10)

22 Txajū' Jesus tasxte jxūna pa'jtx uyya' ājasamée we'weya'wa ājasamée eçx iiyamunisa's. Aça' Jesusa' nuykatxhite', txãa piçthē'ja' uyya' ājak, sa' we'weya'wa ājak.

23 Txã'wē yūute', nasa jxukaysa ũukh yajkxna na'wētx kuh jwed we'we':

—Naa piçthē'ja' Davxid Nçxi'k íina jī'tx.

24 Txã'jīni's fxariseowe'sx wēse'jçxa', na'jītx:

—Naa piçthē'ja' eçxtxi nasaa ũusuh kutxi'jī'k nawa eçxthē'j pu'çxteçxáak txã'wē āja' jī'tx.

25 Txã'wē yajkxna ũste Jesus jiyuçxa', na'wēk we'we':

—Maa kiwetewa gobierno' peekx nasatxiçxáa ahçeçxa puiiçxa', çxhãçxhameena. Txã'wēy çxhab ma'k yuu meeçxa' teeçx yattewe'sx ma'tx yuu nawa puutx yahçena puiiçxa', puutx pçuutxna.

26 Txã'wěy eçxthě'jwa txajx jxkaahnisa eçx yakhíçxáa puiiçxa', çxhãçxhamée puutx pçuutxna.

27 I'kwe'sx adxna we'weçxa', eçxthě'j pu'çxteçxáak eçxtxi kutxi'ji' jīna i'kwe we'we'. Aça' txã'wě dxihte', txã'wě i'kwe'sx yakh u'jusawe'sxwa eçxtxi kutxi'jya' aja'tx jī'i'kwe aça' txã'wě ajawa'ja's çkimki'k ūs? Txã'wě i'kwe'sx yakh fxi'zesaiwa āate kaajiyu'ju'tx i'kwe'sx jxpubani's.

28 Adxa' eçxtxi kutxi'ji'th Dxus Espiritu pu'çxte'. Nawa i'kwe'sxtxi Dxusçxaçxáa jxkaahwa'j en āhne' txāa pa'ga ne'tka txã'wě yū'.

29 Maawa piçthě'j çxhãçxhasa iiyamuni's kusa'jya' u'jçxa', txāa piçthě'j çxhãçxhasa khuē'yna tudmeeçxa yu', kusa'jya' ajameena. Txā's khuē'yna tudçxa yuuçxáa kusa'jya' ajana.

30 Adx ju'gu yuusame' açesaçxa txã'wě yu-utxna. Sa' adxa's pu'çxsame', yupsaaçxa txã'wě yuutxna.

31 Na'jī'th na', nasa kīhwa ewmée yūuni kīhwa Dxusna ewmée nuywe'wetewa txāatxi' jxuka ya'peltunaīna. Nawa Dxus Espiritu's açewe'wete', bagaçxte yuhwa peltunāywa'jmée yuuna.

32 Sa' maawa Dxus Nçxi'k Nasa Yuusa's ewmée nuywe'wesa's peltunāywa'j yuuna. Nawa Dxus Espiritu's ewmée nuywe'wesa yuuçxáana pel-tunāywa'jmée yuuna naa kiwete cielutewa.

*Ma'wě fxi'zeni'swa uyçxak ya'jiyu'
(Lk 6.43-45)*

³³ Fxtũu tasx ewsa' ewku yũnu'. Nawa fxtũu tasx ewmeesa' ewmeek yũnu'. Fxtũu tasx ma'wēsatewa yũnte yuuçxáak ya'jiyu'.

³⁴ Ewmeesa luuçx i'kwe'sxa' ĵma'wē ew we'weya' ājaki'kwe, ũuste yuu ewmeesa ji'phçxa'? Txāa pa'gatey ũuste yaakxni'sku ya'we'we'.

³⁵ Nasa ewsa' ewsaçxá'sku we'we', txajx ũuste' ewsaçxá's ji'phna naa pa'ga. Naapkaçxha' nasa ewmeesa' ewmeesaçxá'sku we'we', txajx ũuste' ewmeesaçxá's ji'phna naa pa'ga.

³⁶ Adxa' najĩ'th na': Dxus kastigãywa'j ente' jxuka pta'sxi ji'phutxna kĩhwa jxuka ewmée we'weni's.

³⁷ Idx ma'wē we'weni'swa jxuka paapēyni yuuna, txajũ yuuwema'g yuu meeçxa' yuuwe-meema'g yuu nawa ya'jiyuna.

*Nasa ewmeesa' cieluju kĩhçxáawa
kaavxya'ja'khaahni*

(Mr 8.12; Lk 11.29-32)

³⁸ Txajũ' fxariseowe'sx vxite' ley kaapiya'jsawe'sx Jesusa's na'jĩnatx pējx:

—Txã'wē kim yuhwa ājanimeesa's kwe'sxtxi mkaavxya'ja' jĩte',

³⁹ Jesus pasçxa':

—Nasa ewmeesa ĩsxiisawe'sxa' kim yuhwa ājanimeesa'stxi kaavxya'ja'khaja'. Nawa txã'wē yũumée Dxus yuwe pta'sxsa Jonas fxi'zeniçxáana ya'pta'sxina.

⁴⁰ Jonaswa ma'wēga wedx tutxhte tekh en tekh kus u'pu', txã'wēy Dxus Nçxi'k Nasa Yuusaawa tekh en tekh kus kiwe dxiiga ũsuna.

41 Dxus kastigäywa'j en ähte', Niniwe çxhabetewe'sxa' naa ensuwe'sxtxi' ewmeete nvxiitutxna, txãa pa'gatey Jonas Dxus yuwe's pta'sxiçpkaçxha', Niniwetewe'sxa' pkaltxi nvxihtçxa wa'lmée Dxus tasxte utxaatx. Aça' ayte' Jonas na'wësaçxáamée jxthaakwesa üsa', nawa txãa yu'sa' wa'lu'tx.

42 Txã'wëy Dxus kastigäywa'j en ähte', jxu'j kiwete jxkaahsa u'ya' naa ensuwe'sxtxi' ewmeete nvxiituna, txãa pa'gatey txã'wë jxu'j kiwe-juwa txãa u'ya' yuwe'k Salomon pta'sxnixá'swa wa'lmée wëse'jya'. Aça' ayte' Salomonte jxthaakwesa üsa', nawa txãa yu'sa' wa'lu'tx.

Eçxa' nasa üuste ki' sxawedni

(Lk 11.24-26)

43 Eçxa' nasa üusuh kasehçxa kiwe uhdxsu pekühna u'juçxawa u'pwa'j uymeeçxa':

44 Sxawedu'nja kasehth txãa yatnay süju'k. Txajü' sxawedna pa'jçxa', txãa piçthë'ja's uyuuna yata's ma'wë ew pheu'jçxa padçxa txaahni üs yuukx txã'wë.

45 Txajü' u'jçxa vxite siete eçx txãate jxthaakwe ewmeesatx jxūna pa'jçxa txãa piçthë'j üuste jxuka khëjetxna, aça' txãa piçthë'ja' iiméh jxthaakwe ewmeesa yuuna. Txã'wë yuuwa'j en pa'jana naa nasa ewmeesatxi' jik.

Jesus njĩ'j vxite' txajx nyakhwe'sx

(Mr 3.31-35; Lk 8.19-21)

46 Jesus txã'wë nasatx we'wena üsiyna, njĩ'j vxite' nyakhwe'sx txãa yakh we'weya' pa'jçxa ekate üsu'tx.

47 Aça' kxte üssa teeçxsa' Jesusa's pta'sxku:

—Iidx mama iidx nyakhwe'sx idx yakh puutx we'weya' pa'jçxa ay ekate ũsta' jĭte',

⁴⁸ Jesusa' na'wĕk we'we pta'sxsa's:

—Adx mama adx nyakhwe'sxa' kimtewa ji-imeewá'kwe jĭçxa',

⁴⁹ txãa yakh u'jusawe'sxtxi kuseju vxijxaçxa:

—Naawe'sxçxáa adx mama, adx nyakhwe'sxta'.

⁵⁰ Txãa pa'gatey maawa adx Tata cielute ũsa' txajx jxthãasni's kxtey yuusaaxçxáa txã'wĕ adx nyakh, adx npe'sx, adx mama na'wĕsata' jĭk.

13

Skuutxh uuhsa's kaaja'da'jni

(Mr 4.1-9; Lk 8.4-8)

¹ Txãa enteyiçxáa Jesusa' yatuh kasehçxa ĭkhwala pukate ũsya'k u'j.

² Aça' txajx ũsnite wala nasa pkhaakhete', Jesusa' barkotek khĕe. Aça' nasa yu' ĭkh pukatee neeyũutx.

³ Txajũk wala kaapiya'j ejemplo kaaja'da'jçxa na'jĭna:

—Skuutxh uuhsa' ujxa' kasejk.

⁴ Aça' uhna u'jweçte', msuuíi yu' dxi'jsutx ũsxi skuutxh fxiwa'. Aça' vxiçxakwe pa'jçxa skuutxh fxiwtxi ũ'tx.

⁵ Vxite ahsu' kwet kajkwesutx ũsxi, kiwe we-jkuĕçxáa ji'phsu. Aça' kxsũ ũsxisa' wala dud buçxatx kiwe walameene'ta ya'fxihb txãa pa'ga.

⁶ Nawa sek açxaate' jxuka uhdxtxi, iiwehçeya' ãjameene'ta naa pa'ga.

⁷ Vxite skuutxh fxiwa' çhũçh ksxavxysutx ũsxi, açã' çhũçh khuẽ'y walaaçxa', skuutxha's aphçxa ivxiitutx.

⁸ Nawa vxite ahsu' kiwe wala ewsu ũsxitx, sa' wala yũntxi. Maa tasxíi yu' cien, vxite' sesenta, vxite' treinta nxinx txã'wẽtx çut.

⁹ Na'wẽ pta'sxni's jiyuwa'jsa ũsçxa', jiyune'kwe jĩk.

Kĩh yũupa'ga ejemplo yakhçxáa kaaja'da'jçxa pta'sxni

(Mr 4.10-12; Lk 8.9-10)

¹⁰ Txajũ' txãa yakh u'jusawe'sxa' Jesus tasxte utxaaçxa na'wẽtx pẽjx:

—¿Kĩjxa'ga ejemplo kaaja'da'jçxaçxáa nasatx pta'sxi? jĩte',

¹¹ na'wẽk pas Jesusa':

—Dxus jxkaahni ensu ma'wẽ yũuwa'ja'swa kim yuhwa jiyunimeesa's i'kwe'sx yuutxi's kaa-jiyu'jwa'ja'. Nawa vxite yuutxi's kaajiyu'jwa'jme'.

¹² Txãa pa'gatey jiyuwa'jsa's jweeíçxáa ãate ya'kaajiyu'juna, wala jiyukahn. Nawa jiyuwa'jmeesa's ya'kaajiyu'jmeena, wejxwa le'çxkweçxáawa jiiwáa yuuna txã's yuhnawa kusa'jni yuuna.

¹³ Txãa pa'gath ejemplo kaaja'da'jçxaçxáa we'we'. Txã'wẽ yuukahníi txãawe'sxa' uyçxawa, uysamée na'wẽ jiyu'çmeeta', sa' wẽse'jçxawa wẽse'jsamée na'wẽ nwẽese'je'çmeeta'.

¹⁴ Txãawe'sx fxi'zewa'ja's Dxus yuwe pta'sxsa Isaias we'weni' kxtey yuuk. Txã' na'wẽk we'we: I'kwe'sxa' wẽse'jewá'kwe, nawa jiyumeene'kwe. Uyuwá'kwe, nawa txãana sũhmeene'kwe.

15 Txãa pa'gatey txãa nasa ũusa' jxuka ewmeesaçxáa yuuna pa'jni'.

Txãa pa'gatx wēse'jya' wa'lu',

Sa' txãawe'sx yafxju uykahmén,

Txãawe'sx thũ'wējuwa wēse'khamen,

Yafx'a' jxuka aphanita' txãawe'sx ũuste ew jiyukahmén.

Txãa pa'gatx adx tasxte pa'ja'çmée adx nuykatx-hikahn ji'k.

16 Nawa i'kwe'sx yakha' wala yuh weçxa yuja' i'kwe'sx yafxju yuu uyi'kwe, sa' i'kwe'sx thũ'wēju yuu wēse'ji'kwe naa pa'ga.

17 Isath we'we', maazkuēesawa Dxus yuwe pta'sxsa vxite' nasa ewsa nyafxiiwe'sxwa uy wēetx i'kwe'sx uyna ũsi'kwe txã'sna, nawa uymeeta'. Wēse'j wēetx i'kwe'sx wēse'jna ũsi'kwe txã'sna, nawa wēse'jmeeta'.

Ejemplo yakh kaapiya'jni's āate pta'sxni

(Mr 4.13-20; Lk 8.11-15)

18 ãçxha' mjiyuwe skuutxh uuhsa's kaaja'da'jçxa pta'sxni's.

19 Naa kiwete Dxus jxkaahwa'ja's pta'sxni's wēse'jçxawa jiyusame', skuutxh fxiw dxi'jsu ũsxisáa na'wēsata': Nasa' Dxus yuwe's wēse'thewa, eçxthē'ja' pa'jçxa ũusuh kutxi'jina.

20 Skuutxh fxiw kwet kajkwesu ũsxisa' Dxus yuwe's wala weçxana jxpa'gasa na'wēsata'.

21 Nawa Dxus yuwe's açxamée çxhãçxha yaakxsa' çxhãçxha'çmeeta'. Txã'wē Dxus yuwe's jxpa'gapa'ga, pkuuwa'j en pa'theçxáa jxuka fxĩykaja'tx.

22 Skuutxh fxiw çhũçh ksxavxysu ũsxisa' Dxus yuwe's wêse'jçxawa naa kiwetewe'sxçxá's wejx wala yajkxna ji'phunisaçxá's pa'pçxusa na'wêsata'. Aça' txã'wêsaçxá's wejx wala ya-jkxte', txãaçxáa jxuka knayu'k Dxus yuwe yu'sa' kaapeçxkana'jna.

23 Nawa skuutxh fxiw kiwe ewte ũsxisa' Dxus yuwe's wêse'jçxa kxtey yuusáa na'wêsata': Skuutxh spiigawa ma'wêga cien vxite' sesenta vxite' treinta nxinx ji'phu', txã'wêyku txãawe'sx ũuste Dxus yuwe' wala pena' jĩk.

Jxũth ewmeesa skuutxh ksxavxyte buçxasa

24 Jesusa' vxite ejemplo na'wêk kaaja'da'jçxa pta'sx:

—Naa kiwete Dxus jxkaahni ente Dxus yuwe ewsaçxá's pta'sxtewa, na'wê yuuna: Teeçx mjĩisa' txajx kiwete fxiw ewsa'sku uh.

25 Nawa jxukaysa dejeçpkaçxha', uuthasx namu's açesa pa'jçxa ũ'nimeesa'sku skuutxh ksxavxyte uhçxa u'j.

26 Aça' skuutxh buçxaçpkaçxha', txãa ksxavxyte jxũth tasx ũ'nimeesawa vxyaak.

27 Txã'wê yũute', selpisaawe'sxa' na'jĩnatx namu's pta'sxya' u'j: Idxa' fxiw ewsaçxá'sgu uh, aça' naa jxũth tasx ewmeesa' ¿ma'wê yũuçxaga buçxa? jĩte',

28 namu' na'wêk pas: Maa açesa uhne'ta jĩk. Txajũ' selpisaawe'sxa' pějtxi: ¿Txãa jxũth tasx ewmeesa's khubeya' u'jmtha'w? jĩte',

29 namu' na'wêk we'we: Kuçx yuunuwe. Txã'wême', petx skuutxh tasx yã'jçxa ya'khubeetxna.

³⁰ Manvxihtwe, peekx walaatxna, skuutxh wakawaj en ähpkaçx. Txãa ente adxa' jxkaaja'nja mjïisatxi', aça' jxüth tasx ewmeesa khuë'yna jxuka khubeçxa tudutxna kabwa'j. Txã'wë yüuçxa skuutxha's adx yatte jxaawu-utxna jïk.

Mostasa fxiwa's kaaja'da'jnisa

(Mr 4.30-32; Lk 13.18-19)

³¹ Jesusa' na'wëk pta'sx vxite ejemplo kaaja'da'jçxa:

—Naa kiwete Dexus jxkaajxa' takhni ena' na'wësa': Teeçx mjïisa' mostasa fxiwa's kiwete ujk.

³² Txãa fxiwa' maa maa fxiwtewa thaakwe le'çxkuëesa'. Nawa buçxayã'jçxa', maa ü'tasxtewa jxthaakwek walá'. Aça' txã'wë seena' walaate', vxixakwe yuhwa pa'jçxa ku'tasu yaatu'tx jïk.

Lewadura's kaaja'da'jnisa

(Lk 13.20-21)

³³ Vxite ejemplo kaaja'da'jçxa na'wëk pta'sx:

—Naa kiwete Dexus jxkaahni ena' na'wë yüuwa'jsa': Teeçx u'y panu'juççxa', tekh libra skuutxh ü'wete lewadura's ka'dte ma'wë jxuka pëethejekx txã'wë yüuwa'jsa' jïk.

Ejemplo yakh kaapiya'jwa'ja's pta'sxni

(Mr 4.33-34)

³⁴ Jesusa' ejemplo kaaja'da'jçxa yuuçxáak pta'sxi' nasa jxukaysatx. Ejemplo kaaja'da'jmée yu', pta'sxi'çme'.

³⁵ Txã'wë yüuwa'ja's Dexus yuwe pta'sxsa na'jïna fxi'kh txãak kxtey yuu. Na'wëk fxi'j:

Kim yuhtxwa kaajiyu'jnimeesa ũsyã'jtx yu' naa kiwe's vxitiyna txã'sna pta'sxi'nja ejemplo kaaja'da'jçxa yuuçxáa jīnak fxi'j.

Jxūth tasx ewmeesa's āate kaajiyu'jnisa

³⁶ Txajū' Jesusa' nasa tasxuh txuteeçxa yat-tek u'ka, aça' txãa yakh u'jusawe'sxa' utxaaçxa na'wētx pējx:

—Jxūth tasx ewmeesa's kaaja'da'jna we'weni's āate mkaajiyu'j jīte',

³⁷ Jesusa' pta'sxku:

—Fxiw ewsana uuhsa' Dxus Nçxi'k Nasa Yu-usá'.

³⁸ Aça' uuthasx jīnisa' naa kiwe'. Fxiw ewsa jīna we'we'th txãa yu' nasa Dxus jxkaahnite ũswa'jsatxthu txã'jī'. Sa' eçxthē'j nasa yuutxi' jxūth tasx ewmeesa jī'th.

³⁹ Aça' jxūth tasx ewmeesa's uuhsa yu', eçxthē'jīçxá'. Skuutxh wakawa'j en jī'th txãa yu' naa kiwe pçuwa'ja'sthu txã'jī'. Aça' ũ'a's pkhakhsa', Dxus angeleswe'sxta'.

⁴⁰ Jxūth tasx ewmeesa's ma'wēta pkhakhçxa ipxte abu' çxhavxykahn, txã'wēy yūuni yuuna naa kiwe pçuute'.

⁴¹ Dxus Nçxi'k Nasa Yuusá' angeleswe'sxtxi kajana txã'wē ewmée yūuna vxitetx pkalte kweete'jna ũssawe'sxtxi txajx jxkaahna ũsnijū kutxi'jçxa

⁴² ipx walate akhkahn. Kxteea' seena' yuh pebeetxna ki'thtxi ksuusu'jna.

⁴³ Naapkaçxha' Dxus jxthāasni's kxtēy yu-usa' sek na'wē eena' kweethetxna Tata cielute

jxkaahna ũsnite. I'kwe'sxa' jiyuwa'jsa ũsçxa', jiyune'kwe.

Iméh pa'gasa's sũthçxa txaahnisa

⁴⁴ Naa kiwete Dxus jxkaahna ũsni ena' iiméh seena' pa'gasa's kiwe dxiite sũthçxa txaahni na'wêsa': Teeçx piçthê'jwa ma'wê txã'wê pa'gasa's uyçxa', ãçxhii yu' jxũna u'jya' ãjameeçxa kxteyçxáa wejx ew sũthçxa txajakx, sa' wala weçxana u'jçxa txajx ji'phuni's jxuka txweyçxa txãa vxyuju kiwe's weyuukx mteene' ewsa's sũthçxa txah txãa kiwe's txã'wêysa'.

Perla iiméh pa'gasa's uyni

⁴⁵ Naa kiwete Dxus jxkaahna ũsni ena' na'wêsa': Perla zhiçxkwesa's weysaawa ma'wê pakweçxa

⁴⁶ teeçx perla iiméh pa'gasa's uyçxa', txajx ji'phuni's jxuka txweyçxa txãa vxyuju perla's weyuukx txã'wêysa'.

Wedx ukhe yakh kaaja'da'jçxa kaapiya'jni

⁴⁷ Naa kiwete Dxus jxkaahna ũsni ente' na'wê yũuwa'ja': Wedx ukhe'swa ma'wê ikhwalakhê akhte', wedx ma'wêsatxwa jxuka pkhakhekx.

⁴⁸ Aça' wedx uwesá' ukhe's tuhmete kutxi'jçxa wedtxi txhitxhya' kaççxa ewsa's kanastate ãsxçxa', ewmeesatxi' ikhwalakhê ãsxitxki

⁴⁹ txã'wêy yuutxna Dxus angeleswe'sxa' naa kiwe pçuwa'j en ãhte'. Sa' txãawe'sxa' ewmeesatxi' ewsa ksxavxyuh txhitxhçxa ipx walate akhetxna.

⁵⁰ Kxteea' seena' yuh pebeetxna ki'thtxi ksu-usu'jna.

Nyafxíi kaapiya'jni'swa jiisa u'sesa'swa jii-sawe'sx

⁵¹ Txã'wē kaapiya'jni's Jesusa' na'jĩnak pējx:

—¿I'kwe'sxa' jxuka jiyukwe' na'wē pta'sxni's? jĩte', txãawe'sxa':

—Jiyuíitha'w jĩnatx pas.

⁵² Aça' Jesusa' na'wēk we'we:

—Dxus jxkaahwa'j ena's jiyusa' ley kaapiya'jsawa ma'wē nyafxíi kaapiya'jni's piyaçxa kaapiya'jni u'sesa'swa jxpa'gaçxa wala jiisa yuukx txã'wēy e'z jwed jiisa yuutxna jĩk.

Jesusa' Nasaretna u'jni
(Mr 6.1-6; Lk 4.16-30)

⁵³ Naa ejemplotx Jesusa' pta'sxna jxã'jçxa', txajũ u'kh txajx kiwen.

⁵⁴ Kxteea' judiuwe'sx pkhaakhenitek kaapiya'jna ũsu'. Aça' nasa' kuh yajxna na'jĩ'tx:

—Naa piçthē'ja' ¿mteeki'k txakwe wala piya txã'wē ājaya'? ¿Ma'wē yũuçxaga txã'wē kim yuhwa ājanimeesa's kaavxya'ja'ja'?

⁵⁵ Naaii ¿karpintero nçxi'k meená', aça' njĩ'ja' Maria meená'? Aça' txajx nyakhwe'sxa' Jakobo, Jose, Simon, vxite' Judas txãawe'sxta',

⁵⁶ aça' txajx npe'sxwe'sxwa ayte kwe'sx yakh ũsta'. ¿Majũki'k piya na'wē kĩhnawa jxuka ājawa'ja's?

⁵⁷ Txã'wē jii'tx yu', txãa pa'gatx Jesus we'weni's kxtey yuumée. Nawa Jesusa' na'wēk we'we:

—Dxus yuwe pta'sxsa' peekx kiwesu vxite' peekx yattewe'sx weeçxni yuuçxáa fxi'zetxna maawa jĩçxa',

58 kim yuhwa ãjanimeesa's jwee yu' kaavxya'ja'jme', txãawe'sxa' txajx we'weni's kxtey nwëese'jmeeta' naa pa'ga.

14

Juan Bautista uuní

(Mr 6.14-29; Lk 9.7-9)

¹ Txãa ensu' Herodesa' Galilea kiwetek ne'jwe'sx yu', sa' Jesus kījkihwa ew yūuni's jiyuçxa',

² txãa yakh ũssawe'sxtxi na'wëk we'we:

—Txãa piçthë'ja' Juan Bautistane' ki' itxi yuu. Txãasane' txã'wë kim yuhwa ãjanimeesa'swa kaavxya'ja'jya' aja' jīk.

³ Herodesa' Juan Bautista's na'wë yūuçxaga ikh: Juana's tudçxa karcelte ktxaaja'kha, nawa Herodes nyakh Fxelipe nyu Herodias pa'gaçxáane' txã'wë karcelte ktxaaja'j.

⁴ Txãa ensu' Juan Bautista' Herodesa's we'weçxa':

—Iidx yakthë'j nyua's kusa'jçxa iidx nyu na'wë jxpe'jwa'j jī'phmeeg jīte',

⁵ Herodesa' Juana's ikhe'nja sūhne'. Nawa nasa jxukaysa Juan ju'guçxaçxáane'ta ũsu', Juana' Dxus yuwe pta'sxsapa'ga. Txãa pa'gane' ũukhçxa ikhmée karcelteçxáa txah.

⁶ Nawa teeçx ente' Herodesa' txajx upxni en anxu ãhte fxiesta vxitte', Herodias niisa' nasa pi'kxnisa dxi'pte wala zhiçxkwe ku'jya' kasehne'. Txãa pa'ga Herodesa' iiméh wala weçxaçxa,

⁷ kīh pējxtewa jxuka ũsu'nja jīnane' puutx we'we txãa kna'sa's.

⁸ Txajũ' njĩ'j yu'kxpehte', txãa kna'sa' na'wẽga pẽjx Herodesa's:

—Juan Bautista dxikthea's plaatute akhçxa ùsune'ga jĩte',

⁹ ne'jwe'sx Herodesa' wala nxusçxawa, txã'wẽ yã'jne' kĩh pẽjxtewa ùsya' puutx we'we nasa pi'kxnisa dxi'pte, txãa pa'ga kxtey yũuya' neeyũuyã'jçxa',

¹⁰ Juan dxikthea's spẽ'thkaahne' karcelte.

¹¹ Aça' dxikthea's plaatute akhçxa ùste', txãa kna'sa yu' njĩ'ja'sne' dukh.

¹² Txã'wẽ yũute', Juan Bautista yakh pi'kxna u'jusawe'sxa' pa'jçxa uuníi kakwe's jxũna u'jçxa pedaane'ta. Sa' u'jçxa Jesusa's pta'sxne'ta.

Cinko mil nasatx Jesus sã'jĩni

(Mr 6.30-44; Lk 9.10-17; Jn 6.1-14)

¹³ Txã'wẽ Herodesa' Juan Bautista's ikhku jĩni's Jesusa' jiyuçxa', barkote khẽeçxa u'kh teeçx ahte kim yuhwa u'pnimeesate pa'jya'. Nawa Jesus mtee pa'jya' u'thewa jiyuçxa nasa çxhabu kasehçxa Jesus pa'jwa'the pakwena u'jtx çxidaçxáa.

¹⁴ Aça' Jesusa' barkoju kasejeççxa' uyku nasa wala kuh ùste, sa' txãawe'sxtxi peeygãhçxa nuykatxhik ãça'satx pe'jçxa nuypa'jnisatxi'.

¹⁵ Txajũ' kusna kĩaçte', txãa yakh u'jusawe'sxa' Jesus tasxte utxaaçxa na'wẽtx we'we:

—Kusuçyã'ja', naapkaçxha' aysu' kim yuhwa u'pnimeesa'. Aça' nasatxi' mkaah çxhabu pa'jçxa kĩhçxáawa weyçxa ù'kahn jĩte',

¹⁶ Jesusa' na'wẽk pas:

—Txãawe'sxa' ũ' weyya' u'jwa'j peejxmeena. I'kwe'sx mpuuçwe jïte',

¹⁷ na'wêtx pas:

—Kwe'sxa' kîhwa wala yu' ji'phmeetha'w. Tahç pan e'z wedxçxáa ji'phtha'w jïte',

¹⁸ Jesusa':

—Txãatxi' mneejxûhwe jïnak jxkaah.

¹⁹ Txajû' nasatx kaçxkaakh txaksû. Sa' tahç pan e'z wedxtxi jxpagaçxa, cielute pagayçxa Dxusa's weçxaçxa pantxi pe'ltedek. Txã'wê yûuçxak txãa yakh u'jusawe'sxtxi ũs, aç'a' txãawe'sxa' ũsu'stxi nasatx.

²⁰ Aç'a' jxukaysa ũ'çxa txikte', doce kanastate utatx kijxasaatx pkhakh.

²¹ Ũ'sawe'sxa' cinko mil piçthê'jtx yu', u'ywe'sx vxite' luuçxwe'sxtxi yu'.

Îkh kajkwega Jesus u'juni

(Mr 6.45-52; Jn 6.16-21)

²² Txajû' Jesusa' txãa yakh u'jusawe'sxtxi barkote yaçte kaakh, sa' txãa yu' kxtee neeyûuk nasa txuteena u'jsatx weçxana.

²³ Txajû' nasa jxuka txuteena u'the', thã'j vxixna u'kh txãaçxáa Dxus yakh puutx we'weya'. Jxuka çxhi'dxni yã'thewa, Jesusa' kxtee nee ũsîçxáak yu'.

²⁴ Naapkaçxha' barko' îkh pxäjÿy u'jweçku yu'. Aç'a' wejxaa wala kiiteçxa, dxi'puh sêhçxa barko's yupku.

²⁵ Aç'a' khikhyna sêjxa'wate', Jesusa' utxaana kûjk îkh kajkwega çxidaçxáa.

²⁶ Aç'a' îkh kajkwega txã'wê yuhte uyçxa', barkote u'jsawe'sxa' ũukhna na'jïnatx sus we'we:

—Eçxa'stha'w uy jïte',

²⁷ Jesusa' na'wêk we'we:

—Ûukhnuwe, adxthu jïte',

²⁸ Pedro we'weçxa' na'jïk:

—Adxthu jï'g na' txã dxihçxa', adxwa txã'wëy ïkh kajkwesu çxidaçxáa yujxa' ãjakahn mkaah jïte',

²⁹ Jesusa':

—Txã'wëçxa' myuh jïnak we'we.

Aça' Pedro' barkojũ sa'jçxa, Jesus tasxte pa'j u'jya' u'jweçku yu' ïkh kajkwesu.

³⁰ Nawa wejxa seena' çxhãçxha ùste', ùukhku. Sa' txã'wë ùukhpa'gaçxáa ïkh dxiikhë khêjeççxa', susku we'we:

—Meen nwe'we jïçpkaçxha',

³¹ Jesusa' pu'kisçxa na'jïk:

—¿Kïjxa'ga Dxusa's yu' yajkxmée, ùukhwa'jçxá's yajkx? jïçxa',

³² Jesusa' barkote Pedro yakh khêjeçpkaçxha', wejxaa wala' jxuka yujuk.

³³ Aça' barkote ùssa' Jesus tasxte peejxükweçxa na'wëtx we'we:

—Isa, idxa' Dxus Nçxi'k yuh yu'ga jïtx.

Genesarettewe'sxtxi Jesus nuykatxhini

(Mr 6.53-56)

³⁴ Ìkhuy ktejkaçxa', Genesaret kiwete pa'jtx.

³⁵ Aça' kxsũ nasa' Jesus pa'jni's jiyuçxa txãa kiwesu nasatx jxuka pta'sxte', nasa' aç'a'satx jxuka Jesus tasxte nuypa'jtx,

³⁶ na'jïna pxthaa we'wena:

—Iidx atxh vxiçteçxáawa makhya'dxi'j jïçxa, txã'wë jxa'dxsa' jxuka katxhiçxatx neeyũ'.

15

Nasa's ewmée vxit-sa
(Mr 7.1-23)

¹ Fxariseowe'sx vxite' ley kaapiya'jsa txāawe'sxa' Jerusalen çxhabu pa'jçxa', maaii yu' na'jĩnatx Jesus tasxte utxāa:

² —Idx yakh u'jusawe'sxa' çkĩh yũuçxata yaçgawe'sx kaapiya'jnitxi' kxtey yu'çmée, txā'wē kusekhē yu' kaahmée ũ'wé'?

³ Txā'jĩte', Jesuswa pējxku na'jĩna:

—I'kwe'sxwa çkĩh yũuçxakwe i'kwe'sx yaçgawe'sx kaapiya'jniçxá's nwēese'jçxa' Dxus jxkaahni yu'sa' kxtey yu'çmée?

⁴ Dxusa' na'wēk jxkaaja': Iidx tata iidx mama txāawe'sxtxi' peeygāhna pu'çxwa'ja'. Aça' txā'wē yũumée neywe'sxtxi açewe'wesa' uu ena's ji'phuna jĩ'k.

⁵ Nawa i'kwe'sxa' yaçga kaapiya'jniçxá's nwēese'jçxa' Dxus jxkaahni yu'sa' kxtey yuumée ũsi'kwe.

⁶ I'kwe'sx yaçgawe'sxa' na'wētx kaapiya'ja': Maa nasawa neywe'sxtxi peeygāhna pu'çxmée, adx ji'phuni i'kwe'sxtxi pu'çxwa'ja's Dxusna dukhe'nja jĩna we'weçxaçxāa, neywe'sxtxi' pu'çxmeetewa ewa' jĩ'tx.

⁷ Yuwejuçxāa ew we'weçxa', ũuste yu' ewmeeçxāa yaakxsai'kwe, aça' Dxus yuwe pta'sxsa Isaiasa' isa yuh Dxus we'weni's na'jĩna fxi'jne':

⁸ Naa nasa' yuweju yu' adxa's yaaki'tha'w jĩçxawa, ũusuh yu' adxa's yaaki'çmeeta'.

⁹ Naa kiwete nasaa kaapiya'jniçxá's kxtey yuuna
 ùsçxa, txã'wẽ Dxus jxkaahni'stha'w kxtey
 yu' jĩte', kxul yuhna jĩ'k.

¹⁰ Txajũ' nasatx pa'yaçxa na'wẽk we'we Jesusa':
 —Jiyuya' mwẽese'jwe.

¹¹ Kĩh ù'wa tutxhteçxáa khẽesa yu', nasatx
 ewmeesa vxitu'çme', naasáa ùsuh ewmée
 yaakxnisa yuuçxáak nasatx ewmeesa vxitu'.

¹² Txajũ' Jesus yakh u'jusawe'sxa' utxaaçxa
 na'wẽtx we'we:

—Idx txã'wẽ we'wete', fxariseowe'sxa'
 ùusaçxanatx neeyũu jĩte',

¹³ Jesus paçxa':

—Kĩh tasxwa adx Tata cielute ùssa uuh-
 nisamée yu'sa' khubeni yuuwa'ja'.

¹⁴ Aça' ùukhnuwe. Txãawe'sxa' yafx
 ji'phmeesa, yafx ji'phmeesa nwe'stxxi pe'jna
 u'jusaçxáata'. Txã'wẽ yafx ji'phmeesa yafx
 ji'phmeesa nwe'stxxi pe'jna u'juçxa', e'zĩi
 kafxkhẽ khẽjetxna.

¹⁵ Txã'jĩte', Pedro' Jesusa's na'jĩnak pẽjx:

—Ejemplo kaaja'da'jçxa we'weni's ãate
 mpeeta'sx jĩte',

¹⁶ Jesusa' na'jĩnak we'we:

—¿I'kwe'sxwa jiyu'çmeewá'kwe?

¹⁷ Kĩh ù'wa tutxkhẽçxáak u'jwe', sa' txajũ ki'
 kaseje'k.

¹⁸ Nawa ùsuh yaakxnisa yuuçxáak nasa's
 ewmeesa vxitu'.

¹⁹ Txãa pa'gatey ùusujk kaseje' ewmée
 yaakxnisa, nasatx ikh wẽenisa, ptamçxawa
 vxitesa yakh fxi'zeni, ma'wẽsa yakhwa pkal

yuuna fxi'zeni, pesweeni, ĩsxiina ewmée nuywe'weni, Dxusna açewe'weni.

²⁰ Txã'wě yaakxnisatx nasa's ewmeesa vxitu'. Nawa kusekhě yu' kaahmée ũ'nisaçxáa yu', nasatx ewmée vxitu'çme'.

*Teeçx u'y judiu jìjmeesa Jesusa's jxpa'gasa
(Mr 7.24-30)*

²¹ Jesusa' txajũ kasehçxa u'kh Tiro vxite' Sidon kiwen.

²² Aça' teeçx u'y Kanaanuwe'sx txãa kiwete pa'jçxa u'psa' Jesus tasxte pa'kh pxthaa we'wena:

—Davxid jì'j, ũ'kwe's meen peeygãh. Ũ'kwe niisa's eçx iiyamute', iiméh wala pxthaa yuuna ũsa' jítewa,

²³ Jesusa' ma'wěçxáa yuhwa pasme'. Aça' Jesus yakh u'jusawe'sxa' Jesusa's we'wetx na'jĩna:

—Kwe'sx e'ste kuçx susna yuukahmen yatna mkaah jíte',

²⁴ Jesusa' na'jĩnak pas:

—Piisxakuẽ na'wě vxituna ũssa Israelwe'sxçxáatxku pakweya' kaah Dxusa' jítewa,

²⁵ txãa u'ya' sxuuna' yuumée utxaana kũhçxa txajx tasxte peejxũkwek:

—Ũ'kwe's meen pu'çx jĩna.

²⁶ Aça' Jesusa' na'jĩnak we'we:

—Luuçx ũ'wa'ja's kusa'jçxa alkutx ũswa'jme'

²⁷ jítewa, txãa u'y pasçxa':

—Isa yuh we'we'g. Nawa alku' pejka ũ'we'tx mesa tasxsu pan pe'la ũsxisaçxáatxwa jíte',

²⁸ Jesus we'weçxa':

—Dxusa' pu'çxyujuna sũhwa'j yuuçxá's i'kwe yaaki', txãa pa'ga i'kwe pěyni' kxtey yuuna

jĩçpkaçxa', txãa dudtey txãa u'y niisa' katxhinik neeyũu.

Maazkuẽe aç'a'satxwa Jesus nuykatxhini

²⁹ Jesusa' txajũ kasehçxa Galilea ìkh pukasuk u'j. Sa' thã'j vxiçtek tejka.

³⁰ Aça' nasa wala pa'jtx txajx tasxte aç'a'satx pe'jçxa, legsa, uyya' ãjasamée, we'weya' ãjasamée, êsey'a' ãjasameetx. Aça' txã'wẽ wala kuh aç'a'satx Jesus tasxte nuypa'the', txã' nuykatxhik.

³¹ Txã'wẽ we'weya' ãjasameewa we'weya' ãjatx, aç'a' êsey'a' ãjasameewa katxhitx, aç'a' legsawa ew u'jya' ãjatx, naapkaçxa' uyya' ãjasameewa uyya' ãjatx. Aça' nasa' wala kuh yajxna Israelwe'sx Dxusa's wala weçxatx.

Kuatro mil nasatx Jesus sã'jĩni

(Mr 8.1-10)

³² Txajũ' Jesusa' txãa yakh u'jusawe'sxtxi pa'yaçxa na'wẽk we'we:

—Naa nasa' ayte adx yakh tekx en yã'j ùsta', sa' kĩh yuhwa ù'wa'j ji'phmeeta', txãa pa'gath peeygãja', sa' puuçmée yu' kaahme'nja. Txã'wẽme' dxi'the u'jya' çxhãçxhameetxna jĩte',

³³ na'wẽtx pas:

—Nawa ¿kĩhte txakwe wala ù' uyuukxtha'w nasa txãazkuẽesa ù'wa'j? Ayte' kim yuhwa u'p kiweme' aç'a' jĩte',

³⁴ Jesusa' pějxku:

—I'kwe'sxa' ¿maz pan ji'phkwe? jĩte', txãawe'sx pasçxa':

—Siete pan, wedx kuhmeekuẽçxáa ji'ptha'w jĩnatx pas.

³⁵ Aça' nasatxi' kiwesu kaçxkaahçxa',

³⁶ siete pan vxite' wedxtxi jxpa'gana'wa Dxusa's weçxak. Txã'wẽ yũuçxak pe'ltedeçxa txãa yakh u'jusawe'sxtxi ũs, aça' txãawe'sxa' nasatx ũsu'stxi.

³⁷ Jxukaysa ũ'çxa txikte', kijxaasa's pkhakhtxi, aça' siete kanastate utak neeyũu.

³⁸ Ũ'sawe'sxa' kuation mil ähtx yu', nawa u'y vxite' luuçx txãawe'sx yuutxi' isaniméek kxaz yu'.

³⁹ Txã'wẽ yũuçxa Jesusa' nasatx kaahçxa', txãa yu' barkote khêeçxa Magdala kiwenku u'j.

16

Fxariseo vxite' saduceowe'sx cieluju kîhçxáawa kaavxya'ja'khaahni

(Mr 8.11-13; Lk 12.54-56)

¹ Fxariseowe'sx vxite' saduceowe'sxwa pa'jçxa', Jesus ewmée yũutewa kpajkxya' sũhçxa pějxtxi:

—Cieluju kîhçxáawa mkaavxya'ja'j jîna.

² Nawa Jesus pasçxa' na'jîk:

—Kusna sek khêjeçte', kuskusa' sekuuna, ew kusuça' jî'i'kwe.

³ Sa' kusîi we'weçxa', açxha' en ewmée yu-una, tâaphçxáa ũsa' jî'i'kwe. Yuwejuçxáa ew we'weçxa', ũuste yu' ewmeeçxáa yaakxsa, en ma'wẽ yũuwa'ja'swa jiyu'i'kwe i'kwe'sxa'. Nawa naa ensu na'wẽ seena'sa vxyaaçxa' txãa yu'sa' jiyuya' äja'çmeei'kwe kîh yũuya' txã'wẽ yũuçtewa.

⁴ Naa nasa ewmeesa' cieluju seena'sa's kaavxya'ja'j jxthãasu'tx. Nawa peena yu'

kaavxya'ja'jmeete ewna, naasáa Jonasa'
ma'wēga yuu txã'sçxáana ya'pta'sxina jīna
we'weçxaçxáa nvxihtçxa u'kh.

*Fxariseowe'sx kaapiya'jni's lewadura yakh
kaaja'da'jni*

(Mr 8.14-21)

⁵ Jesus yakh u'jusawe'sxa' ĩkhwala kuten
u'jweççxawa, peççkanaçxa pan yu' jxūmeeta u'j.

⁶ Kxtee pa'jçxa', Jesusa' na'wēk we'we:

—Mpa'yajkxwe, fxariseo vxite' saduceowe'sx
lewadura ewmeesa's jīte',

⁷ txāawe'sxa' na'wētç puutx paapēyi':

—Pan jxūmeetha'w aça' kxahne' txã'wē
we'we' jī'tx.

⁸ Txã'wē we'weni's Jesus jiyuçxa' na'jīk:

—¿Maa sūhççakwe pan ji'phmeetha'w jīna
we'wé'? Pan ji'phmeetewa, Dxusa' thēymée
sã'jīna sūhwa'j yu'sa' ji'phmeewá'kwe.

⁹ Adxa' na'wē tahç pan yakhçxáa
cinko mil nasatx thēyméeth sã'jī aça'
kijxaasa's maz kanasta pkhakhçxawa txã'sa'
yaakiçmeewá'kwe.

¹⁰ Vxite ente' txã'wēy siete pan yakhçxáa ku-
atro mil nasatx thēymeeth sã'jī aça' kijxaasa's
maz kanasta pkhakhçxawa yaakiçmeewá'kwe.

¹¹ I'kwe'sxa' jiyumeewá'kwe adxa' pana's
we'weçxa txã'wē mpa'yajkxwe fxariseo vxite'
saduceowe'sx lewadura ewmeesa's jī'çmeeth.

¹² Txajū' jiyutx Jesusa' txã'wē pante ka'dnisa
lewadura's we'wemée, fxariseo vxite' saduce-
owe'sx kaapiya'jni's we'weçxa txã'jīni's.

*Pedro' jiyuk Jesusa' Dxus tasxu yuusaatewa
(Mr 8.27-30; Lk 9.18-21)*

¹³ Jxkaahsa Fxilipo vxitni çxhab Cesarea ja'dasu pa'jçxa', Jesusa' na'jïnak pêjx txãa yakh u'jusawe'sxtxi:

—Dxus Nçxi'k Nasa Yuusa's çkimna jïnata we'we' nasa'? jïte',

¹⁴ na'wêtx pta'sx:

—Maaii' yu' Juan Bautistana jï'tx. Vxite we'wesa' Eliasna jï'tx. Aça' vxite we'wesa' Jeremiasna meeçxa' vxite kasehne' Dxus yuwe pta'sxsa jï'tx jïna pta'sxte',

¹⁵ Jesus pêjçxa':

—I'kwe'sxa' çkimna jï'kwe? jïte',

¹⁶ Simon Pedro' na'wêk pas:

—Idxa' Dxus ïtxisa Nçxi'kgu, txajx tasxu yuusa jïte',

¹⁷ Jesusa' pasku na'jïna:

—Jonas nçxi'k Simon, idx yakha' wala weçxa yuja'. Idxa's naa kiwete piçthê'j kaajiyu'jmeeta'. Adx Tata cielute ïssa yuuk kaajiyu'j adxa' Dxus ïtxisa Nçxi'ktewa.

¹⁸ Idxa' Pedro yaaseg aça' idxwa ma'wêga adxa's ew jiyu txã'wêy maawa ew jiyuwa'ja's idx yakh nvxiitu'nja. Aça' txã'wê ew jiyunijü' eçxthê'j yuhwa knaymeena Dxus luuçxtxi'.

¹⁹ Dxus jxkaahna ïsnite pa'jwa'j dxi'ja's phadewa'ja's idxa's ïsu'nja, aça' idxa' maatxwa we'weçxa': Pkaltxi' Dxusa' peltunaïna jïte', peltunãyni yüutxna. Nawa peltunaïmeena jïte', peltunãynimée neeyüutxna jïk.

20 Txajũ' Pedrowe'sxtxi neewe'wek, Jesusa' Dxus tasxu yuusa yuh yu'ga jĩna maa yuhtxwa pta'sxkahnén.

Jesusa' txajx uuwa'ja's pta'sxni

(Mr 8.31-9.1; Lk 9.22-27)

21 Txãa entek Jesusa' nyafxçxah pta'sx txãa yakh u'jusawe'sxtxi na'jĩna:

—Jerusalenna u'jwa'j ji'pthu. Kxteea' wala ptx-uuni yu'nja judiu nthē'jsawe'sx vxite' sacerdote npiiçthē'jwe'sx vxite' Dxus leya's kaapiya'jsa txãawe'sx kusete. Txãawe'sxa' ikhetxna, nawa tekhnente' ki' ĩtxi yu'nja jĩna pta'sxte',

22 Pedro' Jesusa's fxiite pe'jna u'jçxa na'wêk yu'kxpeh:

—Idxa's txã'wê yũuwa'j yu'sa' Dxusa' jx-thãasmeewaça', ewna jĩte',

23 Jesusa' yu'thegçxa na'wêk we'we Pedro's:

—Eçxthē'j, adx tasxuh mtxtuté. Idxa' suw wēenaçxáa ũsgu. Dxus jxthãasni yu'sa' kxtey yuumée, naa kiwega nasaa yaakxnixçá'sgu kxtey yuu wēje'.

24 Txajũ' Jesusa' txãa yakh u'jusawe'sxtxi ki' we'wek:

—Maawa adx yakh yuu wēeçxa', peekx kakwe jxthãasni's kihnawa jxuka nvxihtçxa yuuçxáa adx yakh yujxa' ajane'kwe, makwe pxthaa yu-uwa'j seena'sa ma'k yuu nawa txã'sa' ũukhmée.

25 Txã'wēme', naa kiwete peekx ĩtxi fxi'zewa'jçxá's ya'nwe'wesa', Dxus yakh fxi'zewa'j yu'sa' ivxiituna. Nawa adx yakh fxi'zepa'gaçxáa naa kiwete ĩtxi fxi'zeni's

yajkxmée ivxiitusa', Dxus yakh fxi'zewa'j yu'sa' ivxiitumeena.

²⁶ Makwe naa kiwetewe'sx yu'sa' jxuka knayçxawa peekx ũus yu's ivxiitute', ¿kîhteçxá' selpiima'k? Peekx ũusa's ivxiituyã'the', ¿kimçxa' nwe'wema'k?

²⁷ Jxpa'yakxmeete', Dxus Nçxi'k Nasa Yuusa' ki' kîjana Ney eena' kweethni pxãhte txajx angeleswe'sx yakh, aça' ma'wěçxah yũusaaçxawa teeçxsa na'wěçxah jxpa'gatxna.

²⁸ Isath we'we', ayte ũssa maaí yu' nee uumey uyuune'kwe txã'wě Dxus Nçxi'k Nasa Yuusa' jxkaajxa' pa'jni's jînak pta'sx.

17

Jesusa' zhiçkwe yu'pthehçxa vxyaani (Mr 9.2-13; Lk 9.28-36)

¹ Seis en skhěwniite', Jesusa' pe'jna u'kh Pedro vxite' pxakhsa Jakobo Juan txãawe'sxtxi teeçx vxiç walate.

² Sa' kxtee pa'jçxa', txãawe'sx dxi'pte Jesusa' wala zhiçkwe yu'pthehçxak vxyaa. Txajx dxi'pa' sek na'wěk eena' khi'khi', aça' txajx athni ropá' seena' zhiçkwe çxihme yuuk.

³ Naapkaçxha' Moises vxite' Elias txãawe'sxa' Jesus yakh puutx we'wenatx vxyaa.

⁴ Txã'wě uyçxa', Jesusna na'wěk we'we Pedro':
—Ayte' kwe'sx ũswa'j wala ewa'. Aça' idx ewna jîte', tekh wa'kuě txaja'nja'w, vxite' iidx jîi vxite' Moises jîi vxite' Elias jîi.

⁵ Txã'jĩna Pedro' we'wena ũsiyna, tãaph seena' zhiçxkwe çihmesa kũhçxa aphku. Aça' txãa tãaphte na'jĩnak we'weni pthũuse:

—Na' adx Nçxi'k wala wedxnisa', txãa pa'ga wala weçxana ũsthu. Txã'sa' nwẽese'jna kxtey myuuwe jĩni's

⁶ Pedrowe'sxa' wẽse'jçxa', wala ũukhçxa kiwega pkipha wetetx.

⁷ Aça' Jesusa' txãawe'sxtxi jxa'dxçxa na'wẽk we'we:

—Ũukhmée mkiitewe jĩte',

⁸ kiiteçxa' Moiseswe'sxtxi' uymeeyã'tha', naasáa Jesusçxáa yã'kh ũs yu'.

⁹ Txajũ' thã'ju sa'jna u'jweççxa', Jesusa' na'jĩnak jxkaah:

—Kim yuhtxwa pta'sxmeene'kwe txã'wẽ uyni's, Dxus Nçxi'k Nasa Yuusáa uuçxawa ki'ĩtxi yuupkaçx jĩte',

¹⁰ Pedrowe'sxa' Jesusna na'wẽtx pẽjx:

—Dxus leya's kaapiya'jsawe'sx pta'sxçxa', Elias khuẽ'y yaçte pa'jana jĩ'tx, sa' çma'wẽ yu-uwa'jsakx açki'tx txã'jĩ'? jĩte',

¹¹ Jesusa' na'wẽk pta'sx:

—Isa, Elias khuẽ'y yuh yaçte pa'jwa'jsa yu'k, aça' isa yuh pta'sxi'ne'ta.

¹² Adxa' na'jĩ'th na', Elias' yaçte pa'jyujk. Txã'wẽtewa nasa' jiyumeeçxa, txã'sa' kĩjkĩhwa yũutx. Aça' Dxus Nçxi'k Nasa Yuusáawa wala pkxuuni yuuna txãawe'sx kusetey jĩk.

¹³ Aça' Pedrowe'sxa' jiyutx Jesusa' Juan Bautis-tana yajkxçxa we'weçtewa.

*Teeçx luuçx wēeçpa'jsa's Jesus nuykatxhini
(Mr 9.14-29; Lk 9.37-43)*

¹⁴ Txajū' txāawe'sxa' sxawedna kījaçte', nasa wala pkhaakhena ūsu'tx. Aça' teeçx piçthē'j Jesus tasxte peejxūkwena kūhçxa', na'wēk pxthaa we'we:

¹⁵ —Adx nçxi'ka's meen peeygāh, wēeçpa'jçxa iiméh seena' pxthaa yuuna ūsa'. Maa enteya' ipxkhēwa khēje'k, sa' yu'khēwa khēje'k.

¹⁶ Aça' idx yakh u'jusawe'sx tasxte jxūna kūhtewa, nuykatxhiya' ājameeta' jīte',

¹⁷ Jesusa' na'jīnak pas:

—Dxusa' pu'çxhina sūhwa'j yu'sa' ji'phmeesata' naa nasa'. ¿Bagaçxpkaçx i'kwe'sx yakh pu'çxna ūs ya'watka? ¿Bagaçxpkaçx ājamée fxi'ze ya'wakwe? Luuçxa's ayte mneejxūhwe jīte',

¹⁸ jxūna kūjuçpkaçxha', Jesusa' eçxa's juuna' we'weçxa kutxi'kh luuçx ūusu, aça' txāa dudtey katxhinik neeyūu.

¹⁹ Jesus yakh u'jusawe'sxa' Jesusa'sçxáa fxii pa'yaçxa, na'jīnatx pējx:

—Kwe'sxa' ¿kīh yūuçxakxtha'w eçxa's kutxi'jya' ājamée? jīte',

²⁰ Jesusa' pta'sxku:

—Dxusa' pu'çxhina sūhwa'j yuuçxá's yaakxpa'gamée i'kwe ājamée. Isath we'we', Dxusa' pu'çxhina sūhwa'ja's mostasa fxiw na'wē le'çxkuēesaçxáawa ji'phwaça', naa vxiç wala's we'weni yakhçxáa fxiiite ki'pxa' ājane'kwe. Dxusa' pu'çxhina sūhwa'j yuuçxá's yajkxwaça', i'kwe'sx yakha' kīh yuhwa thēysameena.

21 Na'wěsa eçxa' thěymée yu' kasehmeena, wala yũunaana Dxus yakh puutx we'wete yuuçxáa kasejena jĩk.

Jesusa' txajx uuwa'ja's ki' pta'sxni

(Mr 9.30-32; Lk 9.43-45)

22 Txajũ' Galilea kiwete ũsçxa', Jesusa' txãa yakh u'jusawe'sxtxi' pta'sxku:

—Dxus Nçxi'k Nasa Yuusa's nasa ewmeesa kusete dukhni yuuwa'ja'.

23 Aça' ikhetxna, nawa tekx ente' ki' ĩtxi yuuna jĩna pta'sxte', txãawe'sxa' wala nxustxi.

Dxuus yatpa'ga vxyu dukhni

24 Jesusa' txãa yakh u'jusawe'sx yakh Kaper-naum çxhabte pa'the', dxuus yattewe'sx vxyuu pkhakhsawe'sxa' Pedro's thegya' u'jçxa na'wětx pějx:

—I'kwe'sxtxi kaapiya'jsa' ¿dukheçmeewá' dxuus yattewe'sx vxyu's? jĩte',

25 Pedro we'weçxa':

—Dukhe'ík jĩnak pas. Sa' Pedro' Jesus ũsni yatte kũjuçpkaçxha', Jesusa' na'jĩnak we'we:

—Simon, idxa' ¿maa sũju'ga? Naa kiwete jxkaahsawe'sxa' vxyu kaapkhakhe'jçxa', ¿kimtxi pějwa'ja' jĩ'ta? ¿Jxkaahsa ji'jwe'sxwa dukhe'ta', meeçxa' txãa ji'jmée ekajuwe'sxçxáa wá'nta dukhe'? jĩte',

26 Pedro' na'wěk pas:

—Ekajuwe'sxçxáatx dukhe' jĩk. Aça' Jesusa' na'wěk we'we:

—Txã'wěyã'the', jxkaahsa ji'jwe'sxa' dukhwa'jsameeta'.

²⁷ Nawa kim yuhtxwa kaaũusçxa'jya'mée idxa' u'jçxa ìkhwálate wedx yũhza's akhene'ga, sa' nyafxte wedx kãasa's kaawayi'jçxa uyuune'ga teeçx vxyu ji'phna. Txãa yakh dukhene'ga adx pa'gate vxite' iidx pa'gate yã'jçxa jĩk.

18

Kim wejx jxthaakwe jxtuhthesakx

(Mr 9.33-37; Lk 9.46-48)

¹ Txãa ensu' Jesus yakh u'jusa docesawe'sxa' txajx tasxte utxaaçxa na'wẽtx pẽjx:

—Naa kiwete Dxus jxkaajxa' kãi ente' ¿maa wejx jxthaakwe walasakxtha'w? jĩte',

² Jesusa' teeçx luuçxkuẽ's pa'yaçxa txãawe'sx ksxavxyste txahçxa

³ na'wẽk we'we:

—Isath we'we', i'kwe'sxa' iiwejçx yaakxni's nvxihtçxa naa luuçx na'wẽ yuumeeçxa yu', Dxus jxkaahna ũsnite u'kaya' ãjameene'kwe.

⁴ Txã'wẽ kĩhtewa ãhmeekwesa naa luuçx na'wẽ yuusa yuuçxáa, Dxus jxkaahna ũsnite' maatewa jxthaakwe walasa yuuna.

⁵ Maa nasawa adxna jxpa'gaççxa ma'wẽ weçxana jxpa'gatx txã'wẽy weçxana naa luuçxkuẽ na'wẽsatx jxpa'gana txã' adxna jxpa'gasa yuuna.

Pkalte kweete'jya'mée jxpa'yaxwaja'

(Mr 9.42-48; Lk 17.1-2)

⁶ Adxna jxpa'gasa ãhmeekwesatx maawa pkalte kweete'jsa's txhikhte skuutxh ũ'khni kweta's tudçxa ìkh wala dxiikhẽ akhwaççxáa, wejx ewna.

7 Naa kiwete ewmeesa' bagaçxtewa nes yu-utxna. Nawa naa kiwete ewmeesa yakha' seena' yuh ũukhũukha'. Sa' maawa txã'wẽ pkalte kweete'jena txãa yu' weh yuhwa iyumeena.

8 Txãa pa'ga iidx kuse ma'k yuu meeçxa' iidx çxida ma'k yuu nawa txã'wẽ pkalte kweete'jpçxãh yuuçte', txã'sa' spẽ'thçxa mwãatah. Txã'wẽ pçuwa'jmée ipx walate e'z kuse e'z çxida ji'ph akhni yuu na'wẽ', wejxwa pçumée ïtxi fxi'zewa'the çxida ji'phmée legkuẽçxáawa kxtee u'kani wejx ewa'.

9 Iidx yafx txã'wẽ pkalte kweete'jpçxãh yuuçte', kutxi'jçxa mwãatah. Infxierno ipxte e'z yafx ji'ph ũs na'wẽ', wejxwa pçumée ïtxi fxi'zewa'the teeçx yafx yakhçxáawa u'kani wejx ewa'.

*Piisxáa vxitusa yakh kaaja'dajni
(Lk 15.3-7)*

10 Naawe'sx ãhmeekwesa maa yuhtxwa açenuwe. Na'jĩ'th na': naawe'sxtxi pi'kxna u'jusa angeleswe'sxa' cielute adx Tata tasxte nes yuusaata'.

11 Txã'wẽme', Dxus Nçxi'k Nasa Yuusa' vxi-tusatx nwe'weya'k kĩh.

12 I'kwe'sxwaççxáawa ¿na'wẽ yũumeema'kwe? Cien piisxáa ji'phçxa', teeçxsa' vxitute', nowenta y nwewesatx vxiçsũ nvxihtçxa piisxáa vxitusa's pakweya' ¿u'jmeema'kwe?

13 Sa' uyçxa', vxite vxitusamée nowenta y nwewesate jxthaakwe peeygãhna weçxaane'kwe.

14 Txã'wěy i'kwe'sx Tata cielute ũssawa teeçxçáa yuhwa vxitu jxthãasu'çme' naawe'sx ähmeekwesatewa.

Peekx yakthē'ja's maz us peltunãywa'j yuukx (Lk 17.3)

15 Iidx yakthē'j idxa's ewmée yūute', txã'sçxáan pa'yaçxa mkaajiyu'j ewmée yūuni's. Iidx we'weni's nwēese'jewáana açá' iidx yakthē'j yakh kxtee yuwe ewuune'ga.

16 Nawa nwēese'jmeewáana açá' testigo teeçx meeçxa' e'z txahçxa txãawe'sx dxi'pte we'wene'ga, kxah txãa e'z testigosa' jiyutxna iidx yuwe ewuuya' pa'pçxuni's.

17 Txãa e'z testigo dxi'pte nwēese'jmeete', dxuus yatte jxkaahsawe'sxtxi mpeeta'sx. Açá' txãawe'sxtxiwa nwēese'jmeeçxa', yakthē'j na'wēmée Dxusna jiimeesa na'wēçxáa nvxiitni yuuna.

18 Isath we'we': I'kwe'sxa' yuwetxi's naa kiwete pheu'the', cielutewa Dxus dxi'pte pheu'jni yu-utxna. Nawa i'kwe'sxa' yuwetxi's pheu'jmeete', cielutewa Dxus dxi'pte pheu'jnimée yuutxna.

19 Na'jĩ'th na': I'kwe'sx kīh yūune'jçxawa e'zsaçxáawa txã'wě yuute ewna jīna puutx we'weçxa, Dxusa's pi'kine'kwe ma'wě yuuwa'ja'swa açá' adx Tata cielute ũssa' kxtey yuuna.

20 Txãa pa'gatey e'z ma'tx yuu meeçxa' tekh ma'tx yuu nawa adxa's yajxna pkhaakheçxa ũste', adxa' txãawe'sx ksxavxyte ũswa'jsath jīk.

21 Txajũ' Pedro' Jesus tasxte utxaaçxa', na'jīnak pējx:

—Yakhthē'j adxa's ewmée yūusa's ħmaz us peltunāywa'j yuukx, meeçxa' sietepkaçxçxáa ewmanx? jīte',

²² Jesusa' na'wēk pta'sx:

—Sietepkaçxçxáa ewna jīya'wameeth. Siete-saçxaçxáa setenta āhpkaçx peltunāywa'ja' jīk.

Selpisáa peltunāyya' wa'lsa yakh kaaja'da'jni

²³ Txāa pa'gatey Dxus jxkaahwa'j en āhte', na'wē yuuna: Teeçx jxkaahsa' txā'sna selpisaawe'sx yuultxi pēyiçku yu'.

²⁴ Yuulsatx teeçxsa na'wēçxah pējxna u'jweçpkaçxha', teeçx jxūna kūhtx iiméh seena' wala yuulsana.

²⁵ Txāa selpisa' kīh yakh yuhwa dewewa'j ji'phmeek yu'. Aça' patrona' txāa yuulsa's txweykaakh txajx nyu, txajx luuçx, txajx ji'phuni yā'jçxa jxuka txāa yuula's dewewa'j.

²⁶ Txajū' selpisa' patron tasxte peejxūkweçxa pxthaa we'wek: Adxa's meen peeygāh. Txāa yuula's jxuka dukhe'nja jīte',

²⁷ patrona' peeygāhna yuula's peltunāyçxa ewte nvxihtku.

²⁸ Nawa txāa peltunāynisa' kasehna u'jçxa', vxite selpisáa txā'sna walameekuē yuulsa'sku uy, sa' txhikhte uweçxa ikheçku yu': Adxna yuulgu txā'sna mdukh jīna.

²⁹ Txajū' txāa yuulusa' peejxūkweçxa na'jīnak pxthaa we'we: Adxa's meen peeygāh, jxuka dukhe'nja jītewa,

³⁰ kxtey yuumée wejxwa karcelna jxūna u'jçxa kxtee txajk txāa yuula's dukhpkaçx.

³¹ Txã'wẽ yuuçte vxite selpisaawe'sx uyçxa', wala nxustxi. Sa' u'jçxa pta'sxtxi txã'wẽ ewmée yūsáa patrona's.

³² Aça' patrona' ewmée yūusa's pa'yaçxa na'wẽk we'we: Selpisáa peethãhwe, adxa' iidx yuula's jxuka peltunãythu, pxthaag we'we txãa pa'ga.

³³ Aça' idxwa txã'wẽy idxna yuulusa's peeygãhna peltunãywa'j ji'phgu, adxwa ma'wẽtká peeygãh idxa's txã'wẽy jĩçxa',

³⁴ txãa patrona' wala ũusaçxaçxa, kastigãykaakh yuula's jxuka dukhpkaçx.

³⁵ Txã'jĩçxa', Jesusa' na'wẽk pta'sx:

—Teeçxsa na'wẽçxah ũusuh jxuka peltunaĩmeewá'kwe i'kwe'sx yakthẽ'jwe'sxtxi, aça' adx Tata cielute ũssawa txã'wẽy kastigaĩna i'kwe'sxtxi' jĩk.

19

*Ptamsa txuteewa'jme's Jesus kaapiya'jni
(Mr 10.1-12; Lk 16.18)*

¹ Txã'wẽ we'wena jxã'jçxa', Jesusa' Galileaju kasehna u'jçxa Judea kiwesu Jordan yu'kutetek pa'j.

² Kxte ũste', nasa wala pa'jtx, aça' nuykatxhik ãça'satx.

³ Naapkaçxha' fxariseowe'sx maaíi yu' Jesus tasxte utxaana kũhçxa na'wẽtx pẽjx, pasya' sxi-igte' ewmée vxit-ya' sũhçxa:

—Ptamsaçxawa, nyu kĩjkuẽçxáa ãhmée yũuteçxáa txãapa'ga wãatahte ¿ewmanx? jĩte',

⁴ Jesusa' na'wẽk pas:

—I'kwe'sxa' ¿Dxus librute iilēymeewá'kwe? Kxtee we'weçxa': Dxusa' nyafxiitey e'zúitx ja'daçxajk vxit piçthē'j petx u'y yā'jçxa.

⁵ Txāa pa'ga piçthē'ja' peekx neywe'sx tasxu txuteeçxa peekx nyu yuuwa'jsa yakh utx-aawa'jsa', txā'wē e'zçxawa teeçxsaxáa na'wē yuuna pa'jya' jī'k Dxus librute'.

⁶ Txā'wē yūunijū', e'zmée teeçxçxáak yuuna pa'ja'. Txāa pa'ga Dxus pūpççxa nvxiitnijū' ptamsayā'ja' txuteewa'jsameeta'.

⁷ Txā'jīte', na'wētx pējx:

—Txā'wēte', Moisesa' ¿kījxa'ga peekx nyu yakh txuteeçxa eç vxitçxa nyu's ūsçxa txuteewa'ja' jīna jxkaaja'? jīte',

⁸ Jesusa' na'wēk pas:

—I'kwe'sx txā'wē Dxus jxkaahni's nwēese'jmeeçxa nyu yakh txuteena fxi'zepa'ga íiçxáak Moisesa' txā'wē yūuwa'ja's nvxiht. Nawa txā'wē yūuwa'ja's nyafxiitey Dxus nvxiitnisa yu'çme'.

⁹ Adxa' na'jī'th na': Nyu txā'wē vxite piçthē'j yakh pkal yuuna fxi'zesameete wáa nyu's wāatahçxa vxite u'y yakh ptamuuna na' txā'wē vxite yakh ptamuupa'ga pkal kazx yuusáa yuuna. Meeçxawa nmi' wāataanisa u'y yakh maawa ptamuuna na' txā'wē u'y wāataanisa yakh ptamuupa'ga pkal kazx yuusaaíçxáa yuuna jīte',

¹⁰ Jesus yakh u'jusawe'sxa' na'wētx we'we:

—Txā'wēte', ptamumée fxi'zeni wejx ewna jītx.

¹¹ Aça' Jesusa' na'wēk pas:

—Txã'wě yuja', nawa jxukay yu' ptamumée fxi'zeya' äja'çmeeta', naasáa kimnane' Dxusa' ptamumée fxi'zewa'ja's nvxiht txãaçxáa ptamumée fxi'zeya' äjana, vxite' ptamumée Dxusçxáana selpiina fxi'zewa'jsata'.

¹² Na'wěsa yu' ptamumée fxi'zeya' äja'tx: Maaii yu' ptamumée fxi'zeya' upxsatxna, aç'a' vxitetxi's naa kiwete piçthě'jwe'sx íçxáatx ptamumée fxi'zewa'ja's vxitu', aç'a' vxite' ptam yu-umée Dxusçxáana selpiina fxi'zewa'jsata'. Pta-mumée fxi'zeya' äjasa', ptamumée fxi'zetxna jík.

Luuçxkuětx Jesus bedekĩyni
(Mr 10.13-16; Lk 18.15-17)

¹³ Txajũ' Jesus tasxte luuçxkuě nuypa'jtx, luuçx dxikthesu peekizeçxa Dxus kusete neewe'wekahn. Nawa Jesus yakh u'jusawe'sxa' ũusçxa we'wetx nuypa'jsatx.

¹⁴ Aç'a' Jesusa' na'wěk we'we:

—Luuçxkuě adx tasxte yuusaatxi' kuçx yup-nuwe, txãa pa'gatey cielute Dxus jxkaahna ũsnisa' naa luuçxkuěwe'sx na'wěsa jĩ íçxá'.

¹⁵ Txã'jĩçxa', luuçxkuěwe'sx dxikthesu peek-izeçxa Dxus kusete neewe'weçxa', txajũ u'kh.

Piçtakx wala ji'phsa Jesus yakh puutx we'weni
(Mr 10.17-31; Lk 18.18-30)

¹⁶ Txãa e'su' teeçx piçtakx Jesus tasxte pa'jçxa na'wěk pějx:

—Kaapiya'jsa wala ewsa, mpeeta'sx. ¿Kĩh ew yũuçxa pçumée itxi fxi'zewa'ja's ji'phuki'th? jĩte',

¹⁷ Jesus pasçxa':

—¿Kĩh yuupa'gaga adxa's ewsa jĩ'? Ew yũusa' teeçx yuuçxáa ũsa' txã' Dxusa'. Aça' pçumée itxi fxi'zewa'ja's ji'phu wēeçxa', Dxus jxkaahnitxi' kxtey myuu jĩte',

¹⁸ piçtakxa':

—¿Maatxna? jĩna pějxte', Jesusa' pta'sxku:

—Dxusa' na'wēk jxkaaja': Nasa ikhwa'jme', ptamsayã'ja' vxite yakh pkal yuuwa'jme'. Pesweewa'jme'. Vxitetx ĩsxiina nuywe'wewa'jme'.

¹⁹ Neywe'sxtxi peeygãhna ewçxáa yũuna fxi'zewa'ja'. Peekíi ma'wēga ya'peeygãja' txã'wēy mpeeygãh vxite nasatxwa jĩte',

²⁰ piçtakx paççxa':

—Txãatxi' le'çxkuējũjx kxtey yuunath waláa, aça' ¿kĩh wejx peejxna? jĩte',

²¹ Jesus paççxa':

—Dxus jxkaahnitxi' jxuka kxtey nwēese'jsa yuu wēeçxa', u'jçxa iidx ji'phunitxi' jxuka txweyçxa ji'phmeekuēsats mes. Sa' txã'wē yũuçxa' cielute ji'phsa yuune'ga. Txã'wē yũuçxa adx yakh myuh jĩte',

²² txãa piçtakxa' txã'wē wēse'jçxa' nxusnak u'j, wala ji'phsa yu'k txãa pa'ga.

²³ Txajũ' Jesusa' na'wēk we'we txãa yakh u'jusawe'sxtxi:

—Isath we'we', ji'phsa yakha' wala yuh thēya' Dxus jxkaahna ũsnite u'kawa'j.

²⁴ Na'jĩ'th na': kamelxo txakwesa' ¿ma'wē yũz kafxga khēwya' ājakx? Aça' ji'phsa yakha' txãate jxthaakwe thēya' Dxus jxkaahna ũsnite u'kawa'j.

²⁵ Txã'jĩni's wẽse'jçxa', Jesus yakh u'jusawe'sxa' wala kuh yajkxtxi, sa' txãawe'sx pwe'sx na'wẽtx puutx ya'paapẽyi':

—Txã'wẽte', ¿kimçxá' ewte neeyũuya' ãjama'k? jĩte',

²⁶ Jesus thegçxa' na'wẽk we'we:

—Nasa' Dxus yakhmée yu', ewte neeyũuya' ãjameeyuhtxna. Nawa Dxus yakh yu', kĩh yuhwa thẽysa meea'.

²⁷ Txã'jĩte', Pedro' na'wẽk pẽjx:

—Kwe'sxa' idx yakh yujxa' kwe'sx ji'phuni's jxuka nvxihttha'w, sa' ¿kĩh jxpa'gakxtha'w? jĩte',

²⁸ Jesusa' na'jĩnak pta'sx:

—Isath we'we', naa kiwete pkalsa's jxuka yu'pthehçxa ewsaçxaçxáa yuuwa'j en ãhte', Dxus Nçxi'k Nasa Yuusá' pa'jçxa jxkaajxa' takheçpkaçxa', adx yakh yuusáa i'kwe'sx doce-sawa adx yakh jxkaahsa yuune'kwe Israel ji'j docesatx.

²⁹ Maawa jxukaysa txã'wẽ adx yakh yujxa'çxáa txãawe'sx yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txãatx jxuka nvxiit-sa' txãa nvxiitnisate jxthaakwe wala jxpa'gatzna, sa' pçumée itxi fxi'zewa'ja'swa jxpa'gatzna.

³⁰ Nawa jxpa'yakxmeete', makwe yaçtewe'sxçxawa, nmehtewe'sx yuutxna; naapkaçxa' nmehtewe'sx yu', yaçtewe'sx yuutxna jĩk.

20

Mjũisa yakh kaaja'da'jçxa Jesus kaapiya'jni

1 Dxus jxkaahni ente mjïisa' na'wẽ yũuni yuutxna: Teeçx mjïi namu' kusí kasehçxa mjïisa pakweya' u'kh, uuthasxte uwa udewa'jsa.

2 Sa' mjïiwa'jsa yakh puutx we'wek teen mjïini's äh dukhya'. Txã'wẽ yũuçxa mjïi ehn kaakh.

3 Sa' kusí las nwewe yuuçpkaçxha', ki' kasejk, sa' vxite kîh mjïiwa ji'phmée plaasasu u'jusatx uyçxa',

4 txãatxi' na'wẽk we'we: Me'jwe mjïiya' adx mjïi ehte, teen uta mjïinite äh dukhe'nja jïte', txãawe'sxa' u'jtx mjïiya'.

5 Txajũ' mjïi namu' ëepxãh wala ki' kasejk, sa' kusuçte las trestewa ki' kasejk, txãatxwa txã'wẽy mjïiya' kaakh.

6 Txajũ' kusuçte las cinkote plaasasu ki' kasehçxa', vxite uyku kîh mjïiwa ji'phmée u'jusatx. Txãawe'stxiwa na'wẽk we'we: I'kwe'sxa' çkîh yũuçxa mjïi ji'phmée u'jukwe teen uta? jïte',

7 txãawe'sxa' na'wẽtx pas: Kimwa mjïiya' pa'yameeta' jïte', mjïi namu' kaakh txajx mjïi ehte: U'jçxa adx mjïi ehte mjïine'kwe aç'a' adxa' wala ew dukhe'nja jïk.

8 Txajũ' jxuka kuste', mjïi namu' pa'yak kxtee kmãaji'jsa's na'jïna: Mjïisatxi' pa'yaçxa mdukh, nawa nmeh mjïiya' pa'jsatx khuẽ'y nyafxte dukhçxa teen uta mjïisatxi' nmehte dukhna jxã'jane'ga jïte',

9 kxtey yuuk. Aç'a' kusuçte las cinkote mjïiya' pa'jsa khuẽ'y utxaaçxa teeçxsa na'wẽçxah jxpa'gatx teen uta mjïinite ähçxaçxáa.

10 Txajũ' kusí mjïiya' pa'jsa': Kwe'sxa' jx-

thaakwe jxpa'ga'nja'w sũhna ũsçxawa, txakweíçxáa jxpa'gaçxa'

¹¹ ũsçxa we'wetx mjii namu's na'jĩna:

¹² Naawe'sxa' nmeh pa'jçxa naasáa teeçx ora yuuçxáatx mjii. Nawa dukhni yu'sa' kwe'sx nakweíçxáatx jxpa'ga. Naapkaçxha' kwe'sx yu' teen utatha'w mjii, sekte yaaçxana wantãyna jĩte',

¹³ mjii namu' na'jĩnak pas: Namiku, idx yakh ewmée yũuçmeeth. Adxa' teen uta mjĩini's áh dukhe'nja jĩna idx yakh puutx we'wete', ewna çjĩmeegá'?

¹⁴ Txãasa iidx mjĩini's áh dukhni's jxpa'gaçxa me'j. Idxna nakweth dukh txakweçxaçxáa dukheçthu nmeh mjiiya' pa'jsatxwa.

¹⁵ Nawa adx jĩ'sa' ma'wẽ yũuweçxtewa kxtey yu'nja. Meeçxa' adx ew yũuni's idxa' çaçe'wá'ga? jĩk mjii namu'.

¹⁶ Txã'wẽ yũuwa'jsata' nmehtewe'sxa' yaçtewe'sx yuutxna, naapkaçxha' yaçtewe'sxa' nmehtewe'sx yuutxna. Txãa pa'gatey pa'yanisa yu' wala kuhta', nawa txhitxhnisa yu' kuhmeeta' jĩk.

*Jesusa' txajx uuwa'ja's ki' pta'sxni
(Mr 10.32-34; Lk 18.31-34)*

¹⁷ Jesusa' Jerusalen dxi'the u'jweççxa', txãa yakh u'jusawe'sx docesatx fxiite pe'jna u'jçxa na'jĩnak pta'sx:

¹⁸ —I'kwe'sxa' jii i'kwe Jerusalenna u'jweçtha'w. Kxteea' Dxus Nçxi'k Nasa Yuusa's uweçxa dukhni yuuna sacerdote npiiçthẽ'j vxite'

ley kaapiya'jsawe'sx kusete. Aça' txãawe'sxa' ikhwa'j vxitçxa

¹⁹ judiu ji'jmée vxite nasatx dukhetxna, txãawe'sxa' weeçxna pâpana kluuskhê ki'pçxa ikhkahn. Nawa tekh ente' ki' itxi yuuna jîk.

Jakobowe'sx njî'j Jesusa's pêyni
(Mr 10.35-45)

²⁰ Txajû' Jakobo Juan njî'j Zebedeo nyua' txãa e'z nçxi'ksa yakh Jesus tasxte peejxûkwena utx-aatx, txãawe'sx pêyni's Jesusa' kxtey yuukahn.

²¹ Aça' Jesusa':

—¿Kîjkwe yûu jxthãasu'? jîte', Jakobowe'sx njî'ja' na'wêk we'we:

—Idxa' naa kiwete jxkaajxa' kîhçxa', ù'kwe luuçx naa e'zsatx iidx pukakhê pdxi'p kaçxwa'ja's ùsune'ga jîte', Jesus we'weçxa':

²² —I'kwe'sxa' jiimeeçxai'kwe txã'wê pêyi'. Adx na'wêy pxthaa yuuçxa uuwa'ja's ùukhmée jxpa'gaya' ¿ájama'kwe i'kwe'sxa'? jîte':

—Ája'nja'w jînatx pas.

²³ Aça' Jesusa' pta'sxku:

—Isa, i'kwe'sxa' adx na'wêy pxthaa yuuçxa uuwa'ja's ji'phuyujune'kwe. Nawa txã'wê adx pukakhê pdxi'p kaçxwa'j yu'sa' adx ùsu'çmeeth. Txã'sa' naasáa adx Tata yuuçxáa ùsuna kiim jîi pheu'jçxa ji'phna txã'sna jîk.

²⁴ Aça' diezsawe'sxa' ùusaçxatx Jakobowe'sx txã'wê pêyni's wêse'jçxa.

²⁵ Nawa Jesusa' pa'yaçxa na'wêk we'we:

—I'kwe'sxa' peekx jîi i'kwe, naa kiwete jxkaahsa' txãawe'sx nasatx juuna'tx jxkaaja',

aça' txã'wěy npiiçthē'jsawa txãawe'sx
jxpe'jniasatx juuna'tx jxkaaja'.

²⁶ Nawa i'kwe'sx yu' txã'wě juuna'
jxkaahwa'jsamée i'kwe, wejx yuuwa i'kwe'sxa'
walasa yuu wēeçxa', vxitesa kusete selpisáa
yuuwa'j ji'phi'kwe.

²⁷ Aça' i'kwe'sx maawa txã'wě vxitesatx
jxkaahsa yuu wēeçxa', vxitee jxkaahni
fxi'zewa'ja'.

²⁸ Txãa pa'gatey Dxus Nçxi'k Nasa Yuusáa
yuhwa txã'sna selpii jxthãasya' kīhme', we-
jxwa nasatx nwe'wena selpiia' kīhçxak ya'dukh
nxuste uuya' jīk.

*E'z piçthē'j uyya' ājasameetx Jesus nuykatx-
hini*

(Mr 10.46-52; Lk 18.35-43)

²⁹ Txajū' Jeriko çxhabuh kasehna u'jweçte',
nasa' iimeh wala yuwe'tx Jesus e'ste.

³⁰ Txãa dxi'the e'ztxi kaçxçxa u'p yu' uyya'
ājasamée. Sa' Jesus skhēwni's wēse'jçxa' sustxi
we'we:

—Davxid ji'j, kwe'sxtxi meen peeygāh jīte',

³¹ nasa' ūusçxa we'wetx sxuuna' yuukahn.
Nawa txãawe'sxa' jweeíçxáatx sus we'we:

—Davxid ji'j, kwe'sxtxi meen peeygāh jīna.

³² Aça' Jesusa' yujuçxa txãa uyya' ājasameetxi'
pa'yaçxa na'wēk péjx:

—¿Kījkwe yūu jxthãasu'? jīte',

³³ txãawe'sx paççxa':

—Kwe'sx yafxtxitha'w phaade jxthãasu' jīte',

³⁴ Jesusa' peeygãhçxa txãawe'sx yafxsu jxa'dxiçpkaçxa', txãa dudtey uyya' ãjaçxa Jesus yakh u'jtx.

21

Jesus Jerusalente u'kani

(Mr 11.1-11; Lk 19.28-40; Jn 12.12-19)

¹ Jerusalente utxaana pa'jaççxa', Betfxagé çxhabkuête khuẽ'y pa'jtx. Txãa çxhabkuẽ' Oliwoş vxiç utxagak ũsu'. Txajũ' Jesusa' txãa yakh u'jusawe'sx e'zsatsx na'jĩnak kaah:

² —Ay dxi'pga çxhabkuẽ ũsa' kxtee me'jwe, sa' kxteea' uyuune'kwe buçxu luuçx njĩ'jsa tudni ũsna txã'sa' jxũkhwedeçxa jxũne'kwe.

³ Jxũna yuhte uyçxa' pēyiwáatxna aça' kwe'sxtxi jxpe'jsa' peejxa', nawa txaçxmeyna kaasxwedu'juna jĩne'kwe.

⁴ Dxus yuwe pta'sxsa we'weni' kxtey yuuk. Txã' na'jĩnak fxi'j:

⁵ Sion çxhabte nasatsx na'jĩna pta'sxine'kwe:

Mthegwe, i'kwe'sxtxi jxkaahsa yuja',

Pxthaakwesa na'wẽ thegna, buçxu luuçxte a'jçxa,

Aça' txãa buçxu njĩ'ja' ktũ'se'jnisa' jĩna fxi'jni'.

⁶ Txajũ' txãawe'sxa' u'jçxa Jesus ma'wẽ jxkaathe', kxtey yuutx.

⁷ Sa' buçxu njĩ'ja's jxũna pa'jtx luuçx yã'jçxa. Txajũ' buçxu luuçx kastxaja'jnimeesa's txãawe'sx atxhtxi pustxi, aça' Jesusa' txãate a'kh.

8 Nasa wala kuh pi'kxna u'jsawe'sx yu', txãawe'sx atxhtxi dxi'jsutx pusna u'jwe' Jesus skhẽwwa'jsu. Maai' yu' ejxa spẽ'thçxa txã'wẽytxi dxi'jsu pusna u'jwe'.

9 Aça' nasa' yaçte u'jsa vxite' e'ste yu-usa txãawe'sx jxukaysa na'jĩnatx sus we'wena u'jwe':

—Dxus kaahnisa wala yuh jxtuhthesa yuja' jxkaahsa Davxid ji'j. Dxusa's weçxaaga wala ew yũupa'ga jĩ'tx.

10 Txajũ' Jesusa' Jerusalente u'kate', kxtee nasa jxukaysa seena' wala sustxi na'jĩna paapẽjxna:

—Na' çkimna? jĩte',

11 pta'sxtxi na'jĩna:

—Naai' Dxus yuwe pta'sxsa Jesusa', Galilea kiwesu Nasaret çxhabetewe'sx jĩ'tx.

*Dxuus yatte txweysaatx Jesus kasxisxni
(Mr 11.15-19; Lk 19.45-48; Jn 2.13-22)*

12 Txã'wẽ yũuni e'su' Jesusa' dxuus yatte u'kaçxa jxuka eka kasxisxku kxtee txweyna ki' weyna ũssatx. Sa' vxxyu yu'pthehna ũsni mesa vxite' tub çxihme txweyna u'pnitxwa jxuka pũsxku.

13 Sa' na'wẽk we'we:

—Dxus libroute' na'wẽk we'we': Adx yata' Dxus yakh puutx we'wena ũswa'jçxá' jĩ'k. Nawa i'kwe'sxa' peswée pkhaakhena ũsni kafx na'wẽçxáa vxitçxa ji'phi'kwe jik.

14 Kxtee dxuus yatte maai' yu' Jesus tasxte utxaatx, uyya' añasamée, çxida legsa, aça' txãawe'sxtxi' nuykatxhik.

15 Nawa sacerdote npiičthē'jwe'sx vxite' ley kaapiya'jsawe'sx txãawe'sxa' ũusaçxatx, txã'wē kim yuhwa ājanimeesa's kaavxya'ja'the' kxtee dxuus yatte ũssa luuçxa' sus we'weçxa' jxkaahsa Davxid ji'ja's wala weçxa'tha'w jīna susni's wēse'jçxa.

16 Sa' Jesusa's pějxtxi:

—Na'wē we'wena ũsta' txã'sa' ¿wēse'je'ga'? jīte', Jesusa' pasku:

—Wēse'je'īith. Nawa i'kwe'sxa' ¿iilēeymeekwe'? txã'wē yūuwa'ja's Dxus librute na'jīnak we'we':

Luuçx le'çxkuē vxite' çxu'çxsawa txã'wē zhiçxkwe tuuthe'jwa'ja'sgu vxit jī'k.

17 Txajū' Jesusa' kxtee nvxihtçxa u'kh çxhabu kasehna sa' Betania çxhabtek pe'te.

Higwera fxtūu tasx yūnsame's Jesus açewe'weni

(Mr 11.12-14, 20-26)

18 Kuskuskhē' Jesusa' çxhabna ki' sxawedna u'jweççxa', wēek.

19 Sa' dxi'j pukate higwera fxtūu tasx ũste uyçxa', thegya' utxaak. Nawa kīh yūn yuhwa uyme', eççxáak ji'ph yu'. Aça' txãa fxtūu tasxa's na'wēk we'we':

—Āçxha' peena yu' yūnmeene'ga jīçpkaçxha', naa dudtey fxtūu tasxa' uhdxku.

20 Txãa yakh u'jusawe'sxa' txã'wē uyçxa', wala kuh yajkxna na'wētx pějx Jesusa's:

—Fxtūu tasxa' ¿kīh yūuçxaga txakwe wala dud uhdx? jīte',

21 Jesusa' na'wēk pas:

—Isath we'we': Kuh jwed yajkxmée Dxusa' pasyujuna sūhwa'jçxá's yajkçxa', adx vxitthu txã'wēçxáamée, na'wē yūuya'wa ājane'kwe: Naa vxiç wala ayjxu u'jçxa ĩkh walate tee khēe jīne'kwe, aça' kxtey yuuna.

²² I'kwe'sxa' kīh pējxçxawa Dxus yakh puutx we'wene'kwe Dxusa' pasuna sūhna, sa' txã'wē yūuçxa' jxpa'gane'kwe jík.

Dxuus yatte Jesus juuna' yūuni's pēyni

(Mr 11.27-33; Lk 20.1-8)

²³ Txajū' Jesusa' dxuus yatte u'kaçxa kaapiya'jaçpkaçha', sacerdote npiiçthē'jwe'sx vxite' judiu nthē'jsawe'sx kūhçxa' na'wētç pējx:

—¿Kīh yūupa'gaga txã'wē dxuus yatte jxuka suw? ¿Kimga jxkaah txã'wē yūuwa'ja's? jīte',

²⁴ na'wēk pas:

—Adxwa i'kwe'sxtxi pējx ya'wath, aça' adx pēyni's pasya' ājate', adxwa pta'sxi'nja kim jxkaathe txã'wē yūuçxawa.

²⁵ Juana's ¿kimga jxkaah yu'te bautisāykahn? ¿Dxus wá' jxkaah, meeçxa' naa kiwete piçthē'jwe'sx wáa ne'ta jxkaah? jīte', txāawe'sx pwe'sx puutx ya'paapēyi'tx:

—Dxusne' jxkaah jīna paste', txã'wēte' ¿mjīitekwe nwēese'jmée? jīna.

²⁶ Aça' naa kiwega nasa jxkaahnine' yu' jīya'wa ājame'nja'w. Txã'wēme', nasa jxukaysa Juan ju'guçxaçxáatx we'we', Dxus jxkaahnine' yu' jīna txáatxtha'w ũukhu' jīnatx puutx we'we.

²⁷ Sa' ājameeçxa', Jesusa's na'wēçxáatx pas:

—Jiimeetha'w jīna. Aça' Jesuswa txã'wēyçxáak pas:

—Adxwa pta'sxme'nja kim jxkaathe txã'wẽ yũuçxawa jĩk.

E'z nçxi'ksatx kaaja'da'jçxa kaapiya'jni

²⁸ Txajũ' Jesusa' na'wẽk we'we:

—I'kwe'sxa' ũus miijajkxwe, na'wẽ kaaja'da'jçxa pẽjxya'wath: Teeçx piçthẽ'ja' e'z nçxi'kku ji'phu', sa' teeçxsa's na'wẽk jxkaah: ãçxha' adx mjii ehte uwa uhdeya' me'j jĩte',

²⁹ nçxi'k paşçxa': U'j wẽemeeth jĩçxawa, ũus yajkxna u'pçxa', mjiiya' u'kh.

³⁰ Txajũ' neya' vxite nçxi'ka'swa txã'wẽy jxkaakh. Aça' txã' na'wẽk pas: Ewna, u'jwe'nja jĩçxawa u'jme'.

³¹ ãçxha' i'kwe'sxtxi çma'wẽga thegu'? çMaasaga ney jxthãasni's kxtey yuu? jĩte', txãawe'sx paşçxa': Nyafxte jxkaahnisa nçxi'k jĩtx. Aça' Jesusa' na'wẽk we'we:

—Isath we'we', gobierno jii vxyu pkhakh-sawe'sx vxite' u'ywe'sx pkal yuuna fxi'zesa txãawe'sx khuẽ'y Dxus jxkaahnite u'katxna, naapkaçxha' i'kwe'sxa' u'kaya' ãjamée ũsi'kwe.

³² Txãa pa'gatey Juan Bautista' kaapiya'jna pa'kh pçumée itxi fxi'zewa'ja's. Txã'wõtewa, i'kwe'sxa' jxpa'gameei'kwe. Naapkaçxha' gobierno jii vxyu pkhakhsawe'sx vxite' u'ywe'sx pkal yuuna fxi'zesa txã'wẽsa yu' jxpa'gatx. Nawa i'kwe'sxa' yafxju uyçxawa pkaltxi nvxihtçxa Dxus tasxte sxawedmeei'kwe.

Mjũisawe'sx patron nçxi'ka's ikhni yakh kaaja'da'jni

(Mr 12.1-12; Lk 20.9-19)

33 Vxite ejemplo na'sna mwēese'jwe: Teeçx kiwe namu' uuthasx vxitku, sa' peeku'j uphçxa teeçx ahte uwa's ku'swa'j txajk, sa' ēete tejkaçxa jxuka thegwa'j yatwa txajk. Txã'wē yūuçxa txãa kiwe's mjīisatx pki'jçxa jxu'j dxi'kh u'j.

34 Uwa thē'jwa'j en āhte', txã'sna selpisaatx kaakh kiwee pki'jnipa'ga pējxya'.

35 Nawa kiwee pki'jsawe'sxa' txãa selpisaatx uweçxa maaíi yuutxi' pāpana vxitetx ikhna vx-itetxi' kwet wāatatahnatx yūu.

36 Txã'wē yūute', kiwe namu' jweeíçxáak kuh kaahna ūsu' selpisaatx. Nawa kiwee pki'jsawe'sxa' jxukaytxi txã'wēçxaçxáatx yūu.

37 Txajū' nmehte' txajx nçxi'k yuunak kaah: Adx nçxi'ka's kuçx txã'wē yūumeewáatxna sūhçxa.

38 Nawa kiwee pki'jsawe'sxa' nçxi'ka's uyçxa', txãawe'sx pwe'sx na'wētx puutx we'we': Ney uute' naa txã'wē kiwe's iiyamuwa'jsa', aça' txã'sa' ikhega kiwe' kwe'sx jīi yuukahn jī'tx.

39 Txã'jīyā'jçxa', uweçxa txãa kiwejū kutxi'jçxa ikhtxi.

40 Txã'wē pta'sxçxa', Jesusa' na'jīnak pējx:

—Txã'wē yūute', kiwe namu pa'jçxa', ¿kīh yūukx kiwee pki'jsawe'sxtxi'? jīte',

41 na'wētx pas:

—Txãa ewmeesatxi' peeygāhmée ikhçxa txãa kiwe's vxitetx pki'jina kiwee pa'ga namu's wa'lmée dukhwa'jsatx jītx.

42 Aça' Jesusa' na'wēk we'we:

—I'kwe'sxa' ¿bagaçxte yuhwa
iilēymeewá'kwe Dxus librute na'jīna fxi'jni's?

Yat txaahsawe'sxa': Naa kweta's selpime' jĩçxa wãatahtx.

Nawa txãa íik yat makwesanawa çxhãçxha neewewa'jsa yuuna pa'j.

Txã'wẽ neewewa'jsa yuuna pa'jwa'ja's Dxusku vxitçxa nvxiht.

Txãa pa'ga kwe'sx yakha' wala weçxa yuja' çjĩ'çmeena'?

⁴³ Txã'wẽ açepa'ga íiçxáath na'jĩ': Dxus jxkaahni's i'kwe'sxtxi kusa'jçxa vxite nasatx ũsni yuuna, kiwe namu's pki'pha'ga wa'lmée dukhkahn.

⁴⁴ Sa' maawa txãa kwet kajkwega wetesa' jxuka çxkateteena, meeçxawa txãa kwet nasa kajkwekhẽ weteçxa' jxuka ku'çxina jĩk.

⁴⁵ Aça' sacerdote npiičthẽ'jwe'sx vxite' fxariseowe'sxa' jiyutx txãawe'sxtxi íiçxáa we'weçxa txã'jĩni's.

⁴⁶ Sa' tud wẽeçxawa ũukhtxi, txã'wẽ nasa' Jesus ju'guçxaçxáatx ũs yu', Dxus yuwe pta'sxsa' jĩna txãa pa'ga.

22

Boda fxiesta yakh kaaja'da'jçxa kaapiya'jni

¹ Jesusa' vxite ejemplo kaaja'da'jçxak pta'sx na'jĩna:

² —Dxus jxkaahni ente' na'wẽ yũuna: Teeçx jxkaahsa' txajx nçxi'ka's kaaba'jçxa fxiesta vxitku.

³ Sa' txãa jxkaahsa' selpisaatx jxkaakh pi'kxnisatx pa'yakahn. Nawa txãawe'sxa' wa'lçxa yuwe'çmeeta'.

4 Txã'wētewa, ki' jxkaakh vxite selpisaatx na'jīna: Pi'kxnisatxi' yuukajane'kwe. Ũ'wa'ja's jxuka pheu'jniyã'j ji'pthu, tajkx kaaniisxi'jnisatx kiikhe'th, aça' myuhwe boda fxiestate jī'k jīne'kwe.

5 Txã'wē kxtey yuutewa, pi'kxnisawe'sxa' nwēese'jmée wejxwa txāawe'sx uuthasxsu vxite' txāawe'sx vxyu knaynisuçxáatx u'j.

6 Aça' vxite yu' selpisaatx uweçxa wala pãpatx ikhpkaçx.

7 Txã'wē yūute', jxkaahsa' seena' wala ũusaçxak, sa' txajx soldauwe'sxtxi kaakh txāa nasa ikhsatx ka'tuwa ikhçxa txāawe'sx çxhaba's jxuka kabkahn.

8 Txajū' jxkaahsa' na'wēk we'we txã'sna selpisaatx: Boda fxiestate ũ'wa'j jxuka pheu'jniyã'j ũsa', nawa pi'kxnisawe'sxa' wa'lçxa pa'jmeeta'.

9 Aça' açxha' me'jwe klxiikhunsuwe'sxtxi pi'kxya' maatzwa jxuka boda fxiestate yuukahn.

10 Txã'jīte', selpisaawe'sxa' klxiikhunsu u'jçxa maatzwa jxuka pkhakhtxi ewsa ma'k yuu meeçxa' ewmeesa ma'k yuu nawa jxuka. Aça' fxiesta yatte jxuka nasa utatx.

11 Txajū' jxkaahsa' pi'kxnisatx thegya' u'kaçxa', uyku teeçx piçthē'j txã'wē boda fxiestate athni ropa yakhmée u'pte.

12 Sa' na'wēk we'we: Namiku, idxa' çkījxa'ga ayte u'ka', boda fxiestate athni ropa ji'phmeeçxa'? Txã'jīte', txāa piçthē'ja' pasmée sxuuna'k neeyūu.

13 Aça' jxkaahsa' mesate puuçuçsatx na'jīnak

jxkaah: Naa piçthê'ja's uweçxa mtudwe çxida petx kuse yã'jçxa, sa' ekaju kutxi'jçxa çxhi'dx walate makhwe, kxte' ki'thtxi ksuusu'jna ü'nena ùukhkahn.

¹⁴ Txãa pa'gatey wala yuh pa'yatewa, jxukay yu' utxaawa'jsameeta' jìk.

Gobierno's dukhwa'ja'swa pēyni
(Mr 12.13-17; Lk 20.20-26)

¹⁵ Txajū' fxariseowe'sxa' u'jçxa txãawe'sx pwe'sx puutx we'wetx Jesusa's ewmeete nvxiit wēeçxa.

¹⁶ Txã'wē yūuçxa' txãawe'sx ju'gu ūssa vx-ite' Herodes nasa txãawe'stxi' kaahtx Jesusa's na'jīna pēykahn:

—Kaapiya'jsa, idxa's jiitha'w, kīhtewa isasaçxáanag we'we'. Sa' Dxus tasxte pa'jwa'j dxi'ja'swa ew yuuçxáag kaapiya'ja'. Nasaa jxkaahna yu'kxpehniix nwēese'je'çmeeg, txãa pa'gatey idxa' nasa ewsa na'wē thegsatx jiyumey ju'gu yu'çmeeg.

¹⁷ Idxa' ¿ma'jīki'g? Jxkaahsa Cesara's vxyu dukhte ¿ewmanx? Meeçxa' ¿dukhmeete wáa ewna? jīte',

¹⁸ Jesusa' na'wēk pas txãawe'sx ewmée yaakxni's jiyuçxa':

—Adx dxi'pteçxáa ew we'weçxa', ūuste yu' ewmée yaakxsawe'sx, ¿kījxa'kwe adxa's ewmeete nvxiit wēeçxa txã'wē pēyí'?

¹⁹ Dukhwa'j vxyu's mneejxūhwe jīte', teeçx vxyu's jxūna kūhtx.

²⁰ Aça' Jesusa' thegçxa' na'wēk pējx:

—¿Kiim dxi'pa's ki'pnina, sa' kiim yase's fxi'jnina naa vxyute'? jíte':

²¹ —Cesar dxi'pa's ji'pha', sa' txajx yase's fxi'jni' jīnatx pas. Txajū' Jesusa' na'wēk jxkaah:

—Cesar jī's Cesara's dukhwa'ja', sa' Dxus jī's Dxusna dukhwa'ja' jíte',

²² paapēysawe'sxa' wala kuh yajkxna neeyūtx, sa' txajū u'jtx.

*Uusaawe'sx ki' itxi yuuwa'ja'swa pēyni
(Mr 12.18-27; Lk 20.27-40)*

²³ Txāa entey saduceowe'sx maaíi yu' Jesusa's thegya' pa'jtx. Nasa' uuyā'jçxa' peena yu' itxi yuuwa'jsameeta' jīna we'wesatx yu' txāa saduceowe'sxa'. Txāasa na'wētx paapējx:

²⁴ —Kaapiya'jsa, meen peeta'sx. Moises we'weçxa': Maa piçthē'jwa luuçx ji'phumey nyu's nvxihtçxa uute', uusáa nyakha' txāa u'y neeyūusáa yakh kabawa'jsa', aça' txāate luuçxa' uusáa nçxi'k na'wē neeyūuna jī'k.

²⁵ Aça' kwe'sxa' jiitha'w siete piçthē'j pxakhtxi u'pu'. Aça' nyafxtewe'sxa' kabaçxawa luuçx ji'phumey uuk, txajx nyua's nyakh e'stewe'sx jīi nvxihtçxa.

²⁶ Aça' nyakh e'stewe'sxwa txā'wēyçxáa nyakh tekhtewe'sx jīi nvxihtçxak uu, sa' txā'wēçxaçxáatx yūu siete pxakhsay.

²⁷ Aça' nmehte' txāa u'ywa uuk.

²⁸ Txā'wē uuçxawa ki' itxi yuu ente', ¿maa yakh isa nyu yuuwa'jsakx? txā'wē kxaz pxakhsatxíi txāa u'yçxaçxáa iimi'sa' na' jíte',

²⁹ Jesusa' na'wēk pta'sx:

—I'kwe'sxa' Dxus librute fxi'jni ũsa' txã' isa yuhna sũju'çmeee'kwe, sa' Dxusa' kïjxa'wa jxuka ãjana sũju'çwameei'kwe. Txãasa jxpubana ũsi'kwe.

³⁰ Uusaawe'sxa' ki' ïtxi yuuçxa' peena yu' kabana fxi'zewa'jsameeta'. Txãawe'sxa' cielute ũssa Dxus angeleswe'sx na'wësaçxáa yã'tha'.

³¹ Nawa uuçxa' ki' ïtxi yuuwa'ja's i'kwe'sxa' iilëeymeewá'kwe Dxusíwa na'wëk we'we:

³² Abraham, Isaak, Jakob txãawe'sx Dxusthu adxa' jï'k. Uuçxawa ki' ïtxi yuusaawe'sx Dxusthu jïçxak txã'jï'.

³³ Txã'wë wëse'jçxa', wala kuh yajkxna neeyũtx txã'wë zhiçxkwe Jesus kaapiya'pha'ga.

Dxus ley maatewa jxthaakwesa
(Mr 12.28-34)

³⁴ Jesus txã'wë saduceowe'sxtxi sxuuna' vx-itni's fxariseowe'sx jiyuçxa', pkhaakhetx.

³⁵ Sa' Dxus ley kaapiya'jsa teeçxa' Jesus tasxte utxaak pëjxya' ewmëe pastewa jiyu wëeçxa. Sa' na'wëk pëjx:

³⁶ —Dxus leya' maatewa jxthaakwesa' ¿maana? jïte',

³⁷ Jesus pasçxa':

—Dxusa's ũusuh jxuka yajkxçxa txãa yuuçxáana selpiina fxi'zewa'ja' bagaçxte yuhwa txutemëe uu entepkaçx.

³⁸ Naa txã'wë jxthaakwesa'.

³⁹ E'stewe'sxa' txã'wëydxí'a': Peekíi ma'wëga ya'peeygãja', txã'wëy mpeeygãh vxite nasatxwa.

40 Dxus jxkaahni naa e'zsaçxáa Moises leytxi jxuka áhsata', txã'wěy Dxus yuwe pta'sxsawe'sx kaapiya'jnitxwa jxuka jĭk.

Dxus tasxu yuusa' ħkiim nçxi'kki? jĭna Jesus pěyni

(Mr 12.35-37; Lk 20.41-44)

41 Fxariseowe'sx pkhaakheçxa kxtee nee ũsiyna,

42 Jesusa' na'wěk pějx:

—Kristo' ħkimna sĭju'kwe i'kwe'sxa'? ħKiim nçxi'kna sĭju'kwe? jĭte', txãawe'sx pasçxa':

—Davxid nçxi'kna sĭju'tha'w jĭte',

43 Jesusa' na'wěk we'we:

—Txã'wěte', ħma'wěçxaga Davxida's Dxus Es-
piritu kaayaki'the' Kristo's we'weçxa' na'jĭ:

44 Adxna jxpe'jsa Kristo's Dxusa' na'jĭk:

Adx pukate paçu ju'gte mkaaçx,

Idxna açesatx idxçxaçxáana nwěese'jwa'ja's vx-
itna jxã'phkaçx jĭk.

45 Txã'wě Davxidĭwa Kristo's we'weçxa': Adxna
jxpe'jsa jĭnak kxsusu' aça' Kristo' ħma'wěçxa
Davxid nçxi'k yuukx? jĭte',

46 kim yuhwa teeçx yuweçxáawa pasya'
ájameeta', sa' txajŷyã'ja' peena yu' pějxmeeta'
kim yuhwa.

23

*Fxariseo vxite' ley kaapiya'jsawe'stxxi yuuwesa
Jesus nvxiitni*

(Mr 12.38-40; Lk 11.37-54; 20.45-47)

1 Txajŷ' Jesusa' na'jĭnak we'we txãa yakh
u'jusawe'sx petx vxite nasa yã'jçxa:

2 —Ley kaapiya'jsa vxite' fxariseowe'sx txãawe'sxa' Moises leya's wala ew jiisa txãa leya's nwēese'jwa'ja's jxkaahsatha'w sūju'tx.

3 Txã'wēyã'the', i'kwe'sxa' mwēese'jwe ley ewsa ma'wē jxkaathe' txãa yu'sa' jxuka. Nawa txãawe'sx na'wē yu' yūuna fxi'zenuwe. Txãawe'sxa' nasa yuutxi' leya's nwēese'jwa'ja's jxkaahçxawa txãawe'sx yu' leya's nwēese'je'çmeeta'.

4 Tū'swa'j iiméh wala duhsa pheu'ju'tx txã'sa' kim yuhwa çxhãçxhameena. Txã'wēsa'stxi nasatx ktū'se'je', nawa txãawe'sx yu' le'çxkuē kuseteçxáa yuhwa at pu'çxhi'çmeeta'.

5 Maawa uykahn sūhçxa iwejçx iwejçx yajkxna áate yu' kíhwa yu'tx Dxusna yaakiçtha'w jīna. Txãasatx Dxus jxkaahni's eçte fxi'jçxa kajate akhçxa dxiktheuy vxite' kusesu tudçxa fxi'ze'. Sa' nasa jiyuni fxi'zeyá' sūhçxa athni ropawa thaakwe jxu'jsa iijxūçxatx fxi'ze'.

6 Fxiesta yat-su pi'kxni u'jçxa', kaçxni wejx ewsaçxáanatx pakwe' iwejçx yajkxna. Sa' judi-uwe'sx pkhaakhenisuwa txã'wēytxi yu'.

7 Klxiikhunsu msuuwa nasatx wala ewçxáa we'wena weçxaa jxthãasnatx pekūju', kaapiya'jsa jīna kxsus jxthãasna.

8 Nawa i'kwe'sxa' txã'wē kaapiya'jsa jīna kxsus jxthãasna fxi'zenuwe. Txãa pa'gatey i'kwe'sxa' kaapiya'jsamée maa yakhwa jxuka pxakhsaçxáai'kwe, naasáa kaapiya'jsa' teeçx yuuçxáa ji'phi'kwe txã' Dxus kaahni Kristo'.

9 I'kwe'sxa' naa kiwetewe'sxtxi' kim yuhnawa tata jīna kxsusnuwe, txãa pa'gatey teeçx Tata

yuuçxáa ji'phi'kwe txã' cielute ũsa'.

10 Sa' npiiçthê'j jxpe'jsa jĩna kxsus jxthãasnawa fxi'zenuwe, txãa pa'gatey Npiiçthê'j jxpe'jsa' teeçx yuuçxáa ji'phi'kwe txã' Kristo'.

11 Maatxwa selpiina fxi'zeçxa yuuçxáa jx-tuhthesa yuune'kwe.

12 Txã'wême', maawa peekiçxáa walasath sũhna iiwejçx iiwejçx yaakxsa' ãhmeekuêsa yuuna, nawa ãhmeekwesath sũhna fxi'zesa' walasa yuuna.

13 Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha', txã'wê Dvus jxkaahnite u'kawa'ja's apha'i'kwe maawa u'kakahmén. Sa' vxitesatx ka'ga'jmeeçxa', i'kwe'sxçxáa yuhwa u'kaçmeei'kwe, txãa pa'ga ũukhũukha'.

14 Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Vxiudawe'sx yattxi kusa'jçxa txãa kusa'jnitx kaapeçxkana'jya' sũhçxa wala jxu'j lisa'i'kwe. Txã'wê yũupa'ga i'kwe'sxa' jxthaakwe Dvus kastigãyni yuune'kwe.

15 Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Mtee mteewa pekũju'i'kwe nasatx i'kwe'sx ju'gu tuphy wêeçxa i'kwe'sx kaapiya'jni's pta'sxna. Nawa nasatx knayçxa', txãa nasatxi' i'kwe'sx ũswa'j infxiernotey nvxiit-sa i'kwe yu'.

16 I'kwe'sx yakha' seena' yuh ũkhũukha', jiimeeçxa na'jĩna i'kwe kaapiya'ja' naa pa'ga: Pu-utx we'weni's kxtey yu'nja jĩçxa dxuus yata'sçxáa kxsusna jurãyni's kxtey yuumeetewa, kĩh yu-umeena. Nawa dxuus yatte vxyuu beja's kxsusna jurãyni's yuuçxá' kxtey yuuwa'j yuja' jĩ'i'kwe.

17 Jiimée luuku we'wesa, Dxus dxi'pte' ¿kĩh wejx jxthaakwe ewsakx, vxyuu beja' meeçxa' dxuus yata'? E'zĩi ¿Dxus jĩiçxaçxáa meetxna'?

18 Txã'wěy na'jĩ'i'kwe: Dxuus yatte altala'sçxáa kxsusna jurãynisa's kxtey yuumeetewa, kĩhwa yuumeena. Nawa altalte kabwa'ja's kxsusna jurãynisa's yuuçxá' kxtey yuuwa'j yuja' jĩ'i'kwe.

19 Jiimée luuku we'wesa, Dxus dxi'pte' ¿kĩh wejx jxthaakwe ewsakx, dxuus yatte altala' meeçxa' altalte kabnisa'? E'zĩi ¿Dxus jĩiçxaçxáa meetxna'?

20 Maawa dxuus yatte altala's kxsusna jurãysa' txã'sçxáana kxsussa yu'çme'. Altalte kabnisa'swa jxukak kxsussa yu'.

21 Txã'wěy maawa dxuus yata's kxsusna jurãysa' txã'sçxáana kxsussa yu'çme'. Kxtee ũssa Dxus ĩtxisa's kxsussak yu'.

22 Txã'wěy cielu's kxsusna jurãysa' cieluçxáana kxsussa yu'çme'. Dxus jxkaahna ũsni's jxukak kxsussa yu' petx Dxus yã'jçxa.

23 Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũkhũukha'. I'kwe'sx ũusteçxáa yajkxçxa kaapiya'jçxa', putatxhã' ma'k yuu meeçxa' me'sukwe ma'k yuu komino ma'k yuu txã'wěsatx diez eç uhdeçxa'

teeçx eça's kutxi'ji'kwe Dxus jĩ' jĩna. Nawa Dxus ley jxkaahçxa': Dxus dxi'pte ew fxi'zena, vxite nasatx peeygãhna, Dxusa's ũusuh jxuka yajxna txã'wē yūuwa'ja' jĩ'k txãa isa jxkaahni yu's kxtey yu'çmeei'kwe. Nawa na'wē Dxus jĩ' jĩ'i'kwe txãa yu's nvxiitwa'j yu'me'.

²⁴ Jiimée kaapiya'jsa, fxĩsx le'çxkwesa yu-utxi' a'çha'i'kwe, nawa kamelxo walasa yu'sa' uymeeçxa jxkhēje'i'kwe.

²⁵ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Waso ma'k yuu meeçxa' plaatu ma'k yuu txã'wēsatsx ekaju yu' wala ew pkhi'khi'i'kwe, nawa dxiikhē yu' vxite jĩitx pesweeçxa abnisaçxáa uta ji'phta'.

²⁶ Fxariseo jiyu'çmeeg. Dxiikhē khuē'y pkhi'kxwa'ja' waso vxite' plaatutx, kxah ekajuwa jxuka ate yuuna.

²⁷ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Uusáa pedani's kajkwekhē pçxiime'the', zhiçxkwek vxya'. Nawa dxiite yu' uusáa dxi'thçxáa utak kazx putana ũsu'.

²⁸ I'kwe'sxa' txã'wēysa i'kwe. ãakhē yu' nasaa dxi'pte wala ew na'wē thegu'i'kwe. Nawa ũuste yu' kazx ewmée yaakxnisaçxáa uta ũsa'.

²⁹ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. I'kwe'sxa' ewkuē pheu'jna nes yu' Dxus yuwe

pta'sxsa vxite' nasa ewsa txãawe'sxtxi pedaní kafxsu.

³⁰ Sa' na'jĩ'i'kwe: Kwe'sx yaçgawe'sx fxi'zeni ente kwe'sx ũswaça', kwe'sxa' ikhwa'jme'ntka'w yu' Dxus yuwe pta'sxsatxi' jĩ'i'kwe.

³¹ I'kwe'sxa' Dxus yuwe pta'sxsawe'sxtxi ikhsa nwe'sxi'kwe, txãasa i'kwe txãa ikhsawe'sxtxi' kwe'sx ji'j yaçgawe'sx jĩna we'we'.

³² I'kwe'sx yaçgawe'sx kĩhne'ta yũusa yu', aça' i'kwe'sxwa txã'wěy yũuna nes yuune'kwe.

³³ Ul weeswée seena'sa ji'j, ¿ma'wě yũuçxa infxiernote kastigãywa'the pa'jmée yuuki'kwe?

³⁴ Txã'wěsa yã'ji'kwe na' i'kwe'sxa' maaiĩtxi' kluuskhē ki'pna ikhna, vxitetxi's judiuwe'sx pkhaakheni yaçu pãpana, vxitetxi's ahçeçxa çxhab iisa ikhya' pakwena nes yuukahn adxa' kaajxa'wath Dxus yuwe pta'sxsa vxite' kĩhtewa wala jiisa vxite' kaapiya'jsa txãawe'sxtxi.

³⁵ Txã'wě Abela's ikhnijũjx nasa ewsatx ikhya' takhçxa Berekias nçxi'k Zakariasa's Dxus al-tal pukate ikhi'kwe txãa entepkaçx ikhnisatx i'kwe'sxçxaçxáa yuuwesa yuune'kwe.

³⁶ Isath we'we' nyafxiitey ikhnisatxi's nasa naa ensuwe'sx txã'wě yuuwesa yuutxna.

Jesusa' Jerusalena's thegçxa ũ'neni
(Lk 13.34-35)

³⁷ Jerusalente nasa, i'kwe'sxa' Dxus jxkaahnisa txajx yuwe's pta'sxsawe'sxtxi ikhe'i'kwe, maaiĩtxi' kwet wãatatahna. Maz uswa pkhakhçxa nwe'we wěeth i'kwe'sx luuçxtxi, atalxwa ma'wěga luuçxkuẽtxi's fxuu ku'ta dxiite ãsxi' txã'wěy, nawa wa'li'kwe.

38 Mwēese'jwe: i'kwe'sx ũsni' thegnimée neeyũuna.

39 Na'jĩ'th na': peena yu' adxa's uymeene'kwe, Dxus tasxu yuusa wala ewsa yuja' jĩna we'wewa'j en āhpkaçx.

24

*Dxuus yat pçuwa'ja's Jesus pta'sxni
(Mr 13.1-2; Lk 21.5-6)*

¹ Dxuus yatu kasehçxa Jesusa' u'jweçpkaçxha', txãa yakh u'jusawe'sxa' utxaaçxa we'wetx dxuus yata's pta'sxna.

² Aça' Jesusa' na'wēk pas:

—Txã'wē yuh seena' zhiçxkwe wala'. Nawa na'jĩ'th na': jxuka pçuuna, aça' txãa yat-tewe'sx teeçx kwetçxáa yuhwa kēese'jnimeesa yu' neeyũumeena jĩk.

*Naa kiwe pçuwa'j en ājaçte seena'sa vxyaawa'j
(Mr 13.3-23; Lk 21.7-24; 17.22-24)*

³ Txajũ' Oliwos vxıçnatx u'j. Kxtee pa'jçxa Jesus kaçxçxa u'pte', txãa yakh u'jusawe'sx maaii yu' na'jĩnatx we'we paaçte:

—Meen peeta'sx, çbagaçx txã'wē jxuka pçuukx? Sa' iidx kīiwa'j en vxite' naa kiwe pçuwa'j en ājaçte', çkĩh seena'sa vxyaakx? jĩte',

⁴ Jesusa' pta'sxku:

—Mpa'yajkxwe, i'kwe'sxtxi kaypuba'jwe'sxte.

⁵ Txã'wēme', wala pa'jatxna adx yase's kx-susna na'jĩna: Dxus kaahnisa Kristoth jĩtxna, sa' txã'wē yũuçxa wala kaypuba'jatxna ĩsxiina.

⁶ I'kwe'sxa' wēse'jene'kwe gweçxa msuu msu-uwa u'pa' jīni. Txã'wē yūutewa i'kwe'sxa' ũukhnuwe, txã' nmeh en yu' me'.

⁷ Gobierno' vxite kiwete gobierno yakh pui-itxna, naapkaçxha' puutx jxu'j kiwejũ pwe'sxwa puuitxna. Txã'wē mtee mteewa jxuka gweçxa kiiteena. Sa' wēje enwa pa'jana, wee seena'sawa pa'jana, ehdwa seena'sa u'jwetxna mtee mteewa.

⁸ Txã'wē seena'sa pa'jçxawa txãa yu' nyafxte nxusya' takhnisaçxáa yuuna.

⁹ Txajũ' i'kwe'sxtxi uweçxa dukhetxna pãpana ikhkahn, sa' naa kiwete mteewe'sxwa jxukaysa açetxna adx jxkaahni's nwēese'pha'gaçxáa.

¹⁰ Txã'wē yūute', maazkuēesawa Dxus tasxu txuteetxna, sa' puutx yahçena vxitesa uweçxa ikhwa'ja's vxitutxna.

¹¹ Wala ĩsxiisa vxyaatxna, adxa' Dxus kaahni yuhth jīna nasa maazkuēesatxwa ĩsxiiatxna.

¹² Sa' ewmée yūuna fxi'zewa'jçxáa txakwe wala pa'the', puutx ya'peeygāhna fxi'zewa'j yu'sa' ivxiitutxna maazkuēesawa.

¹³ Nawa uu entepkaçx Dxus yakh txutemée fxi'zesa' ewte neeyūutxna.

¹⁴ Naapkaçxha' Dxus jxkaahwa'ja's pta'sxnisa' maa kiwetewa jxuka pta'sxni yuuna mteewe'sxwa jxuka jiyukahn. Txã'wē yūunijũ nmeh ensa pa'jana.

¹⁵ Na'wē yūuwa'ja's jxpa'yakx lēeyçxa jii mfxi'zewe Dxus yuwe pta'sxsa Daniela' pta'sxna fxi'kh dxuus yatte kazx ewmée yūuna pa'jwa'ja's. Aça' txã'wē seena' kazxsa pa'jçxa dxuus yatte u'kaçte uyçxa',

16 Judea kiwesuwe'sxwa jxuka ũphna u'jwene'kwe vxiç walasu ũsya'.

17 Sa' ěe yat-su ũssawa sa'jçxa kĭhçxáanawa kutxi'jwa'j en ji'phumeetxna.

18 Txã'wěy mjĭi ehsu u'jusawa txajx atxha's nikxya' yatna u'jwa'j ençxáa yuhwa ji'phumeetxna.

19 Txãa ente' u'ywe'sx nasa ji'phsa meeçxawa luuçx āpākuē ji'phsawe'sxa' wala yuh pxthaa yuutxna.

20 I'kwe'sxa' Dxusa's mpějxwe txã'wě nus ente meeçxawa jxkaase ente ũphna u'jwa'j yuukahmén.

21 Txã'wě txãa ente' seena' yuh wala nxuswa'j yuuna. Naa kiwe's pheu'jiyna bagaçxte yuhwa txã'wěsa yu' iuu'pume', sa' txã'wěsa skhěwniijũyã'ja' peena yu' u'pumeena txã'wěysa yu'.

22 Dxusa' en txã'wě seena'sa's txaçxmée vx-itmeete yu', kim yuhwa ĩtxi neeyũumeetxna. Nawa txajx nasa txhitxhnisatx peeygãhçxa, en txã'wě seena'sa's txaçxmeeçxáa vxituna.

23 Maawa i'kwe'sxtxi we'weçxa', mthegwe Kristo ayte ũsa' jĭtxna, meeçxawa kxtee ũsa' jĭtxna, nawa txã'jĭni's nwēese'jnuwe.

24 Txãa pa'gatey wala ĩsxiisa pa'jatxna, adxa' Dxus yuwe pta'sxsath sa' Dxus kaahnisa Kristoth jĭtxna, txã'wě kim yuhwa ājanimeesa's kaavxya'ja'jatxna kaypuba'j wēeçxa. Txã'wě yũuçxa maaitxi' kaypuba'jatxna Dxus txhitxhnisa yuhtxwa.

25 Txã'wě yũuwa'ja's pta'sxyã'th i'kwe'sxtxi dxiikhěy.

26 Txãa pa'ga nwëese'jmeene'kwe makwe txã'wë kxtee ũsa' nasa u'pnimeete jítewa meeçxa' ay dxiite ũsa' jítxna.

27 Txãa pa'gatey Dxus Nçxi'k Nasa Yuusáa kii ente', kpi'sxwa ma'wëga sek kãanijũ kwehneçxa' sek khëenijũwa vxya' txã'wëyçxáa yuuna naa dudte jxukaysa dxi'pte.

28 Kakwe uuniisa mkaa ũstewa kxtee pkhaakhetxna mëewëjxa' ũ'ya'.

Dxus Nçxi'k Nasa Yuusáa seena' zhiçxkwe vxyaana

(Mr 13.24-37; Lk 21.25-33; 17.26-30, 34-36)

29 Txã'wë seena' nxuswa'j en skhëuuçpkaçxha', seka' çxhi'dxina, aç'a' a'te' kweethmeena. Naapkaçxha' estrelxa ũsxitxna, ãe walasu kîh seena'sawa jxuka këese'jni yuutxna.

30 Txã'wë yũunijũ', Dxus Nçxi'k Nasa Yuusáa kiiwa'ja's kaajiyu'jsa vxyaana cieluju, aç'a' naa kiwete nasa maazkuëesawa ũ'netxna Dxus Nçxi'k Nasa Yuusáa txã'wë cieluju tâaph pxâhte seena' zhiçxkwe vxyaana yuhte uyçxa.

31 Sa' txajx angeleswe'sxtxi jxkaajana seena' sus tujkaçxa txajx txhitxhnisatxi' pkhakhkahn naa kiwetewe'sx mtee mteewe'sxwa jxukaysatx.

32 Naa ejemplo's peçxkananuwe: higwera fxtũu tasxa' eç ubuçxa ki' u'se yeeçuçte uyçxa', yũnya'watewa jiyu'i'kwe.

33 Txã'wëy na'wë seena'sa vxyaaçte uyçxa', jii mfxi'zewe, pçuwa'j en utxaaçte txã'wë yuuna.

34 Isath we'we', naa ensu nasa' uumey txã'wë seena'satx uyuune'kwe.

35 Cielu naa kiwe jxuka skhēuutxna, nawa adx we'weni yu' kxtey yuumeey yu' skhēwmeetxna.

36 Nawa kīh ente kīh orate txā'wē yūuwa'j yu'sa' kim yuhwa jiimeeta', cielute angeleswe'sx Dxus Nçxi'k txāawe'sx yuhwa, naasáa Dxus yuuçxáa jiia'.

37 Noe entewa ma'wēga yuu txā'wēyçxáa yu-una, Dxus Nçxi'k Nasa Yuusáa kīi entewa.

38 Txāa ensu nasa' ĩkh utameyna yu' wala weçxana ũsu'tx ũ'na tudxna kabana Noe arkate u'kapkaçx.

39 Sa' Dxus kastigo's jiiimée ũsíi, ĩkh utate jxuka pçuuçyã'jçxaçxáatx jiyu, txā'wēyçxáa jiyumeetxna Dxus Nçxi'k Nasa Yuusáa kīi entewa.

40 Txāa ente' e'z piçthē'j mjīina ih ũsutxna, aça' teeçxsa's jxūna u'jni yuuna, nawa vxite's nvxiitni yuuna.

41 Txā'wēy e'z u'y ih ũ'khna ũsutxna, aça' teeçxsa's jxūna u'jni yuuna, nawa vxite's nvxiitni yuuna.

42 I'kwe'sxa' jxpa'yakx meswe. Txā'wēme', kīh ente kīh orate Dxus Nçxi'k kīiwa'jsatewa jiimeei'kwe.

43 Nawa jxpa'yakx meswe. Yat namuwa ma'wē peswée kīh orate yuhtewa jiyuçxa' dehmée jxpa'yakx ũyhasna u'pukx yatte pesweekahmén, txā'wēy myūuwe.

44 Txāa pa'ga i'kwe'sxwa jxuka pheu'jçxa meswe. Txā'wēme', yajkxmée ũsiyna Dxus Nçxi'k Nasa Yuusa' kīhçxáa yuuna.

Selpisáa ewsa vxite' ewmeesa
(Lk 12.41-48)

⁴⁵ Selpisáa ¿maa ewki patron neewe'weçxa nvxihtte kxte yattewe'sxtxi kwëeje'jmée sã'jĩwa'jsa?

⁴⁶ Patron neewe'weçxa nvxiitni's jxuka kxtey yuuna ũste patrona' thegna pa'the', txãa selpisáa yakha' wala yuh weçxa yuhna.

⁴⁷ Isath we'we': txã'wë yũusa's patrona' txajx ji'phuni's jxuka neewe'weçxa nvxiituna.

⁴⁸ Nawa selpisáa ewmeesa' patron pa'jya' jx-thëeyuuna sũhçxa

⁴⁹ kxte vxite selpisaatx pkxuuna tũusaawe'sx yakh tudxna ũ'na yũuna ũste',

⁵⁰ yajkxmée ũsiyna patrona' kĩh ente kĩh oratewa pa'jçxáa yuuna.

⁵¹ Sa' seena' wala nxus nxus kastigãina txã'wë yuwejuçxáa ew we'weçxa' ũuste yu' ewmeeçxáa yaakxsawe'sxtxi na'wëy. Txajũyã'ja' txãa selpisáa ewmeesa' seena' wala pebeena ki'thtxi ksuusu'jna.

25

Diez kna'sa yakh kaaja'da'jni

¹ Dxus jxkaahwa'j en ähte', na'wë yuuna: Diez kna'sawa ma'wëta lampara aceite awniisa's atçxa boda yatna u'j novxio's jxpa'gaya', txã'wëy yuutxna.

² Txãa kna'sawe'sx tahçsa' jxpa'yakxmeeçxa pheu'jmeetx u'j, sa' vxite tahçsa' jxpa'yakçxa jxuka pheu'jçxatx u'j.

³ Tahçsa' ew ùus yajkxmeeçxa', lampara yu'sa' jxũçxa u'jçxawa aceite yu' jxũmeetx u'j pçuute ki' awwa'j.

⁴ Nawa vxite tahçsa' aceite jxũçxatx u'j lam-paratewe'sx pçuute' ki' awwa'j.

⁵ Novxio pa'jya' jxthēeyuute', txāawe'sxtxi wala deewēe yuute' dehtx.

⁶ Txajũ' kuspxāh yuuçte', pthūusek na'jīna sus we'weni: Novxio yujxā'ja', aça' jxpa'gaya' myuhwe jīni.

⁷ Naapkaçxha' kna'sawe'sx kxazíi kiiteçxa lampara's pheu'jtx.

⁸ Aça' tahçsa jxpa'yakxmée u'jsawe'sxa' vxite tahçsatx aceite thāastxi: Le'çxkuēçxáawa peesune'kwe. Txā'wēme', kwe'sx pki'tanisa' ũçxhaça' jīnatx we'we.

⁹ Nawa kna'sawe'sx jxpa'yakx pheu'jçxa u'jsa' na'wētx pas: Ũsme'nja'w. Txā'wēme', kwe'sx jīi yuhwa āhmée ji'ptha'w, aça' i'kwe'sxtxi ũswa'j yu' wejx āhmeena. Wejx yuuwa me'jwe weyya' jī'tx.

¹⁰ Txā'wē tahçsa jxpa'yakxmeeçxa aceite weyya' u'jweçpkaçxha', ptamusá novxio' pa'kh. Aça' jxpa'yakx ũythāssawe'sxa' boda yatte novxio yakh u'kaçpkaçxha', vxitxa's aphtxi.

¹¹ Txāa e'suyā'jtx vxite kna'sawe'sx kũhçxa: Meen phaade jīna we'we.

¹² Nawa paşçxa': Isa, adxa' i'kwe'sxtxi' jiimeeth jīk.

¹³ I'kwe'sxa' jxpa'yajkx meswe. Txā'wēme', kīh ente kīh orate Dxus Nçxi'k Nasa Yuusáa pa'jwa'ja's jiimeei'kwe.

Mjūya' ājawa'jsatx vxyu's neewe'weçxa u'jni yakh kaaja'dajni

14 Teeçx piçthē'jwa ma'wēga vxite kiwen u'jweççxa', txā'sna selpisaawe'sxtxi pa'yaçxa tx-ajx vxyu's neewe'weçxa ūsçxa u'j, txā'wē yūuna Dxus jxkaahwa'j en āhte'.

15 Txāa piçthē'ja' selpisāa teeçxsa's vxyu taḥç milku ūs, sa' vxite's e'z milku ūs, sa' vxite's teeçx milku ūs, teeçxsa na'wēçxah makwesa's sxiigmée iijxūya' ājawa'jsatewa txakweçxáak ūsçxa u'j.

16 Teeçx selpisāa taḥç mil vxyu jxpa'gasa', txāa vxyu's kmāaji'jçxa ki' vxite taḥç mil íik āh knay.

17 Txā'wēy e'z mil jxpa'gasawa ki' vxite e'z mil íik āh knay.

18 Nawa teeçx milçxāa jxpa'gasa' patron vxyu's kafxi'jçxa kiwetek pedāa.

19 Patrona' wala txaçxte ki' sxawedna pa'jçxa', txāa selpisaawe'sxtxi vxyu ūsni's ki' pějxku.

20 Nyafxte' taḥç mil vxyu jxpa'gasa khuē'y utx-aana kūhçxa ki' vxite taḥç mil íik āh kaasxwedu'j na'jīna patrona's: Idxa' taḥç milgu ūs, aça' ki' vxite taḥç mil íith knay kmāaji'jçxa jīte',

21 patrona' na'wēk we'we: Idxa' vxyu'sa' psuwmeeg wala ew kmāaji'j. Txā'wē le'çxkuēçxáasanawa psuwmée kmāaji'pha'ga, wejx walasanawa neewe'weçxa iidx kusete nvxiitu'nja. Āçxha' me'ka adx yakh weçxana ūsya' jīk.

22 Txajū' vxite selpisāa e'z mil jxpa'gasawa kūjk na'jīna patrona's: Idxa' e'z milçxáag ūs, nawa

txã'sa' kmãaji'jçxa ki' vxite e'z mil íith ãh knay jíte',

²³ patrona' na'wëk pas: Idxa' vxyu'sa' psuwmeeg wala ew kmãaji'j. Txã'wë le'çxkweçxáasanawa psuwmée ewgu kmãaji'pha'ga ãçxha' txãate jxthaakwe walasanawa nvxiitu'nja iidx kusete. Me'ka adx yakh weçxana üsya' jík.

²⁴ Txajü' teeçx milçxáa jxpa'gasawa kũjk patrona's na'jĩna: Idxa' wala weesweetewa jiith, sa' iidx uuthasxmeesuwa jxukag pkhakhe' kĩhwa uhmeeçxawa.

²⁵ Txãa pa'ga üukhçxa iidx vxyu's jxaawthu kiwete pedaaçxa. Nawa ãçxha' dukheçthu idx makwene'ga üs txã'sa' jíte',

²⁶ patrona' na'wëk pas: Idxa' seelpimée watxkuëg. Adxa' txã'wë juuna'çxa kĩhwa uhmeeçxawa vxite jüitx pkhakhsatewa jüith jĩ'g na',

²⁷ ¿mjítega adx vxyu's bankoga jxaawmée txãate jxthaakwekuë nuypehnaçxa kaasxwedu'jya'? jĩçxa',

²⁸ kxtee üssatx na'wëk jxkaah: Txãa piçthë'j vxyu mil ji'phsa's kusa'jçxa diez mil ji'phsa's meswe.

²⁹ Txãa pa'gatey ji'phsa's jweeíçxáa jxthaakwe üswa'ja' wala ji'phukahñ. Nawa ji'phmeesa's jxuka kusa'jwa'ja' le'çxkuëçxáa ji'phuni'swa.

³⁰ Sa' txãa piçthë'j seelpimeesa's uweçxa ekaju çxhi'dx walate makhwe. Kxte' seena' yuh pe-beena ki'thtxi ksuusu'jna üswa'ja' jík.

Naa kiwetewe'sxtxi jxuka ewsatx fxii txudeni

31 Dxus Nçxi'k Nasa Yuusa' jxkaahsa yuuçxa angeleswe'sx ksxavxyte kîhçxa txajx jxkaahwa'the kaçxhiina.

32 Txajũ' nasa' naa kiwete mtee mteewe'sxwa jxuka pkhaakhethna txajx tasxte, aça' teexsa na'wëçxah txhitxhçxa txudena, piisxáa-thegsawa ma'wëga fxii txudé' piisxáa vxite' kaplatx txã'wëy.

33 Sa' piisxaatxi' paçu ju'gu txahçxa', kaplatxi' jebu ju'gu txajana.

34 Txã'wë yūuçxa jxkaahsa' we'wena paçu ju'gu ũssatxi' na'jîna: Adx Tata peeygāanisa, i'kwe'sxa' myuhwe txã'wë naa kiwe's vxi-tiyina i'kwe'sx jxkaahwa'j pheu'jni ũsa' txã'sna jxpa'gaya'.

35 Txãa pa'gatey i'kwe'sxa' adxa's sã'jî i'kwe wëena u'jute'. Sa' yũ'wëena u'jute', yusi'kwe. Nasa ekajuwe'sx na'wë u'jute', deewa'j pki'j'kwe.

36 Athwa'j ropa ji'phméé u'jute', ropa ũsi'kwe. Uuya' ũste', thegya' pa'j'kwe. Karcelte ũste', kxteewa thegya' pa'j'kwe jîte',

37 nasa ew yūusa' na'jîtxna: Idxa' ¿bagaçx wëena u'jutetka'w uyçxa ũ' puuç? ¿Bagaçx yũ'wëena u'jutetka'w tudxwa'j ũs?

38 Idxa' ¿bagaçx txã'wë ekajuwe'sx na'wë u'jute uyçatka'w deewa'j pki'j'? ¿Bagaçx txã'wë ropa ji'phméé u'jutetka'w ropawa ũs?

39 ¿Bagaçx aça'na ũstetka'w thegya' pa'j'? ¿Bagaçx karcelte ũstetka'w kxteewa thegya' pa'j'? jîtxna.

40 Aça' jxkaahsa' na'wë pasuna: Isath we'we', adx yakhthë'jwe'sx makwe wala pxthaa

ãhmeekwesaçxawa ayte ùsta' txãatx txã'wẽ yũusa' adxna pu'çxsaçxa i'kwe txã'wẽ yũu jĩna.

⁴¹ Txajũ' jebu ju'gu ùssatxi' jxkaahsa' na'jĩna we'wena: Adx tasxu mtxuteewe, i'kwe'sxa' ewmeetewe'sx yã'ji'kwe. Txãa pa'ga eçxthẽ'j jĩ eçxthẽ'j angeleswe'sx jĩ pheu'jni ùsa' infxierno ipx wala kxtee me'jwe jĩna jxkaajana.

⁴² Txã'wẽ adx wẽena u'jutewa, puuçmeei'kwe. Yũ'wẽena u'jutewa tudxwa'j ùsmeei'kwe.

⁴³ Nasa ekajuwe'sx na'wẽ u'jutewa, deewa'j pki'jmeei'kwe. Ropa ji'phmẽe u'jutewa, athwa'j ùsmeei'kwe. Aça'na ùstewa, thegya' pa'jmeei'kwe. Sa' karcelte ùstewa, kxteewa thegya' pa'jmeei'kwe jĩte',

⁴⁴ txãawe'sxa' na'wẽ pasutxna: Idxa' ¿bagaçx wẽena u'jutetka'w puuçmẽe? ¿Bagaçx yũ'wẽena u'jutetka'w tudxwa'j ùsmẽe? ¿Bagaçx ekajuwe'sx na'wẽ u'jutetka'w deewa'j pki'jmẽe? ¿Bagaçx ropa ji'phmẽe u'jutetka'w athwa'j ùsmẽe? ¿Bagaçx aça'na ùstetka'w thegya' pa'jmẽe? ¿Bagaçx karcelte ùstetka'w kxteewa thegya' pa'jmẽe? jĩtxna.

⁴⁵ Aça' jxkaahsa' na'wẽ pasuna: Isath we'we', naa nasa pxthaa ãhmeekuẽsatx kĩhte yuhwa pu'çxmeei'kwe na' adxna pu'çxsameeçxai'kwe txã'wẽ yuu jĩna.

⁴⁶ Txãa pa'ga ew yũusame' infxierno ipx pçuwa'jmeete khẽeya' u'jwetxna, naapkaçxha' ew yũusawe'sxa' bagaçxtewa pçuwa'jmẽe ìtxi fxi'zewa'ja's ji'phutxna.

Jesusa's ikhwa'ja's puutx we'weni
(Mr 14.1-2; Lk 22.1-2; Jn 11.45-53)

¹ Jesusa' txã'wē pta'sxna jxã'jçxa', txãa yakh u'jusawe'stxi na'jĩnak we'we:

² —I'kwe'sxa' jii i'kwe Paskua fxiesta ãjxa' e'z ençxáa yã'j peejxa', açã' txãa ente' Dxus Nçxi'k Nasa Yuusa's uweçxa dukhni yuuna kluuskhē a'kxçxa ikhkahn jĩk.

³ Txãa entey sacerdote npiiçthē'jwe'sx, ley kaapiya'jsawe'sx, judiu nthē'jsawe'sxa' pkhaakhetch sacerdote npiiçthē'j Kaifxas yat patxute,

⁴ sa' txãawe'sx pwe'sx puutx we'wetx nasa jiyunimeete paaçte Jesusa's uweçxa ikhya'.

⁵ Txãasatx fxiesta ente yu' txã'wē ikhya'mée puutx we'we nasa wala suskahmen.

Aceite pa'gasa's teeçx u'y Jesus dxikthekhē awni

(Mr 14.3-9; Jn 12.1-8)

⁶ Txãa ensu' Jesusa' Betania çxhabte Simon wã'jy weeju katxhisa yattek ũsu'.

⁷ Açã' teeçx u'y utxaana kũjk aceite wēt putasa's fxraskote uta awniisa wala pa'gasa's atçxa. Sa' Jesus kaçxçxa u'pte', txajx dxikthekhēk jxuka aw.

⁸ Txã'wē yũuni's Jesus yakh u'jusawe'sx uyçxa', na'jĩnatx ũusçxa we'we:

—¿Txakwe yuja' wala psuwmanx?

⁹ Txã'wē yũupkaçxte wejxwa pa'gate txweyçxa txãa vxyu's puuplesatx peeswaçne' wejx ew yu' jĩte',

¹⁰ Jesus wēse'jçxa' na'wēk we'we:

—¿Kĩjke kuçx susu' naa u'ya's? Na'wẽ yũunisa' psuwnisame'.

¹¹ Puuplesa' bagaçxtewa i'kwe'sx yakh nes yuutxna. Nawa adxa' i'kwe'sx yakh nes yu-uwa'jsameeth.

¹² Naa u'y adx kakwekhẽ aceite wêt putasa's awku, nawa adx uute pedaawa'ja's pheu'jnaçxáak txã'wẽ yũu.

¹³ Isath we'we': Naa kiwete mtee mteewa Dxus yuwe's pta'sxna pekũhsa' naa u'y txã'wẽ yũuni'swa ja'da pta'sxni yuuna peçxkanamée jĩk.

*Jesusa's preesu'jwa'ja's Judas ũus yaaxni
(Mr 14.10-11; Lk 22.3-6)*

¹⁴ Txajũ' Jesus yakh u'jusa docesatewe'sx Judas Iskariote yaasesa' sacerdote npiiçthẽ'jwe'sx yakh puutx we'weya' u'jçxa

¹⁵ txãawe'stxi na'jĩk:

—Jesusna uweçxa dukhte' ¿maz deweeki'kwe? jĩte', txãawe'sxa' treinta vxyutx deweya' neeyũu.

¹⁶ Txajũ' Jesusa's ma'wẽ yũuçxa txãawe'sx kusete dukhya' ãjawa'ja's wala pakwek.

*Jesusa' docesawe'sx yakh nmeh ũ'ni
(Mr 14.12-25; Lk 22.7-23; Jn 13.21-30; 1 Ko 11.23-26)*

¹⁷ Pan lewadura ji'phmée ũ'ni fxiesta en ãjaçte', Jesus yakh u'jusawe'sxa' txajx tasxte utxaaçxa na'wêtx pějx:

—Paskuate ũ'wa'ja's ¿mteega pheu'j jxthãasu'? jĩte',

¹⁸ na'wêk jxkaah:

—Jerusalenna me'jwe, kxtee teeçx piçthê'ja's jii i'kwe txã'sna na'jîne'kwe: Kwe'sxtxi kaapiya'jsa' na'jînak yuwe kaah: Adx uuwa'j en utxaak, aça' iidx yatte Paskua's yu'skhêwya'wath adx yakh u'jusawe'sx yakh jîne'kwe jîte',

¹⁹ txãa yakh u'jusawe'sxa' Jesus jxkaahni's kxtey yuutx, sa' ũ'wa'ja's pheu'jtx.

²⁰ Txajũ' jxuka çxhi'dxiçte', Jesusa' doce-sawe'sx yakh kaçxku mesate ũ'ya'.

²¹ Sa' ũ'na u'pçxa', na'wêk we'we:

—Isath we'we', i'kwe'sx yakh u'jusa teeçxsa' adxa's açesawe'sx kusete dukhya'wa' jîte',

²² txãawe'sxa' wala nxusçxa paapêjtxti teeçx teeçxçxah:

—¿Adx ma'th? jîna.

²³ Aça' Jesusa' pta'sxku:

—Maa txã'wê adx yakh ja'daçxah kuse's akhena plaatukhê txãa txã'wê adxa's açesawe'sx kusete dukhwa'jsa'.

²⁴ Dxus Nçxi'k Nasa Yuusa' ma'wê uuwa'jsatewa Dxus librute pta'sxi'k txã'sa' kxtey yuuya'wa'. Nawa adxa's açesawe'sx kusete dukhsa' jseena' yuh nxuste khêjena! Txãa piçthê'ja' naa kiwete wejx yuuwa upxmeewaçne' wejx ew yu' jîte',

²⁵ Judasa' pêjxku:

—Meeçxa' ¿adxwá'ntkakx? jîte', Jesus pasçxa':

—Idxíig jîk.

²⁶ Ũ'na u'pçxa', Jesusa' pana's jxpa'gana'wa Dxusa's weçxaçxa pe'lteдек, sa' txãa yakh u'jusawe'sxtxi ũsu'sku na'jîna:

—Mě'we, naa pana' adx kakwe na'wěsa' jĩçxa',
 27 waso'swa jxpa'gana'wa Dxusa's weçxaçxa
 txãawe'stxi ũsku na'jĩna:

—Jxukaysa mtudxwe naa wasotewe'sxa's.

28 Naa wasotewe'sxa' adx ee na'wěsa'. Dxusa'
 maazkuēesa pkaltxiwa khũkhçxa nwe'wewa'ja's
 vxitku, nawa adx eea's pkawçxa yuuçxáak
 txã'wě nwe'wewa'ja's vxit.

29 Nawa na'jĩ'th na': ãçxhũyã'ja' peena
 yu' tudxme'nja naa uwa yu'a's, naasáa adx
 Tata jxkaahwa'j enteçxáa yã'j ki' i'kwe'sx yakh
 pkhaakheçxa tudxi'nja jĩk.

Pedro ĩsxiiwa'ja's Jesus pta'sxni

(Mr 14.26-31; Lk 22.31-34; Jn 13.36-38)

30 Txajũ' Dxusna weçxana memna jxã'jçxa',
 u'jtx Oliwos thã'j vxiçna.

31 Aça' kxtee pa'jçxa', Jesusa' na'jĩnak we'we:

—Naa kuste' i'kwe'sx jxukaysa adxçxáana nvx-
 ihtçxa txuteene'kwe. Txãa pa'gatey txã'wě
 yũuwa'ja's Dxus librute na'jĩ'k: Piisxáa-thegsa's
 ikhte', piisxá' jxuka ũphuutxna jĩ'k.

32 Nawa adxa' uuçxawa ki' ĩtxi yuuçxa' i'kwe'sx
 yaçte u'jwe'nja Galilean jĩte',

33 Pedro' na'wěk pas:

—Makwe vxite yu' idxçxáana nvxihtçxa txu-
 teetewa, adx yu' txã'wě yũume'nja jĩte',

34 Jesus pasçxa':

—Isath we'we', naa kuste atalx we'wemeyna
 idxa' Jesusa's jiimeeth jĩna tekx us ĩsxiiwane'ga
 jĩte',

35 Pedro' na'wěk we'we:

—Makwe idx yakh ja'datey uuwa'jma'k kaseh, nawa idxa's jiimeeth jīna yu' ĩsxiime'nja.

Aça' txāa yakh u'jusawe'sx jxukaysa txā'wēçxaçxáatx we'we.

*Jesusa' Geçemanite Dxus yakh puutx we'weni
(Mr 14.32-42; Lk 22.39-46)*

³⁶ Txajũ' Jesusa' txāa yakh u'jusawe'sx yakh Geçemaní yaasesate pa'jçxa', na'wēk we'we:

—Ayte mkaaçxwe, naapkaçxha' adxa' Tata yakh puutx we'weya' u'jweçthu jĩçxa',

³⁷ Pedro vxite' Zebedeo nçxi'k e'zsats pe'jçxak u'j. Sa' ũuste wala nxus ũusuthete', na'jĩk:

³⁸ —Txakwe wala pxthaa yuuçxa uuwa'ja's yajkxte', wala nxus yuja'. Aça' i'kwe'sxa' ay-tee neeyũuçxa dehmée jxpa'yakx me'pwe adx na'wēy jĩçxa',

³⁹ Jesusa' jxu'jmée u'jçxaçxáa txkaa pkipha weteçxa Dxus yakh puutx we'wek na'jīna:

—Tata, idxa's ewuweçxte', adxa's meen nwe'we txakwe wala pxthaa yuuwa'ja's jxpa'gakahmen. Nawa adx jxthāasni yu'sa' kxtey yuumeexawa, iidx jxthāasniçxá's kxtey meen yūu.

⁴⁰ Txajũ' Jesusa' ki' sxawedku Pedrowe'sx tasxtey, sa' dehna ũste uyçxa' na'wēk we'we Pedro's:

—Adx yakh jxpa'yakx dehmée ũsya' ājameewá'kwe teeçx oraçxáawa.

⁴¹ Ewmeete weteya'mée jxpa'yakx dehmée me'pwe Dxus yakh puutx we'wena. I'kwe'sxa' ũusuh yu' çxhãçxhai'kwe yaaki', nawa i'kwe'sx kakwe yu' çxhãçxhaçme' kxtey yuuya'.

42 Txajũ' Jesusa' ki'kin u'jçxa', na'jĩnak Dxus yakh puutx we'we:

—Tata, txakwe wala pxthaa yuuwa'ja's yu'pthejxa' ewuweçxmeete', iidx jxthãasni kxtey yuuwaççxáa ewna jĩçxa',

43 Pedrowe'sx tasxte ki' sxawedçxa', txãawe'sx yafx çxhãçxhameete ki' dehna ũstek uy.

44 Sa' nyafxíi na'wēyçxáa we'weçxa tekx uswa ki' u'kh, Dxus yakh puutx we'weya'.

45 Txã'wē yũuçxak Pedrowe'sx tasxna sx-awedna kũhçxa', na'wē we'we:

—Ãçxh yuuçxá' mdejxujíiwe jxkaaseya'. Dxus Nçxi'k Nasa Yuusa's pkalsawe'sx kusete dukhwa'j en ãjk.

46 Aça' kiiteçxa u'jwega. Adxa's açesawe'sx kusete dukhwa'jsa' yujxã'ja' jĩk.

Jesusa's preesu'jni

(Mr 14.43-50; Lk 22.47-53; Jn 18.2-11)

47 Jesus kxtee we'wena nee ũsiyna, Judasa' pa'kh. Txã' docesatewe'sxíiçxáak yu'. Aça' txãa yakh nasa wala kuh pa'jtx kçxilx vxite' fxtũ atçxa. Txãawe'sxa' sacerdote npiiçthē'jwe'sx vxite' judiu nthē'jsawe'sx jxkaahnisatx yu'.

48 Judasa' na'jĩnaga yu'kxwe'weçxa pe'jna yuwé' Jesusa's tudkahn:

—Ma'sna dxi'pte adx weçxa'nja txã'sna tudçxa jxũna u'jwene'kwe jĩnaga we'we.

49 Txãasak Jesus tasxte utxaaçxa na'wē we'we:

—Kwe'sxtxi jxppe'jsa jĩna'wa weçxak.

50 Aça' Jesusa' na'jĩk:

—Namiku, çkĩjxa' yuhga? jĩçpkaçxha', tudtxi jxũna u'jya'.

⁵¹ Txã'wẽ tuduɕpkaçxha', Jesus yakh pi'kxna u'jusa teeçxsa' kçxilxa's jxkuutxi'jçxa sacerdote npiiçthẽ'ja's selpisáa thũ'wẽ's spẽ'thku.

⁵² Aça' Jesusa' we'wek:

—Iidx kçxilxa's mjxaaw. Txã'wẽme', jxukay maawa kçxilxuh puiisa', kçxilxteyçxáa uuwa'jsata'.

⁵³ Adx Tata's maazkuẽe angeleswe'sxwa adxna nwe'wewa'jsa pẽjxte', kxtey yuuna sũju'çmeewá'ga.

⁵⁴ Txã'wẽ pẽjxte', kxtey yuuyujuna, nawa Dxus libroute' nyafxiitey pta'sxni yã'kh yu' açxh na'wẽ tuduçta' txã' kxtey yuukahn, aça' nwe'wewa'jsa pẽjxme'nja.

⁵⁵ Txã'jĩçxa' tudsatxku we'we:

—Adxa' pesweethas i'kwe adxa's tudxa' kçxilx petx fxtũ atçxa pa'j. Adxa' kaapiya'jya' een isath dxuus yatte i'kwe'sx ksxavxyte nes yu'. Nawa txagaçxhíi yu' tudmeei'kwe.

⁵⁶ Nawa Dxus yuwe pta'sxsawe'sx fxi'jçxa nvxi-itni kxtey yuukahnçxáa txã'wẽ yuuça' jĩk. Naapkaçxha' Jesus yakh u'jusawe'sxa' txã'sçxáana nvxihtçxa jxuka ãphna u'jtx.

Kaifxas tasxte Jesusa's kuutxa'jni

(Mr 14.53-65; Lk 22.54-55, 63-71; Jn 18.12-14, 19-24)

⁵⁷ Aça' Jesusa's tudçxa jxũna u'jtx sacerdote npiiçthẽ'j Kaifxas tasxte. Kxteea' ley kaapiya'jsa vxite' judiu nthẽ'jsawe'sx txãawe'sxtxi pkhaakheçxa ãs yu'.

⁵⁸ Aça' Pedro' e'ste jxu'j neeyũuçxak yuhna ãsu', sacerdote npiiçthẽ'j yat patxute u'kapkaçx,

sa' kxtee policiawe'sx yakh kaçxçxa neeyũuk kĩh yũutewa uyya'.

59 Naapkaçxha' sacerdotewe'sx, judiu nthẽ'jsawe'sx vxite' jxukay kxtee pkhaakheçxa ũssawe'sxa' Jesusa's kiikhe'jya' sũhçxa kĩhçxáawa ĩsxiwa'jsa pakwe'tx.

60 Makwe nasa maazkuẽesa kĩhçxáawa pta'sxna kũhtewa, ĩsxiiniçxáak kaseje'. Nawa nmehte' e'z nasa ĩsxiisa kũhçxa na'wẽtx pta'sx:

61 —Naa piçthẽ'ja' na'jĩ'k: Adxa' naa dxuus yata's pẽtxçxa tekhe'nte' ki' txaja'nja jĩ'k jĩna pta'sxte',

62 sacerdoti npiiçthẽ'ja' kiiteçxa Jesusa's na'wẽk we'we:

—¿Kĩh yũuçxaga ma'wẽçxáawa pasu'çmée? Meeçxa' ¿isa yuh txã'jĩwá'nta? jĩtewa,

63 Jesusa' pasme'. Aça' sacerdoti npiiçthẽ'ja' na'wẽk we'we:

—Dxus ĩtxisa dxi'pte jurãycçxa isasaçxá's mpeeta'sx. Idxa' ¿Kristo Dxus Nçxi'k dxihgá'? jĩte',

64 Jesus pasçxa':

—Idxa' isag we'we'. Adxa' i'kwe'sxtxi na'jĩ'th na': Dxus Nçxi'k Nasa Yuusa's uyuune'kwe Dxus pukate kaçxçxa u'pte sa' cieluju tãaph pxãhte kĩjaçtewa uyuune'kwe jĩte',

65 sacerdoti npiiçthẽ'ja' ũusaçxaçxa peekx athni ropas sudek na'jĩna:

—Naa piçthẽ'ja' txajx yuweju yuu açewe'wek Dxusa's, aça' ¿kĩjxa'çxáa testigo jwee peji-ikxtha'w? Txajx açewe'weni's i'kwe'sxiwa wẽse'ji'kwe.

⁶⁶ Sa' āçxha' ¿maa sũju'kwe? jĩte', txãawe'sxa' na'wẽtx pas:

—Txã' yuuwesa', txãa pa'ga ikhwa'j yuuna jĩtx.

⁶⁷ Txajũ' Jesus dxi'pte fxne'sx avxythethçxa uyiitx, aç'a' vxite' dxi'ptetx uka'ka na'jĩna:

⁶⁸ —Idxa' Kristo dxihçxa', mjiyu kimga dxi'pte ujka.

Jesusa's jiimeeth jĩna Pedro we'weni

(Mr 14.66-72; Lk 22.56-62; Jn 18.15-18, 25-27)

⁶⁹ Txã'wẽ yuuçpkaçxha', Pedro' ekaju patxutek kaçxçxa u'pu'. Aç'a' teeçx kna'sa selpisáa utxaana kũhçxa na'wẽk we'we:

—Ídxwa Jesus Galileajuwe'sx yakh u'jusag jĩte',

⁷⁰ Pedro' jxukaysa dxi'pte:

—Í'kwe we'weni's jiimeeth jĩnak ĩsxii.

⁷¹ Txajũ' Pedro' vxitxte kasehna u'jweçpkaçxha', vxite kna'sa selpisaawa uyçxa' kxtee ùssatx na'wẽk pta'sx:

—Naa piçthẽ'jwa Nasarettewe'sx Jesus yakh u'jute uythu jĩte',

⁷² Pedro' ki' ĩsxiik jurãyna:

—Txãa piçthẽ'ja's adxa' jiimeeth jĩk.

⁷³ Txaçxmeynaçxáa kxtee ùssawe'sx Pedro tasxte utxaaçxa na'wẽtx we'we:

—Isa, ĩsxiimée idxwa txãawe'sx yakh u'jusag. Txã'wẽçxaíi iidx we'weni' peedame' jĩte',

⁷⁴ ki' jurãyçxa na'wẽk we'we:

—Txãa piçthẽ'ja's jiimeeth, isa Dxus uyte.

Txã'jĩna ùspkaçxha', atalx we'wek.

⁷⁵ Aç'a' Pedro' yajkxku Jesus na'jĩna we'weni's: Atalx we'wemeyna, idxa' tekh us ĩsxiijane'ga

jiimeeth jīni's. Txã's yajkxçxa', Pedro' eka kasehçxa seena' wala nxusna ũ'nek.

27

Jesusa's Pilato kusete dukhni
(Mr 15.1; Lk 23.1-2; Jn 18.28-32)

¹ Txajũ' khikhyna sējeçte', sacerdote npiiçthē'jwe'sx vxite' judiu nthē'jsawe'sx txãawe'sxa' puutx we'wetx Jesusa's kiikhe'jya'.

² Sa' tudçxa jxũna u'jtx ne'jwe'sx Poncio Pilato tasxte kuutxa'jya'.

Judas uuní

³ Jesusna kuuwe'jsa Judasa' Jesusa's ikhwa'j vxitni's jiyuçxa', iiméh wala nxusku. Txã'wē yũumeewaça' ewne' yu' sũhçxa treinta vxyutxi' kaasxwedu'jya' u'kh sacerdotewe'sx vxite' judiu nthē'jsawe'sx tasxna na'jīna:

⁴ —Adxa' āhmeeth yũu, txã'wē piçthē'j kīhtewa yuuwemeesa's ikhkahn kuuwe'pha'ga jīte', txãawe'sxa' na'wētx pas:

—Kwe'sxa' ¿jiitka'wá? Txã'wē yũusa idx jiine'ga jīçxa jxpa'gameete',

⁵ Judasa' txãa vxyu's dxuus yatte wāatahna'wa u'jçxa ya'jythujkku.

⁶ Txã'wē yũute', sacerdotewe'sxa' txãa vxyu's pkhakhçxa na'wētx puutx we'we:

—Naa vxyu's ofxreda kajate akhya' ājame'nja'w. Txã'wēme', nasa's kiikhe'jni vxyua' naa pa'ga jīçxa',

⁷ txãa vxyuju mitxh umsáa kiwe'stxi wey, nasa ekajuwe'sx pa'jçxa uusaatx pedaawa'j.

⁸ Txãa pa'ga ãçxpkaçx txãa kiwe' ee pkawnisa kiwe' jĩ'tx.

⁹ Aça' Dxus yuwe pta'sxsa Jeremias we'weni kxtey yuuk. Txã' na'wêk we'we: Israelwe'sx makwetene'ta txweyya' puutx we'we txãa treinta vxyu's jxpa'gaçxatx

¹⁰ mitxh umsáa kiwe's wey, Dxusa' adxa's jxkaakh kiwe weykahn txã'sa' kxtey yuutx jĩnak fxi'j.

Jesusa's Pilato pēyni

(Mr 15.2-5; Lk 23.3-5; Jn 18.33-38)

¹¹ Jesusa' ne'jwe'sx tasxte jxũna u'jnik yuu, aça' txã' na'jĩnak pējx:

—Idx wáa txã'wē judiuwe'sxtxi jxkaahsane'ga jĩte', Jesus pasçxa':

—Idxa' isag we'we'. Adxa' txã'wēsaíith jĩk.

¹² Txajũ' sacerdotewe'sx vxite' judiu nthē'jsa txãawe'sxa' Jesusa's ewmeesag jĩna we'wete', Jesusa' pasu'çme'.

¹³ Aça' Pilato' na'wêk we'we:

—Idxa's na'wētx kíhtewa jxuka ewmeesa' jĩna yuwe ũsu' aça' wēse'jeçmeewá'ga jĩtewa,

¹⁴ Jesusa' kíhwa pasme'.

Jesusa's ikhwa'j vxitni

(Mr 15.6-20; Lk 23.13-25; Jn 18.38-19.16)

Txã'wē pasmeete', ne'jwe'sxa' ma'wē yũuya'çxáa yuhwa ãjameeçxa', na'wē yũuya'k yajkx.

¹⁵ Fxiesta ensu' ne'jwe'sxa' teeçx preesu txh-weete'k ma'sna nasa pēyitxna txã'sna.

¹⁶ Aça' txãa fxiesta ensu' teeçx preesu jx-tuhthesa ũsu'k Barabas yaasesa.

17 Kxajk Pilato' na'jīna pējx txāawe'sx pkhaakheçxa ũssatx:

—I'kwe'sxa' ħimnakwe txhweete jxthāasu'? ħBarabasna', meeçxa' Kristo jī'i'kwe txā'sna wāa kaatxhweete'je'nja?

18 Txā'wē Jesusa's ahçeçxa txajx tasxte dukhtewa jiyuçxak txā'jī.

19 Pilato' jxkaahna u'pnite u'pte', txajx nyua' na'jīnaga yuwe kaah: Txāa piçthē'j yuuwemeesa yakha' kuçx yuumeena. Txā'wēme', āçxh kus iiméh seena' ũukhūukh ksxa'wthu txāa piçthē'j ma'wē yūuwa'jsatewa.

20 Txā'jīna pta'sxtewa, sacerdotewe'sx vx-ite' judiu nthē'jsa txāawe'sxa' nasatx knaytxi yu'kxwe'weçxa, txā'wē Barabasa's txhweeteçxa Jesusa's kiikhe'jwa'ja's pēykahn.

21 Txā'wētewa, ne'jwe'sxa' ki' pējxku na'jīna:

—Naa e'zsaxi' i'kwe'sxa' ħma'snakwe kaatxhweete'j jxthāasu'? jīte', txāawe'sxa' na'wētēx pas:

—Barabasna metxhwete jīte',

22 Pilato we'weçxa':

—Barabasa's txhweeteçxa', naa Jesusa's Kristo jī'i'kwe txā'sa' ħkīh yūutka? jīte', jxukaysa pasçxa':

—Kluuste mkaafxuçu'j jī'tx.

23 Aça' Pilato' na'wēk pējx:

—ħKīhga ewmée yūu? jīte', txāawe'sxa' ki' sus we'weçxa':

—Kluuste mkaafxuçu'j jī'tx.

24 Txajū' Pilato' kīhwa yūuya' ājanimeeteçxāa nasa' jweeīiçxāa seena' wala suste', yu'

jxũukaahçxa nasaa dxi'pte txajx kusetx
kweeçxak na'jïna:

—Naa piçthê'j kïhtewa yuuwemeesa's ikhni's
adxa' yuuwemeesath. Txã'sa' i'kwe'sx pa-
sune'kwe jïte',

²⁵ nasa jxukaysa we'weçxa':

—Txã'sa' kwe'sx luuçx yã'jçxa jxuka
paswa'jsatha'w jï'tx.

²⁶ Txajũ' Pilato' kaatxhweete'kh Barabasa's,
nawa Jesusa's kaapeçxukwe'jçxa kluuste
fxuçkahn dukhku.

²⁷ Txã'wê yũute', soldauwe'sxa' ne'jwe'sx
u'pnite ka'ga'jçxa, soldauwe'sx jxukaysatx
pa'yaçxa Jesusa's jxuka kxtadçxatx yuju.

²⁸ Txajũ' ksũupi'jçxa atxh behsatx kaathe'j.

²⁹ Sa' çhũçha's korona na'wê vxitçxa dxikthete
ki'ptxi. Paçu kuseju yu', fxtũu zuzkuëttx kaatu'j.
Txã'wê yũuçxatx txajx tasxte pee'jxũkwe:

—Judiuwe'sxtxi jxkaahsath jï'ne'ga jïna
weeçxna.

³⁰ Sa' fxne'sx avxythethna fxtũ's kusa'jçxa,
dxikthegatx pekwe'kwe.

³¹ Txã'wê Jesusa's weeçxna jxã'jçxa', txãa atxh
behsa's ksũupi'jçxa Jesus ropa's ki' kaathe'jtx.
Txã'wê yũuçxatx kluuskhê fxuçya' jxũna u'j.

Jesusa's kluuste fxuçni

(Mr 15.21-32; Lk 23.26-43; Jn 19.17-27)

³² Txajũ kasehna u'jweççxa', teeçx piçthê'j
Cirenejũwe'sx Simon yaasesa yakhtxi pu'jykhêw.
Sa' Jesus yakhni kluusa's txã'snatx kxaakhe'j.

33 Txã'wẽ yũuçxatx pa'j teeçx ahte Golgota yaasesate. Txãa yu' Uusá Dxikthé Dxi'thçxáasa jĩni'.

34 Kxteea' vxinote yaasa's awçxatx Jesusa's yus wõe. Nawa txã'sa' yuwete isaçxaçxáa tudxme'.

35 Kluuskhẽ a'kxçxa', soldauwe'sxa' swerte kaahntx Jesus athni ropa's maa soldau knaytewa jiyuya'. Dxus yuwe pta'sxsa' na'jĩnak we'we txã' kxtey yuuk: Swerte kaahçxa adx ropa's txudeedetx txãawe'sx pwe'sx jĩnak we'we.

36 Txã'wẽ yũuçxatx kxtee thegna kaçx.

37 Sa' txajx dxikthé kakwey fxi'jçxa ki'ptxi kĩh yũusate ikhçxawa na'jĩna pta'sxna: Naaíi Jesus Judiuwe'sxtxi Jxkaahsa' jĩnak fxi'jni yu'.

38 Sa' Jesus pukakhẽ pdxi'ptxi e'z pesweetx ki'pni yuu kluuskhẽ.

39 Aça' kluus tasxuy uykhẽwsa' na'jĩnatx wõesxu' dxiktheetx kaawũhna:

40 —Dxuus yata's pẽtxçxa tekh ente' ki' kiisathẽ'j, idxa' ya'menwe'we. Dxus Nçxi'k dxihçxa', kluusuh msa'j jĩ'tx.

41 Txã'wẽy sacerdotewe'sx, ley kaapiya'jsawe'sx, fxariseowe'sx, vxite' judiu nthẽ'jsawe'sx txãawe'sx pwe'sx na'jĩnatx weeçx we'we':

42 —Vxite yuutxi' nwe'wek, nawa peekíi yu' ya'nwe'weya' ãja'çme'. Israelwe'sxtxi Jxkaahsa dxihçxa', kluusuh sa'jana aç yuuçxáa ísxiija'çmeega sũju'nja'w.

43 Dxus Nçxi'kthu jĩ'k na' Dxusnane' neewe'we', aça' txã'sa' ãçxhíi Dxusa' nwe'wena, nwe'weya' ãjaçxa yu' jĩ'tx.

44 Aça' kluuskhẽ fxuçni ki'pnisa peswée yuhwa wëesxu pu'çxhi'tx.

Jesus uunü

(Mr 15.33-41; Lk 23.44-49; Jn 19.28-30)

45 Txajũ' ěepxāh walajũjx çxhi'dxçxa kusuçte las trestepkaçxku çxhi'dx naa kiwete jxuka.

46 Aça' las tres ājaçpkaçxha', Jesusa' na'jĩnak sus we'we:

—Eli, Eli, ¿lama sabaktani?—txã' na'jĩni': Adx Dxusgu sa' ¿mjĩ pa'gaga adxa's thegmée nvxiht? jĩni'.

47 Aça' kxtee ũssa' txã'jĩni's wëse'jçxa', na'wẽtx we'we:

—Dxus yuwe pta'sxsa Eliasa's pa'yaça' jĩ'tx.

48 Naapkaçxha' teeçxsa' wuwuuna u'jçxa esponja's vxino puste akhçxa fxtũu vxiçte ki'pçxa yuwete utxak çxazxakahn.

49 Nawa vxite yu' na'jĩ'tx:

—Kuçx yuunu. Aan Elias pa'jana nwe'weya' jĩ'tx.

50 Txajũ' Jesusa' ki' seena' sus we'weçxa' uuk.

51 Naapkaçxha' dxuus yatte txudenisa liensu pesath a'kxnisa' puupxājkhẽ sutek kute ěju kiwete kĩh. Naapkaçxha' ehdwa çxhāçxha u'the', penxa yuhwa upetx,

52 aça' uusaawe'sx pedaní kafxwa phaate'te', Dxusna jxpa'gaçxa uusaawe'sxa' ki' ĩtxi yuutx.

53 Aça' Jesus uuçxawa ki' ĩtxi yuuniijũ' txãawe'sxa' pedaní kafxu kasehçxa Jerusamente u'kate', maazkuëesawa uytxi.

54 Txajũ' kxtee Jesusna jxpa'yakx thegna ũssawe'sx vxite' soldau kpiitan txãawe'sxa'

wala ũukhtxi ehd u'jna vxite' kīhwa seena' yūuni's uyçxa. Sa' na'wētx we'we:

—Isa, naa piçthē'ja' Dxus Nçxi'k yuh yu'ga jī'tx.

⁵⁵ Kxteea' kuh u'ytxi ũsu' jxu'ju thegna, txāawe'sxa' Jesusna selpiina u'jusatx yu' Galileajūjx yuusa.

⁵⁶ Txāawe'sx ksxavxyte' Maria Magdalena, vxite' Maria Jakobo Jose njī'j, vxite' Zebedeo nyu txāawe'stxi yu'.

Jesusa's pedaní

(Mr 15.42-47; Lk 23.50-56; Jn 19.38-42)

⁵⁷ Kusna kījaçte', teeçx piçthē'j wala ji'phsa Jose yaasesa Arimatea çxhabuwe'sxku pa'j. Txāawa Jesus yakh u'jusak yu'.

⁵⁸ Txāa piçthē'ja' Pilato tasxte u'jçxa', Jesus kakwe's pējxku, aça' Pilato' yuwe kaakh tee dukh jīna.

⁵⁹ Txajū' Josea' Jesus kakwe's spajkxçxa liensu fxinusatek yap.

⁶⁰ Sa' kwet penxate u'se kafxi'jçxa ji'phu'k peekx kakwe's pedaawa'j txkaa khikhçxa', u'kani kafxte yu' kwet walasaju aphçxak u'j.

⁶¹ Kxtee txā'wē yūuçte', pedaní kafx dxi'puh utxatx thegna u'pu' Maria Magdalena vxite Mari-awa.

Jesusa's pedaní kafxte thegsa

⁶² Jxkaasena fxi'zeyā' jxuka pheu'jna jxā'jniū kuskuskhē' sacerdote npiçthē'jwe'sx vxite' fxariseo txāawe'sxa' Pilato tasxte u'jçxa na'wētx we'we:

63 —¿Wēse'gá', ne'jwe'sx? Txāa iisxihtē'ja' nee itxi u'juçxa', uuçxawa tekh ente' ki' itxi yu'nja jīni'stha'w yajkx.

64 Txāa pa'ga mkaah pedaní kafxte wala ew aphkahn tekh entepkaçx. Txā'wē yūumeete', txāa yakh u'jusawe'sxa' kus pa'jçxa kakwe's pesweetxna, sa' e'suyā'ja' na'jīna we'wetxna nasatx: Uuçxawa ki' itxi yuuga jītxna. Aça' txā'wē yūuçxa iisxiini' nyafxii' iisxiinite thaakwesa yuuna jīte',

65 Pilato' na'wēk we'we:

—Soldauwe'sx kxtee ũsta' txāatx pe'jçxa me'jwe, sa' pedaní kafxte wala ew maphwe. I'kwe'sxtxi ma'wē wejx ew thegte', txā'wē myūuwe.

66 Txā'jīte', u'jçxa pedaní kafxte wala ew aphçxa txāa aphni kajkwete selxo ki'ptxi, sa' jxpa'yakx thegna ũswa'jsa soldauwe'sx txahtx.

28

Jesus ki' itxi yuuni

(Mr 16.1-8; Lk 24.1-12; Jn 20.1-10)

1 Jxkaase en skhēwniijū kuskuskhē mjīiwa'j en āanite wala kusiitey Maria Magdalena vxite Maria yakh txāawe'sxa' u'jtx pedaní kafxte thegya'.

2 Naapkaçxha' ehd seena' çxhãçxha u'kh, txā'wē Dxus angel cieluju kīhçxa pedaní kafxte aphni kweta's kiispa'ga. Sa' txāa yu' txāa kwet kajkwete kaçxçxa

3 kpi'sx kweneni na'wēk khikhyna u'p yu', aça' txajx athni ropa' seena' zhiçxkwe çxihme yu'tx.

4 Aça' soldauwe'sxa' txã'wěsa's uyçxa', ùukhnite jxuka yayaçxa uuníi na'wětx wete.

5 Aça' txãa u'ywe'sxtxi' Dxus angela' na'wěk we'we:

— Ûukhnuwe, adxa' jiith, Jesusna kluuste fxuçtxi txã'sna i'kwe'sxa' thegya' yuji'kwe.

6 Nawa ayte' meeyã'ja'. Uuniijũ ki' ïtxi yuuçxa u'kh ma'wěga pta'sx txã' kxtey yuuk. Mkaane'ta khikh txkaa myuhwe thegya'.

7 Sa' wala dud me'jwe, txãa yakh u'jusawe'sxtxi na'wě pta'sxya': Uuçxawa ki' ïtxi yuuçxa Galilea kiwen u'jweça' i'kwe'sx yaçte. Kxtee puutx uyuune'kwe jĩna pta'sxine'kwe. Txã'wě pta'sxwa'th ji'phu i'kwe'sxtxi jĩk Dxus angela'.

8 Txajũ' u'ywe'sxa' wala dud wuwuuna u'jtx Jesus yakh u'jusawe'sxtxi pta'sxya' ùukhnawa ùuste wět wět yajkxna.

9 Naapkaçxha' Jesusa' txãawe'sx u'jweçte dxi'the vxyaaçxa weçxana kũjk. Aça' txãawe'sxa' Jesus tasxte peejxũkweçxa txajx çxidatx psxa'dçxa weçxatx.

10 Aça' Jesusa' na'jĩk:

— Ûukhmée me'jwe, sa' adx yakthě'jwe'sxtxi pta'sxine'kwe Galilea kiwen u'jçxa kxtee adxa's puutx uyuune'kwe jĩnak pta'sxkaah.

Jesus ïtxi yuuni's soldauwe'sx pta'sxni

11 U'ywe'sx txã'wě u'jweçpkaçxha', pedaniite thegna ùssa soldauwe'sx maaíi yu' u'jtx Jerusalente sacerdotewe'sxtxi pta'sxya' kĩh yũuni'swa jxuka.

12 Txajũ' sacerdotewe'sxa' judiu nthě'jsawe'sx tasxte u'jçxa puutx we'wetx. Txã'wě yũuçxa soldauwe'sxtxi' wala vxyu dukhtxi.

13 Sa' na'wětx we'wekaah: Kuspxāh kwe'sx deenite Jesus yakh u'jusawe'sx pa'jçxa uunfi kakwe's pesweeta jĩne'kwe i'kwe'sxa'.

14 Aça' txã'wě yuh dehne'ta sũhçxa ne'jwe'sxa' i'kwe'sxtxi ewmeete nvxiit wějewaana, nawa kwe'sx u'jçxa txāa yakh puutx we'we'nja'w i'kwe'sx ju'gu txã'wě yũukahmén.

15 Txã'wě kwe'we'the', soldauwe'sxa' vxyu's jxpa'gaçxa kxtey yuutx. Aça' txāasatx judi-
uwe'sxa' āçxpkaçx txã'wěçxāa pta'sxi'.

*Jesusa' txāa yakh u'jusawe'sxtxi neewe'weçxa
nvxiitni*

(Mr 16.14-18; Lk 24.36-49; Jn 20.19-23)

16 Txã'wě yũuyã'the', Jesus yakh u'jusa once-
sawe'sxa' Galilean u'jtx, thã'j vxiçte mteene'
Jesus pta'sx kxtee.

17 Sa' Jesusa's uyçxa', peejxũkweçxa weçxatx,
nawa vxitei' yu' txāamée wáana sũhna kuhtx
yaaki'.

18 Txajũ' Jesusa' txāawe'sx tasxte utxaaçxa
na'wěk we'we:

—Cielute vxite' naa kiwetewa adxnaçxaçxáak
neewe'weni yuu jxkaahwa'ja's.

19 Txāasath i'kwe'sxtxi jxkaaja': Me'jwe Dxus
yuwe's pta'sxya' maa kiwetewa nasa jxukaysatx.
Txã'wě yũuçxa' yu'te bautisaĩne'kwe, Dxus vx-
ite' Dxus Nçxi'k vxite' Dxus Espiritu txāawe'sxtxi
neewe'weçxa.

20 Sa' Dxusa's nwēese'jwa'ja's
kaapiya'jane'kwe kīhtewa jxuka, adx ma'wētkā
i'kwe'sxtxi jxkaah txā'wēy. Mjiyuwe, āçxhūyā'ja'
een isa bagaçxtewa i'kwe'sx yakh nes
yuuya'wath naa kiwe pçuupkaçx jīk.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd